


( ভৌতিক উপন্যাস )

শ্রীহেমেন্দ্রকুমার রায়

প্রাণিস্থান  
ইন্টার্ন-ন-হাউস  
কলিকাতা

প্রকাশক কর্তৃক সর্বস্বত্ব সংরক্ষিত  
প্রথম সংস্করণ \* \* \* দোলপূর্ণিমা ১৩৪৫



মূল্য বারো আনা

আরতি এজেন্সি, ১৫, কলেজ স্কোয়ার, কলিকাতা হইতে শ্রীঅনাথনাথ  
দে কর্তৃক প্রকাশিত এবং ২৫৯ নং অপার চিংপুর রোডস্থ  
শ্রীকৃষ্ণ প্রিণ্টিং ওয়ার্কস্ হইতে শ্রীপ্রমথনাথ মাস্তা দ্বারা মুদ্রিত

স্মরণিক ও স্মলেখক স্মৃতি  
শ্রীযুক্ত নীরদরঞ্জন দাশগুপ্ত ( ব্যারিষ্টার-অ্যা  
করকমলেশু

ছোটদের বার্ষিকী  
শ্রীম্মনির্মল বসু সম্পাদিত  
আরম্ভ

৪৫০ পাতার বিশাল বই ।

সব রকমের গল্প, কবিতা, কাহিনী,  
নাটক প্রভৃতির সংগ্রহ ।

সমস্ত লেখাই মৌলিক ।

দাম ১।০

দাম ১।০


# আমাদের প্রকাশিত শিশু-সাহিত্য

শ্রীকুমার রায়	
জব দেশে অমলা (২য় সংস্করণ) ॥	
নির্মল বসু	
শন ফকিরের ভিটে (২য় সং) ১০/০	
জবের জন্ম	১০/০
রাম চক্রবর্তী	
টুর মাস্টার (২য় সংস্করণ) ১০/০	
গণ বন্দ্যোপাধ্যায়	
মানার পাহাড়	১০/০
মনোরাষণ চক্রবর্তী	
জায় হাসি (২য় সংস্করণ) ১/০	
শিশু দাশগুপ্ত	
মিাপুরীর ভূত (২য় সংস্করণ) ১০/০	
কির লড়াই	১০/০
মীর গল	১০/০
বিনয় রায় চৌধুরী	
লতো (ধাধার বই) ১০/০	
দেব বসু	
গল্প ঠাকুরদা	১০/০
এক পেয়লা চা	১০/০

শ্রীশিবরাম চক্রবর্তী ও শ্রীগোরাঙ্গপ্রসাদ বসু	
জীবনের সাফল্য	১০/০
শ্রীগোষ্ঠবিহারী দে	
সুঞ্জলি	১০/০
নীতিগল্পসুচ্ছ (৪র্থ সংস্করণ)	১০/০
জাতকের গল্পমঞ্জুষা	১০/০
গল্পবীধি (২য় সংস্করণ)	১০/০
শিশু-সারথি	১০/০
শ্রীধর্মদাস মিত্র	
খাদে ডাকাতি	১০/০
শ্রীপ্রভাতকিরণ বসু	
রাজার ছেলে (উপভাস)	৫০

শীত্রই বেরুবে—

শ্রীসুনির্মল বসু	
আদিম দীপে	
শ্রীমুপেন্দ্রকৃষ্ণ চট্টোপাধ্যায়	
জর্গম পথে	
শ্রীসুকুমার দে সরকার	
অরণ্য বহু	
শ্রীদীনেশ মুখোপাধ্যায়	
অচিন দেশে রাজকন্তা	



প্রথম পরিচ্ছেদ

জনশূন্য আলিনগর

সন্ধ্যার আগেই পৃথিবী আজ অন্ধকার হবে! পশ্চিমের আকাশে এখনো খানিকটা জায়গা জুড়ে অস্তগত সূর্যের বৃক্কের-রক্ত-মাখানো আলো ছড়ানো আছে বটে, কিন্তু তার শিখা তাড়াতাড়ি নিবিয়ে দেবার জন্তে হু-হু করে বিরাত এক কালো মেঘ খেয়ে আসছে!

চারিদিকে ছোট-বড় পাহাড় আর বনজঙ্গল। মাঝখানের উচু-নীচু পথ দিয়ে একখানা মোটরগাড়ী ছুটে আসছে উর্দ্ধ্বাসে।

গাড়ীর ভিতরে বসে রয়েছে তিনজন যুবক ও একটি ষোলো-সতেরো বছরের মেয়ে। যুবকদের পরোণে খাকী সার্ট ও প্যান্ট এবং প্রত্যেকেরই হাতে একটি করে বন্দুক।

এ-অঞ্চলের ম্যাজিষ্ট্রেট মিঃ সেনের পুত্র অমিয় আজ তার তিন পতিথিবন্দুর সঙ্গে পাখী-শিকারে বেরিয়েছে। তার বোন শীলাও আরদার

রে তাদের সঙ্গে এসেছে। সারাদিন বনে-জঙ্গলে ঘুরে এখন তারা ভী ফিরছে।

অমিয়ের বন্ধু পরেশ বললে, “অমি, গতিক সুবিধের মনে হচ্ছে না। উঠল ব’লে! কাছে কোথাও লোকালয় নেই।”

অমিয় গাড়ী চালাচ্ছিল। সে জবাব না দিয়ে গাড়ীর গতি ড়িয়ে দিলে।

নিশীথ বললে, “অমি, যতই ‘স্পীড’ বাড়াও, আজকের এই বড়কে তুমি ছুতেই হারাতে পারবে না। ঐ দেখ, আকাশের শেষ-আলোও নিবে গেল।”

শীলা আমোদ-ভরে গাড়ীর গদীর উপরে ব’সে ব’সেই নেচে উঠে ললে, “ওহো, কী মজা! বন-জঙ্গলের ভিতরে থেকে আমি কখনো ষ্ দেখি নি! ভাগ্যিস আজ দাদার সঙ্গে এসেছি!”

পরেশ ও নিশীথ হাসিমুখে শীলার দিকে তাকালে। বনে-জঙ্গলে ষ্ যে কি ভয়ানক, শীলা যদি তা জানত!

অমিয় বললে, “পরেশ, আর বড়কে এড়াবার চেষ্টা করা মিছে। ষ্ দেখ, মাঠের ওপারের গাছপালাগুলো ঝাঁপাই ঝুড়ে দিয়েছে।”

কালো আকাশে বজ্র-বিদ্যুতের অভিনয় আরম্ভ হ’ল! শূণ্ণে মেঘপুঞ্জের ষ্লায় দূরে এক তীব্রগতি ধূলোর মেঘ জেগে উঠল! এবং ষ্কাং থেকেই শোনা গেল, বাতাসের মধ্যে ফুটল কেমন এক অশাস্ত প্রলাপ!

নিশীথ তীক্ষ্ণদৃষ্টিতে সামনের দিকে তাকিয়ে বললে, “দূরে লোকালয়ের ষ্ত কি লেখা যাচ্ছে না?”

অমিয় এ-অঞ্চলের পথ-ঘাটের খবর রাখত। সে বললে, “আ ষ্দিকেই যাচ্ছি। ওখানে আলয় আছে বটে, কিন্তু লোক নেই।

## জনশূন্য আলিনগর

পরেশ বললে, “তার মানে ?”

—“ওটা ছোট একটা সহর। অনেক দিন আগে মড়কে ওখানকা বেকীর-ভাগ লোকই মারা পড়ে—বাকি সবাই পালিয়ে যায়, আর ফি আসে নি। ওর নাম আলিনগর। ওখানে এখন জনশূন্য পোড়ে ভাড়া বাড়ী আব ধ্বংসস্তূপ ছাড়া অন্য কিছুই নেই। তবে ওরই মধ্যে কোনখানে হয়তো মাথা গুঁজে আজকের মত ঝড়কে ফাঁকি দিবে পারব।”

পবেশ ও নিশীথ খুসি হয়ে বললে, “ব্যাস, ব্যাস, অল্‌রাইট !”

শীলা কিন্তু কেমন যেন কুঁকড়ে প’ড়ে বললে, “ও দাদা, এই অজকালে আলিনগবে গিয়ে কাজ নেই ! তার চেয়ে মাঠে ঝড়ের ধাক্কা খাওয়া ভালো।”

“অমিয় বিস্মিত স্ববে বললে, “কেন রে শীলা, আলিনগরে যেতে তোরা আপত্তি কিসেব ?”

শীলা বললে, “আমাদের বাবুচ্চির মুখে শুনেচি, আলিনগবে এখন যারা থাকে, তারা মানুষ নয়।”

—“মানুষ নয় ? তুই কি বাঘ, ভালুক, হায়েনার কথা বলচিস্ ?”

—“না দাদা, না ! তারা নাকি মানুষেব মত দেখতে, কিন্তু তারা মানুষ নয়। শুনেচি, তারা দিনে কবরে শুয়ে ঘুমোয়, রাতে বেরিয়ে এসে বেড়িয়ে বেড়ায়।”

তিন বন্ধুতে একসঙ্গে হো-হো করে হেসে উঠল। এই একেলে মানুষগুলির কাণে সেকেলে ভূতের কথা ঠাট্টা-তামাসা ছাড়া আর-কিছুই নয়। আজ শুবি ভূতের গল্প শুনে বড়-জোর সর্কোতুকে সময় কাটানো

লে, কিন্তু তা বিশ্বাস করবে খালি খোকা খুকি আর মূর্খরা! অতএব  
অমিয় বললে, “তুই কি ভূতের কথা বলচিস্? ছিঃ শীলা, এখনো  
তার ও-সব কুসংস্কার আছে?”

কিন্তু শীলা জবাব দেবার আগেই ঝোড়ো হাওয়া পাগলের মত  
হুক্কর দিয়ে তাদের উপরে লাফিয়ে পড়ল। প্রথম আক্রমণেই সে  
নিশীথের মাথা থেকে টুপী এবং শীলার হাত থেকে রুম্মাল কেড়ে নিয়ে  
ধূলায় ধূলায় চতুর্দিক আচ্ছন্ন করে দিলে! অন্ধকার আকাশে বাজ্  
চ্যাচাতে লাগল হেঁড়ে গলা ফাটিয়ে এবং এখানে-ওখানে মড়-মড় করে  
জ্ব-তিনটে গাছ ভেঙে পড়ল। এক মুহূর্তেই পৃথিবীর রূপ গেল বদলে!

তীক্ষ্ণ ধূলাবৃষ্টির মধ্যে অনেক কষ্টে চোখ কুঁচুকে তাকিয়ে অমিয়  
‘হেডলাইট’ জ্বলে দেখলে, খানিক তফাতেই ভাঞ্জ মসজিদের মত একখানা  
সাদা বাড়ী দেখা যাচ্ছে!

তীরের মত গাড়ী ছুটিয়ে সেইখানে গিয়ে থেমে প’ড়ে অমিয় বললে,  
“পরেশ, নিশীথ! শীলাকে নিয়ে শীগগির নেমে পড়! ঐ মসজিদে  
গিয়ে ঢোকো!”

মসজিদের একদিক ভেঙে পড়েছে, কিন্তু আর-একটা অংশ তখনো  
কোন গতিকে দাঁড়িয়ে আছে! সকলে তাড়াতাড়ি সেই অংশে গিয়েই  
আশ্রয় নিলে।

বাইরে তখন যে কাণ্ড হচ্ছে, ভাষায় তা বুঝানো যায় না! কষ্ট-  
পাথরের মত কালো নিরেট অন্ধকারে পৃথিবীকে কাণা করে ক্ষাণা  
বাড় আজ যেন বিশ্ব লুণ্ঠন করতে চায়! দিকে দিকে বিদ্যুতের শত  
শব্দ আগুন-সাপ লেলিয়ে দিয়ে, বজ্রভেরীতে মৃত্যু-রাগ পূর্ণ করে এবং



## জনশূন্য আলিনগর

অরণ্যের যন্ত্রণা-ভরা ছটফটানি শুনে বিপুল অট্টহাসি হেসে চলতে লাগল প্রলয়-আনন্দে বঙ্ধার তাণ্ডব ।

পরেশ সভয়ে বললে, “অমি, এ ভাঙা মস্জিদ থর্-থর্ ক’রে কাঁপচে মাথার ওপরে ভেঙে পড়বে না তো ?”

শীলাকে নিজের আরো কাছে টেনে এনে অমিয় নাচার ভাবে বললে “ভেঙে পড়লেও উপায় কি ?”

শীলা কাতর ভাবে বললে, “ও দাদা, চল, আমরা বাইরে পালিয়ে যাই !”

—“পাগল ! বাইরে গেলে ঝড়ে উড়ে যাবি !”

প্রায় আধঘণ্টা পরে ঝড়ের বেগ কিছু ক’মে এল বটে, কিন্তু ঝম্-ঝম্ ঝম্-ঝম্ ক’রে বিষম ঝড়ি শুরু হ’ল ! মস্জিদের একটা দরজা-জান্নান্না পাল্লা ছিল না, বেগবান হাওয়ার ঝটকায় ছ-ছ ক’রে ভিতরেও জ্ব টুকতে লাগল ।

নিশীথ বললে, “অমি, গাড়ী থেকে টর্চ্ টা এনেচ ?”

—“এনেচি । কেন ?”

—“একবার জ্বলে দেখ তো, কোন্দিকে শুকনো ঠাই আছে ? অন্ধকারে আমার পা বাড়াতে ভয় হচ্ছে, যদি সাপ-টাপ্ কিছু থাকে !”

টর্চ্ টা জ্বলে একদিকে আলোর রেখা ফেলেই অমিয় চম্কে উঠল এব সঙ্গে সঙ্গে শীলা প্রায় কান্নার স্বরে ব’লে উঠল, “ও কে দাদা, ও কে ?”

প্রকাণ্ড ঘরের আধখানা ছাদ ভেঙে পড়েছে, এবং মেঝের উপরে স্তূপের মত জ’মে রয়েছে ভাঙা টালি, ইট, বালি-সুরকির চাঙড়, কড়ি ও বরগা প্রভৃতি । তারই ভিতরে পাথরের মস্ত পুতুলের মত স্থির ভাবে দুই হাঁটুর উপরে মুখ রেখে স্তব্ধ হয়ে ব’সে আছে অদ্ভুত এক মানুষের মর্কি !

## মানুষ-পিশাচ

। দীর্ঘ, ঘোর কৃষ্ণবর্ণ দেহ, লম্বা লম্বা চুল মাথা থেকে কাঁধ পর্য্যন্ত ঝুলে  
ডেছে, গৌফ-দাড়ী কামানো, পবোণে একটা কালো 'ওভারকোট' ও চিলে  
জের! কিন্তু তাব চোখছুটো! মোটবেব 'হেডলাইটে'র মত সেই ছুই  
কু তীব্র দীপ্তিতে এমন উজ্জ্বল যে, তাদের দিকে তাকাতেও কষ্ট হয়! তার  
গালো পোষাক আর কালো মুখ কালো অন্ধকাবে মিশিয়ে প্রায় অস্পষ্ট  
য়ে আছে, কিন্তু অস্বাভাবিক ভাবে স্পষ্ট হয়ে উঠে তাব সেই চোখ ছুটো  
। পার্থিব বিভীষিকা সৃষ্টি কবেছে! দেখলেই বুকব কাছটা ধড়ফড়  
রতে থাকে!

অমিয় অত্যন্ত বিস্মিত হয়ে কক্ষ স্বরে জিজ্ঞাসা কবলে, “কে তুমি?”

গম্ভীর স্ববে মূর্ত্তি বললে, “বাহী।”

—“তোমার নাম কি?”

—“আমি রাহী, এই পরিচয়ই যথেষ্ট।”

—“এখানে কেন?”

—“যেজন্তো তোমরা এখানে এসেচ, আমিও সেইজন্তোই এখানে!”

—“এতক্ষণ সাড়া দাও নি কেন?”

—“দরকার হয়নি ব'লে দিই নি।”

। অমিয় টর্চ্ নিবিঘে ফেললে, চারিদিক আবার অন্ধকার। কিন্তু সকলের  
মনে হ'তে লাগল, সেই অন্ধকারের ভিতর হ'তে অপরিচিত মূর্ত্তির চোখছুটো  
যেন থেকে থেকে আগুনের ফিন্‌কি ছড়িয়ে দিচ্ছে!

। অমিয়কে ছুইহাতে জড়িয়ে ধ'রে শীলা ভয়ার্ত্ত স্ববে চুপিচুপি বললে,  
‘দাদা, শীগ'গির এখান থেকে বেরিয়ে চল, নইলে আমি হয়তো অজ্ঞান  
হয়ে যাব!’

## জনশূন্য আলিনগর



শীলা প্রায় কান্নার স্বরে ব'লে উঠল, “ও কে দাদা, ও কে ?”

## মানুষ-পিশাচ

পরেশ ও নিশীথও বিস্ময়ে অভিভূত হয়ে প'ড়েছিল। এতক্ষণ পরে পরেশ বললে, “অসি, এখানে দাঁড়িয়েও যখন ভিজ্জতে হচ্ছে, তখন গাড়ীতে গিয়ে বসাই ভালো।”

বাইরে তখনো জাঁধার-রাত্রির বুকে মাথা ঠুকে ঝড় চাঁচাচ্ছে গৌ-গৌ-গৌ-গৌ, গাছেরা পরস্পরের গায়ে আছড়ে প'ড়ে কেঁদে ক'কিয়ে বলছে ম্-ম্-ম্-ম্-ম্- এবং শূন্তের অসীম সাগর উচ্লে জলের ধারা ঝরছে ম্-ম্-ম্-ম্-ম্-!

অমিয় কাণ পেতে শুনে বুঝলে পাহাড়ে-পথের উপর দিয়েও কল-কল করে জলস্রোত ছুটছে! এ পথে মোটর চালানো এখন মোটেই নিরাপদ নয় বটে, কিন্তু এই ভাঙা মসজিদের ফুটো ছাদের তলায় অন্ধকারে ঐ বিচিত্র শূঙ্গির সঙ্গে এখানে থাকতে তারও আর ইচ্ছা হ'ল না। সে শীলার হাত চপে ধ'রে বললে, “চল, আমরা গাড়ীতেই গিয়ে বসি।”

অন্ধকারের ভিতরে একটা অস্ফুট শব্দ হ'ল—কে যেন চাপা গলায় হাসলে!

অমিয়ার ভয়ানক রাগ হ'ল,—তারা ভয় পেয়ে পালাচ্ছে ভেবে ঐ লোকটা কি ঠাট্টার হাসি হাসছে? কিন্তু শীলার কথা ভেবে রাগ সামলে সে একেবারে বাইরে গিয়ে দাঁড়াল।

শীলা বললে, “তখনি বলেছিলুম দাদা, এখানে এস না!”

অমিয় জোর ক'রে হেসে বললে, “আরে গেল, তুই কি ভেবেচিস্ ও-লোকটা ভূত?”

শীলা বললে, “ও ভূত কিনা জানিনা, কিন্তু ওকে দেখে আমার বুকের রক্ত শুকিয়ে যাচ্ছিল!”

## জনশূন্য আলিনগর

—“তোমর সব-তাতেই বাড়াবাড়ি ! নে, এখন গাড়ীতে উঠে বোস্ !”

. গাড়ীর উপরে উঠে ধুপ্ ক’রে ব’সে প’ড়ে শীলা বললে, “শীগুচি ‘স্টার্ট’ দাও দাদা, এখানে আর আধ-মিনিটও নয়।”

পরেশ ও নিশীথও গাড়ীর উপরে গিয়ে বসল। অমিয় ‘স্টার্ট’ দি গাড়ীতে উঠল।

কিন্তু পথ তখন ছোটখাটো একটা নদীতে পরিণত হয়েছে—প্র হাঁটু-ভোর জল সশব্দে ছুটে চলেছে। এ-পথে কেমন ক’রে গাড়ী চালাতে তাই ভাবতে ভাবতে অমিয় ‘হেড্-লাইট্’টা জ্বলে দিলে !

কিন্তু ওরা আবার কে ? ‘হেড্-লাইট্’র জোর-আলো স্মুখের পা পড়তেই দেখা গেল, পাশাপাশি ছয়জন লোক গাড়ীর দিকেই পায়ে পা এগিয়ে আসছে !

পরিত্যক্ত আলিনগর, দিনের বেলাতেই সেখানে মানুষের দেখা মেলে ন কিন্তু আজ সন্ধ্যার পর ঘুট্‌ঘুটে অন্ধকারে, জলে ঝড়ে ছুর্যোগে ধ্বংস-স্বূপে মধ্যে কারা এরা ? এই কি পথে বেড়ানোর সময় ?

শীলা, পরেশ ও নিশীথ তাদের দিকে হতভয়ের মত তাকিয়ে রইল !

পাশের জঙ্গল থেকে কতগুলো শেয়াল সমস্ববে কেঁদে উঠল ! যে তারা এদের চেনে, যেন তারা এদের ভয় করে, যেন তারা পৃথিবীর জীবদে সাবধান ক’রে দিচ্ছে !

অমিয় ঘন ঘন মোটরের ‘হর্ণ্’ বাজাতে লাগল।

কিন্তু তারা যেন গুনতে পোলে না,—তালে তালে যেন মেপে মেপে প ফেলে সমান এগিয়ে আসছে—যেন সব দম-দেওয়া কলের মূর্তি ! প্রত্যেকে পরোপে সাদা কাপড়, প্রত্যেকের দেহের উপর-দিকটা আড়ষ্ট এবং প্রত্যেকে

## মানুষ-পিশাচ

টো পক্ষাঘাতগ্রস্ত রোগীর হাতের মত ছুপাশে স্থির ভাবে বুলছে,—  
গছে কেবল তাদের পাগুলো !

| সেই জলে-ঝড়ে অমিয়ের দেহ ঘেমে উঠল, চেষ্টিয়ে বললে, “কে তোমবা ?  
‘মার ‘হর্গ’ শুনতে পাচ্চ না ? স’রে যাও—নইলে মরবে !”

| তানা কেউ সাড়া দিলে না, পথ জুড়ে তালে তালে গাড়ীর দিকে এগিয়ে  
সতে লাগল। যেন তারা থামতে জানে না, যেন কার অভিশাপ তাদের  
ছুতেই থামতে দেয় না, যন্ত্র-চালিতের মত তাদের যেন চলতেই হবে  
রা পৃথিবীর মাটি মাড়িয়ে অনন্ত—অনন্ত কাল ধ’রে !

| অমিয় বললে, “ডাকাত নয় তো ? পবেশ ! নিশীথ ! বন্দুক নাও !”  
সকলে আপন আপন বন্দুক তুলে নিলে। তবু যারা আসছে তারা  
মল না, ভয়ও পেলো না !

| অমিয় চেঁচিয়ে বললে, “আব এক পা এগুলেই গুলি করব !”

ধুপ্ ধুপ্ ধুপ্ করে পায়ের শব্দ তুলে মূর্ত্তিগুলো আরো কাছে এসে  
ল।

অমিয় মহা কাঁপবে প’ড়ে ভাবতে লাগল—কারা এরা ? ডাকাত, না  
গল ? না এরা ভাবছে যে বন্দুক ছুঁড়ব ব’লে আমরা ঠাট্টা করছি ?  
কিন্তু আর তো ওদের কাছে আসতে দেওয়া উচিত নয়, গাড়ীতে শীলা  
য়েছে, কোন বিপদ হ’লে বাড়ীতে গিয়ে মুখ দেখাব কেমন ক’রে ? যা হয়  
হান্, আমার কথানা শুনলে এবারে আমি বন্দুক ছুঁড়বই !

সে আবার শুক স্বরে চেঁচিয়ে বললে,—“এই শেষবার বলছি, পথ  
হুড়ে দাও !”

‘তার সমান এগিয়ে আসছে, আসছে, আর আসছেই ! ‘হেড্-লাইটে’র

## জনশূন্য আলিনগর

তীব্র আলোকে তাদের কক্ষ চুল ও বিক্ষারিত স্থির চক্ষের পাতা পর্যায়স্পষ্ট দেখা যাচ্ছে! ছয়জোড়া নিস্পলক চক্ষের পূর্ণদৃষ্টি অমিয়দেব দিগ্ভ্রমস্থি হয়ে আছে—প্রত্যেক চোখ যেন মড়ার চোখ!

তিনজনেই বন্দুক তুলে লক্ষ্য স্থির করলে। মূর্ত্তিগুলো যখন গাড়ী কাছ থেকে হাত-দশ-বাবো তফাতে এসে পড়েছে, অমিয় তখন বললে, “আতিন গুলেই তোমবা বন্দুক ছুঁড়ে!”

তবু তারা থামল না!

—“এক!”

—“দুই!” .....

—“তিন!”

গুডুম্, গুডুম্, গুডুম্! তিনজনেই বুঝলে, তাদের লক্ষ্য ভুল হয় নি—এত কাছ থেকে ভুল হ’তেই পারে না, কিন্তু তবু সেই মূর্ত্তিগুলো তাতালে পা ফেলে এগিয়ে আর এগিয়ে আর এগিয়ে আসতে লাগল!

কী অসম্ভব ব্যাপার!

আচম্বিতে ভাঙা মসজিদের ভিতর থেকে হা-হা-হা-হা ক’রে কে বপশুর কণ্ঠে মানুষ্যেব স্ববে ভয়াবহ অটুহাসি হাসতে লাগল।

শীলা আর্ত্বনাদ ক’রে অজ্ঞান হয়ে গদীর উপরে লুটিয়ে পড়ল!



## দ্বিতীয় পরিচ্ছেদ

মরা মানুষের জ্যান্তো চোখ

—“দিনে দিনে হ'ল কি ? তুনিয়ায় বড় বড় সাধুর অভাব হয়েছে অনেক নই। আজকাল আবার বড় অসাধুরও খোঁজ পাওয়া যাচ্ছে না! পুলিশ-গার্টের রিপোর্ট দেখাচি খালি কতগুলো গাঁটকাটা আর ছিঁছে-চোরের ভিহাস! ছত্তোর, খবরের নিকুচি কবেচে!”—এই ব'লে জয়ন্ত খবরের গজ্ঞথানা সজোরে মাটির উপরে ছুঁড়ে ফেলে দিলে।

মাণিক কফি তৈরি করতে করতে বললে, “সহরে বড় বড় চোর-ডাকাত-ন নেই, এটা তো পুলিশের কৃতিত্বের পবিচয়! এজন্তে আমাদের সুন্দর বুও অনায়াসে বাহাহুরির দাবি করতে পারেন!”

—“কিন্তু চুরি ডাকাতি খুন-খারাপি না থাকলে পুলিশেরও চাকরি থাকবে, আর আমাদেরও পেটের ভাত হজম হবে না!”

মাণিক কফির পিয়লা জয়ন্তের সামনে এগিয়ে দিলে।

পিয়লায় একটা চুমুক দিয়ে জয়ন্ত বললে, “কেবল তাই নয়। অপরাধীর ভাবে কোন কোন দেশে পুলিশের অত্যন্ত হুর্দশাও হয়! যুরোপের একটা হরে চোবেরা একবার ধর্মঘট করেছিল তা জানো?”

মাণিক আশ্চর্য হয়ে বললে, “কি-রকম? চোরদের ধর্মঘট? এ যে চহের পক্ষে মুস্ত-বড় সুখবর!”

—“হ্যাঁ, গৃহস্থেব পক্ষে। কিন্তু যে সহরের কথা বলচি, সেখানকার গ্লিস এটা সুখবর ব'লে মনে করে নি! সহর-বাসীরা হঠাৎ একদিন সকালে ঠে-দেখলে, রাস্তায় রাস্তায় দেয়ালের গায়ে এই বিজ্ঞাপন: ‘চুরি-ব্যবসায় অচল



## মরা মানুষের জ্যাশো চোখ

হইয়া পড়িয়াছে ! পুলিশ এত-বেশী ঘুষ দাবি করে যে, চোরাই মাল বেচিয় আমাদের আর কোন লাভ থাকে না ! পুলিশের এই অত্যাচার দাবির বিরুদ্ধে প্রবল প্রতিবাদ করিবার জন্ত এই নগরের চোর-সম্প্রদায় অল্প হইবে চৌধ্যবৃত্তি পরিত্যাগ করিল !”

— “তাবপব ?”

— “তাবপব আব কি ! ছু-চারদিন পবেই সেখানকাব পুলিশ মানতে বাধ্য হ'ল যে, অতঃপব চোবেদের কাছ থেকে আর অত-বেশী ঘুষ দাবি করবে না তখন চোবেবা আবাব ধর্মঘট বন্ধ করলে !”

এমন সময়ে পাথের শব্দে বাড়ী কাঁপিয়ে এবং সুবিপুল ভুঁড়ি ছলিবে ইন্স্পেক্টাব সুন্দরবাবু ঘরের ভিতরে প্রবেশ কবলেন । এদিকে ওদিকে নিক্ষেপ ক'রে হতাশ ভাবে বললেন, “এই যে, চা খাওয়া হয়ে গেছে দেখচি

জয়ন্ত বললে, “না, আমরা এইমাত্র কফি শেষ করলুম !”

সুন্দরবাবু বললেন, “হুম্ । কফি ? এই গরমে ? ওরে বাপু, তোমাদের মাথা খাবাপ হয়ে গেছে ! একশো টাকা বখসিস্ দিলেও আমি এখন এ কাপ্ কফি খাব না !”

জয়ন্ত বললে, “একশো টাকা বা কফির কাপ্ কিছুই আপনার ভাণে নেই । আপনার জন্তে এখনি এক পিয়লা চা আসবে !”

— “আর টোষ্ট, ডিম, জ্যাম্ !”

— “তাও আসবে । আপনি নির্ভয়ে চেয়ারে ব'সে পড়ুন !”

ইতিমধ্যে মাণিক খবরের কাগজখানা কখন মাটি থেকে তুলে নিয়ে পড়তে সুরু ক'রে দিয়েছে । সে বললে, “জয়, তুমি কি আজকের কাগজখানা ভাঙে ক'রে পড়ো নি ?”

—“না, পুলিশ-কোর্টের কলম ছাড়া আর কিছু আমি দেখিনি।”

—“চট্টগ্রাম থেকে এদের নিজস্ব সংবাদদাতা কি লিখেচে জানো?”

—“না।”

—“শোনো তাহ’লে” ব’লে মাণিক পড়তে আরম্ভ করলে :

“বিভীষণ বিভীষিকা !

রহস্যময় মেয়ে-চুরি !

পার্বত্য চট্টগ্রামের চতুর্দিকস্থ গ্রামে গ্রামে ভীষণ বিভীষিকার সঞ্চার  
হইয়াছে ! মাসাধিক কালের মধ্যে এখানে তিনটি বিভিন্ন পরিবারের তিনটি  
মেয়েকে কে বা কাহারা চুরি করিয়া লইয়া গিয়াছে।

আসল ব্যাপাব কিছুই বুঝা যাইতেছে না। এমন অদ্ভুত কাণ্ড এ-অঞ্চলে  
যার কখনও হয় নাই। পুলিশ প্রাণপণ চেষ্টা করিতেছে বটে, কিন্তু যে-  
চমিরে সেই তিমিরেই পড়িয়া আছে।

প্রথম ঘটনাটি এই : বীরনগর গ্রামের মধুসূদন কর্মকারের বড় মেয়ে প্রমদা  
ক্যার সময়ে গ্রামের প্রান্তে পুষ্করিণীতে কাপড় কাঁচতে গিয়াছিল। কিন্তু  
আর ফিরিয়া আসে নাই। প্রথমে সবাই ভাবিয়াছিল, সে জলে ডুবিয়া  
গিয়াছে। কিন্তু পুষ্করিণীর তলা পর্য্যন্ত তন্ন তন্ন করিয়া খুঁজিয়াও তাহার  
হ পাওয়া যায় নাই। প্রমদার বয়স পনেরো বৎসর মাত্র। সবে গত মাসে  
তাহার বিবাহ হইয়াছে।

দ্বিতীয় ঘটনার বিবরণ : বীরনগর হইতে দশ মাইল তফাতে চণ্ডীপুর।  
মুকু পঞ্চানন চৌধুরী এখানকার একজন বিশিষ্ট গৃহস্থ। তাঁহার দৌহিত্রীর  
নাম কুমারী কমলা দেবী, বয়স ষোলো বৎসর। এক রাত্রে গুমোট গরমে  
হইতেছিল না বলিয়া কমলা বাহিরের বারান্দায় আসিয়া শয়ন করে।

## মরা মানুষের জ্যাশো চোখ

৯

শেষ-রাতে হঠাৎ কমলার ভীত চীৎকারে বাড়ীর আর সকলের ঘুম ভাঙিয়া যায় ! কমলার পিতা ও পঞ্চাননবাবু প্রভৃতি বারান্দায় ছুটিয়া আসেন । কিন্তু কমলা তখন অদৃশ্য হইয়াছে !

পুলিসের তদন্তে আর একটি অদ্ভুত বিষয় প্রকাশ পাইয়াছে । বাড়ীর সকলে যখন কমলার জন্ম খোঁজাখুঁজি ও ছুটাছুটি করিতেছিলেন, তখন গ্রামের পথ হইতে কে নাকি ভয়াবহ অট্টহাস্য করিয়া উঠিয়াছিল ! সেদিন অমাবস্যা রাত্রি ছিল, সকলে অন্ধকারে পথে ছুটিয়া যায়, কিন্তু কাহাকেও দেখিতে পাই নাই । কেবল এক আশ্চর্য্য শব্দ শোনা যায় । অনেকগুলো লোক যেন একসঙ্গে সৈন্যদলের মত সমতালে সশব্দে পা ফেলিয়া ক্রমেই দূরে চলিয়া যাইতেছে !

তৃতীয় ঘটনা ঘটিয়াছে মাত্র দুই দিন আগে । ডিষ্ট্রিক্ট ম্যাজিস্ট্রেট মিঃ আর,এন, সেনের একমাত্র বন্যা কুমারী শীলা তাঁহার ভ্রাতা মিঃ অমিয় সেনের সঙ্গে শিকার দেখিতে গিয়াছিলেন । পোড়ো সহর আলিনগরের কাছে কাহারো নাকি আক্রমণ করিয়া কুমারী শীলাকে লইয়া পলাইয়া গিয়াছে । এ ঘটনার বিস্তারিত বিবরণ এখনো প্রকাশ পায় নাই, যথাসময়ে আমরা সব কথা জানাইব ।

এখন প্রশ্ন হইতেছে, একালে ইংরেজ-রাজত্বের কোন জায়গায় উপর-উপরি এমন তিন-তিনটি ঘটনা ঘটা সম্ভবপর কিনা ? যদি সম্ভবপর বলিয়া স্বীকার করিতেই হয়, তবে অনর্থক এই বিপুল পুলিশ-বাহিনী পুষ্টি লাভ কি ? যেখানে ম্যাজিস্ট্রেটের কন্যা পর্য্যন্ত চুরি যায়, সেখানে সাধারণ দরিদ্র প্রজার কাহার মুখ চাহিয়া বাস করিবে ? আমরা পুলিশের এই অকর্মণ্যতার দিকে গভর্মেন্টের দৃষ্টি আকর্ষণ করিতেছি ।”

টনস্পেক্টার সুন্দরবাবু শুনতে শুনতে মুখগহ্বরে আধখানা ‘টোষ্ট’ নিক্ষেপ করতে উদ্বৃত্ত হয়েছিলেন। কিন্তু পুলিশের বিরুদ্ধে অভিযোগ শুনে তাঁর মার ‘টোষ্ট’ খাওয়া হ’ল না, তিনি চ’টে-মটে ব’লে উঠলেন, “হুম্। যত দাঘ নন্দ ঘোষ! যেখানে যা-কিছু ছুঁতনি! ঘটবে তার জন্তে দায়ী হচ্ছি আমরাই!”

জয়ন্ত জবাব দিলে না, নীরবে নশ্বদানী বাব ক’রে এক টিপ নশ্ব নিলে। সুন্দরবাবু বললেন, “সব ব্যাপারগুলোই আজগুবি! চোরেরা যে চুরি করতে এসে অট্টহাসি হাসে আর গোরাদের মত তালে তালে পা ফেলে চলে, আমার এতখানি বয়সে এটা এই প্রথম শুনলুম! তারা তো উদয়শঙ্করের মত তালে তালে নাচতে নাচতে পালালেও পালাতে পারত!”

বেয়ারা ঘরে ঢুকে বললে, “একজন সায়েব বাবু ডাকচেন!”

জয়ন্ত বললে, “এখানে নিয়ে এস।”

সুন্দরবাবু বললেন, “সায়েব বাবু আবার কি জীব?”

—“আমাদেব বেয়ারা বিলাতী পোষাকে বাঙালীকে ঐ নামে ডাকে।”

ঘরের ভিতরে এসে দাঁড়াল একটি তরুণ যুবক। তার পরোণের বিলাতী পোষাক ইঞ্জিহীন, এলোমেলো; মাথায় টুপী নেই—ব্যাণ্ডেজ বাঁধা, চক্ষের দৃষ্টি উদ্ভ্রান্ত। দেখলেই মনে হয় সে যেন অত্যন্ত চিন্তিত ও বিপদগ্রস্ত!

জয়ন্ত সুধোলে, “আপনি কাঁকে চান?”

—“জয়ন্তবাবুকে। আমি ভয়ানক বিপদে প’ড়ে ছুটে এসেছি—”

—“আমারই নাম জয়ন্ত। আপনার নাম জানতে পারি কি?”

—“আমার নাম অমিয় সেন, আমি চট্টগ্রাম থেকে আসছি।”

• জয়ন্ত তাড়াতাড়ি একখানা চেয়ার এগিয়ে দিয়ে বললে, “বসুন। খবরের

মরা মানুষের জ্যাশো চোখ



আমি ভয়ানক বিপদে প'ড়ে ছুটে এসেছি...

কাগজে বোধহয় এইমাত্র আপনারই নাম দেখেচি। আপনি তো চট্টগ্রামের ডিষ্ট্রিক্ট ম্যাজিস্ট্রেট মিঃ আর, এন, সেনের পুত্র ?”

অমিয় চেয়ারে বসে প’ড়ে বললে, “আজ্ঞে হ্যাঁ। ব্যাপারটা যখন আগেই শুনেচেন তখন আমি যে কেন এখানে এসেচি, সেটাও বোধহয় বুঝতে পেরেচেন ?”

—“আপনার ভগ্নীকে আপনি উদ্ধার করতে চান ?”

—“আজ্ঞে হ্যাঁ। আমি প্রতিজ্ঞা করেছি, শীলাকে উদ্ধার না করে বাবার কাছে আর মুখ দেখাব না !”

—“তাহ’লে আগে সমস্ত ঘটনা আমাদের কাছে খুলে বলুন।”

অমিয় খানিকক্ষণ চুপ ক’রে রইল। তারপর ধীরে ধীরে বললে, “কিন্তু সব শুনে আপনি হয়তো আমাকে পাগল বা মিথ্যাবাদী ব’লে মনে করবেন।”

—“কেন ?”

—“সমস্ত ঘটনাটাই এমন অসম্ভব যে আমার বাবাও আমার কথা বিশ্বাস করেন নি। অথচ আমার প্রত্যেক কথাই সত্য।”

—“হোক্ অসম্ভব, তবু কোন কথাই আপনি যেন গোপন করবেন না। কিছু লুকোলে আমি আপনার কোন উপকারেই লাগব না, এইটুকু খালি দয়া ক’রে মনে রাখবেন।”

অমিয় তার কাহিনী বলতে লাগল। সে যা বললে তার অধিকাংশই আমরা প্রথম পরিচ্ছেদে বর্ণনা ক’বেছি—গাড়ীর উপরে শীলার মুচ্ছিত হয়ে প’ড়ে যাওয়া পর্য্যন্ত। অতএব এখানে অমিয়ের কথার শেষ-অংশ মাত্র দেওয়া হ’ল :

“ওদিকে ভাণ্ডা মসজিদের ভিতর থেকে সেই অমানুষী হাসি, এদিকে

বন্দুকের গুলিতে আহত হয়েও নির্বিকারে মত সেই ছয়টা আড্ডট দেহ একেবারে আমাদের গাড়ীর কাছে এসে পড়েছে, আমাব পাশেই শীলার মুচ্ছিত দেহ প'ড়ে বয়েছে, চাবিদিকে ঝোড়ো হাওয়াব প্রচণ্ড নিঃশ্বাস, বৃষ্টির ঝব-ঝব কান্না, মাথার উপরে আকাশ ঘন ঘন জ্বালাছে বিছ্যাৎ-চক্‌মকির ফিন্‌কি ! আমি যেন কেমন আচ্ছন্নব মতন হয়ে গেলুম এবং সেই অবস্থাতেই বুঝতে পাবলুম, পবেশ ও নিশীথও গাড়ীব ভিতবে অজ্ঞান হয়ে পড়ল !

গাড়ীব সাম্নে এসে মূর্ত্তিগুলো থম্‌কে দাঁড়িয়ে পড়ল । সেই সময়ে তাদের চোখগুলো দেখে আমার বুক শিউবে উঠল । মবা মানুষ তাকিয়ে দেখলে বোধ কবি তাদের দৃষ্টিও এইবকম দেখতে হয় ! সে চোখগুলো যেন তাকিয়ে আছে মাত্র, কিন্তু তাদের ভিতরে কোন ভাবেরই আভাস নেই এবং তাবা চোখ খুলে তাকিয়েও যেন কিছুই দেখতে পাচ্ছে না !

মূর্ত্তিগুলো হঠাৎ ছুই ভাগে বিভক্ত হয়ে গেল । তিনজন এল গাড়ীর বাঁ-পাশে, আব তিনজন এল ডান-পাশে । সঙ্গে সঙ্গে 'হেড-লাইটের আলোক-বেখা ছাড়িয়ে তাদের দেহগুলো ঘুট্‌ঘুটে অন্ধকারে মিলিয়ে গেল ।

তারপর আমি কি কবব না-কবব ভাবতে-না-ভাবতেই আচম্বিতে ছুখানা বিঘম-কঠিন হাত আমার কোমর জড়িয়ে ধবলে ! সে-হাতছুখানা কেবল কঠিন নয়, কী অস্বাভাবিক ঠাণ্ডা ! যেন ববফে গড়া ! আমি প্রাণপণে বাধা দিয়েও তাদের ঠেকাতে পারলুম না, হাতছুখানা আমাকে একটানে শূণ্ণে তুলে ধ'বে ছুঁড়ে ফেলে দিলে,—মাটিতে প'ড়ে মাথায় চোট লেগে আমিও তখন অজ্ঞান হয়ে গেলুম এবং অজ্ঞান হ'য়ে যেতে যেতে আবাব শুনতে পেলুম সেই অমানুষী হাহাহাহা হাসি ।

যখন জ্ঞান হ'ল তখন মেঘলা আকাশে ঝাপসা ভোরের আলো ফুটে ওঠবার চেষ্টা করছে।

গাড়ীর 'হুডে'র উপরে মাথা রেখে পরেশ ও নিশীথ অভিভূতের মত পড়ে রয়েছে।

আমি পাগলের মত গাড়ীর কাছে ছুটে গিয়ে ডাকলুম, “শীলা! শীলা!”  
পরেশ ক্ষীণ স্বরে বললে, “শীলা নেই!”

আমার কথা আর বেশী বাড়াব না। কেবল এইটুকু জেনে রাখুন, প্রায় বৈকাল পর্য্যন্ত আমরা তিনজননে আলিনগরের সমস্তটা তন্ন তন্ন করে খুঁজে দেখলুম। কিন্তু পেলুম খালি পোড়ো-বাড়ীর পর পোড়ো-বাড়ী, ধ্বংসস্থলের পর ধ্বংসস্থল—সেখানে কোথায় শীলা, কোথায় সেই ছয়টা অস্তুত মূর্তি, আর কোথায় ভাঙা-মসজিদে-দেখা সেই ঘোর-কালো লম্বা লোকটা! কারুর কোন চিহ্নই নেই।

কি-রকম মন নিয়ে বাড়ীতে ফিরে এলুম, আর সমস্ত স্তনে মা ও বাবার অবস্থাই বা হ'ল কি-রকম, এখানে সে-সব কথাও বলবার দরকার নেই।

নিশীথ আপনার শক্তির কথা জানে। সেই-ই আমাকে পরামর্শ দিলে, আপনার কাছে আসতে। তখনি আহত দেহে চট্টগ্রাম থেকে আপনার কাছে চ'লে এসেছি! জয়ন্তবাবু, এখন আপনার সাহায্যই আমার শেষ ভরসা!”

অমিয় স্তরু হ'ল, জয়ন্ত গম্ভীর মুখে বার বার নশ্চ নিতে লাগল।

মাণিক খবরের কাগজখানা নিয়ে আর-একবার পড়তে বসল।

খানিক পরে এই নীরবতা সহিতে না পেরে সন্দরবাবু ব'লে উঠলেন,  
“হুম্। মিঃ সেন, আপনি যা বললেন তার কিনারা করা জয়ন্ত বা পুলিশের  
-কাজ নয়!”



অমিয় করুণ স্বরে বললে, “তবে আমার কি হবে ?”

—“যা শুনলুম তা যদি পাগলের প্রলাপ না হয়, তাহ’লে রীতিমত ভৌতিক ব্যাপার বলেই মানতে হয়! জয়ন্ত কি পুলিশ, ভূত ধরতে পারবে না, আপনি কোন ভালো রোজার খোঁজ করুন। আপনার বোনকে ছুতে উড়িয়ে নিয়ে গিয়েচে।”

অমিয় অসহায়ের মতন কাতর ভাবে জয়ন্তের মুখের পানে তাকিয়ে রইল।

জয়ন্ত আর এক টিপ নস্য নিয়ে বললে, “মাগিক, জিনিব-পত্তর সব গুছিয়ে নাও। অমিয়বাবুর সঙ্গে আজই আমরা চট্টগ্রাম যাত্রা করব।”

---

## তৃতীয় পরিচ্ছেদ

### পদচিহ্ন ও গোরস্থান

জনশৃঙ্খ আলিনগর ! চারিধারে ছোট ছোট পাহাড়ের ঢেউ-খেলানো প্রাচীর, বাতাসের ছোঁয়ায় ঐক্যতান-বাজানো বনভূমির শ্রামলিমা, মাঠে মাঠে জলের আল্পনা আঁকতে আঁকতে নদীর রূপালী খেলা, কোথাও ঝাঁকে ঝাঁকে উড়ে যায় বন-মুগুঁরা, কোথাও হঠাৎ শীঘ্ দিয়ে ওঠে অজানা গানের পাখী, কোথাও অনেক দূর থেকে শোনা যায় কার বাঁশীর হারিয়ে-যাওয়া সুর । এরই মধ্যে ঘুমিয়ে নিসাড় হয়ে আছে জনশৃঙ্খ আলিনগর ! পাহাড়ের উপর থেকে তাকে দেখায় একখানি ছবির মত ।

বাড়ীর পর বাড়ী—কোন কোন বাড়ীর বয়সও বেশী নয়, আকারও জীর্ণ নয় । মাঝে মাঝে এক-একখানা বাগান-বাড়ীও চোখে পড়ে—এখনো ছ-চারটে কঠিনপ্রাণ ফুলগাছ অযত্নেও বেঁচে থেকে রং ফুটিয়ে আগেকার গোরবের পরিচয় দেবার ক্ষীণ চেষ্টা করছে !

কিন্তু অধিকাংশ বাড়ীই নীরবে যেন প্রচার করতে চায় ধ্বংস-দেবতার মহিমা ! তাদের দেখলেই মনে পড়ে খণ্ডবিখণ্ড মাংসহীন কঙ্কালকে ! স্থানে স্থানে ধ্বংসস্তূপের জন্তু চলবার পথ পর্যাস্ত বন্ধ হয়ে গেছে । এ যেন কোন অভিশপ্ত পৃথিবীর এক অংশ—মৃত মানুষের স্মৃতি আছে, কিন্তু জ্যান্তো মানুষের দেখা নেই ! মাঝে মাঝে এক-একটা মসজিদ, কিন্তু তাদের ছায়ায় আজ আর কেউ উপাসনা করতে আসে না । থেকে থেকে এক-একটা

ঘুঘুর বিষাদ-মাখা সুর যেন মোন বিজনতার দীর্ঘশ্বাসের মত জেগে উঠেই স্বব হয়ে যাচ্ছে !

জয়ন্ত সারাদিন ধ'রে আজ আলিনগরের জনশূণ্যতার মধ্যে ঘুরে এবং তার সঙ্গে আছে মাণিক, অমিয়, পরেশ, নিশীথ ও সুন্দরবাবু ।

জয়ন্তের সঙ্গে ইন্স্পেক্টার সুন্দরবাবুর এখানে আসবার কোনই দরকা ছিল না । কিন্তু খানিকটা কৌতূহলে প'ড়ে ও খানিকটা এই সুযোগে নৃত্য দেশে বেড়াবার ঝোঁকে সুন্দরবাবুও কিছুদিনের ছুটি নিয়ে জয়ন্ত ও মাণিকে সঙ্গী হয়েছেন ।

সারাদিনে কোথাও উল্লেখযোগ্য কিছুই আবিষ্কার করা গেল না । বৈকালে তারা সহরের প্রান্তে একটা ছোট নদীর ধারে এসে দাঁড়াল ।

সুন্দরবাবু সারাদিনই কাঠ-ফাটা রোদে এমন টো টো করে ছুঁ বেড়ানোর বিকল্পে কঠিন কঠিন মতপ্রকাশ ক'রে আসছিলেন, কিন্তু এইবার তিনি রীতিমত বিদ্রোহ প্রকাশ ক'বে বললেন, “হুম্ ! আমি বাবা আর এ পা নড়ছি না ! তোমাদের খাতিবে প'ড়ে শেষটা কি আত্মহত্যা করব এখানে সদ্দি-গর্শ্বি হ'লে দেখবে কে ?”

জয়ন্ত একবার সুন্দরবাবু দিকে ফিরে তাকালে । মরুভূমিতে মত তাঁর বিপুল টাকের উপব দিয়ে দর-দর ঘামের ধারা নেমে আসছে এ পথশ্রমে তাঁর বিরাট ভুঁড়ি হাপরের মত একবার ফুলে উঠছে ও একবার চূপে যাচ্ছে ! দেখে তার দয়া হ'ল । বললে, “আচ্ছা সুন্দরবাবু, এইবার আমরা খানিকটা বিশ্রাম করতে পারি । আমাদের সহর দেখা শেষ হয়েছে

সুন্দরবাবু উচ্চস্বরে একটি সুদীর্ঘ “আঃ” উচ্চারণ ক'রে নদীতীরের বাঁকি উপরে হাত-পা ছড়িয়ে ব'সে পড়লেন ।

অমিয় বললে, “তাহ’লে এর পরে আমরা কি করব ?”

জয়ন্ত বললে, “আজকের রাতটা আমরা এইখানেই কাটিয়ে দেব।”

সুন্দরবাবু ভয়ানক চমকে উঠে বললেন, “গ্যা, সে কি কথা ? থাকব ললেই তো থাকা হয় না, এখানে থাকব কোথায় ?”

জয়ন্ত বললে, “যদিও আজ চাঁদ উঠবে না, তবু মাথার উপরে আকাশের দোয়া আছে তো ?”

—“যদি রুষ্টি আসে ?”

—“এখানে মাথা গোঁজ্বার জন্তে পোড়ো-বাড়ীর অভাব নেই ! গোটা ছরটাই তো আজ আমাদের দখলে !”

সুন্দরবাবু মাথা নাড়তে নাড়তে বললেন, “আ-হা-হা-হা, ম’রে যাই আর ক’ ! সব ব্যবস্থাই তো ক’রে দিলে দেখছি ! কিন্তু পোড়ো-বাড়ীতে পোড়া পটের অন্ন জোটাতে কে ?”

—“অন্ন আজ আর জুটবে না।”

—“হুম্। মাপ কর ভাই, আমি বিধবা স্ত্রীলোক নই, উপুস-টুপুস আমার ধাতে সহ্য হয় না।”

—“তাহ’লে আপনি বাসায় ফিরে যান।”

—“একলা ?”

—“কাজেই।”

—“হুম্ !” সুন্দরবাবু একবার চারিদিকে তাকিয়ে দেখলেন,—সূর্য্য ঝু-ঝু ! সন্ধ্যা আসি-আসি করছে। রাত-আঁধারে এখানে কী সব কাণ্ড অমিয়ার মুখে তা শুনতে বাকি নেই। একলা এখান থেকে ফেরা অসম্ভব, কারণ সুন্দরবাবু ভূত-পেঙ্গী মানেন। এবং অমিয়ার বোন শীলাকে যে মানুষে

চুরি করেছে, এ-কথাও তিনি বিশ্বাস করেন না। একলা বাসায় ক্ষেত্রবার সময়ে যদি তাদের কারুর সঙ্গে দেখা হয়ে যায়?.....সুন্দরবাবু অত্যন্ত অসময়ে এখন বুঝতে পারলেন যে, এই সব নির্বোধ, গোঁয়ার ছোকরার দলে ভিড়ে তিনিও বুদ্ধিমানের কাজ করেন নি!

জয়ন্ত তাঁর মনের ভাব আন্দাজ করে মুহূ হেসে বললে, “ভয় নেই সুন্দরবাবু, আজ রাতে অন্ন না জুটলেও অল্প কিছু জুটতে পারে।.....নিশীথবাবু, বলুন তো, আপনাদের গাড়ীতে রসদ কি আছে?”

নিশীথ বললে, “এক কাঁদি মর্তমান কলা, ল্যাংড়া আম, সন্দেশ, ছয় ডজন চিকেন-স্মাণ্ডেইচ, কিছু কেক আর কিছু বিস্কুট।”

জয়ন্ত বললে, “অতএব সুন্দরবাবুর আজ উপাস করবার ভয় নেই।”

সুন্দর বাবু অল্প-একটু হেসে বললেন, “তাহ’লে তোমরা এখানে রাত্রিবাস করবার জন্তে তৈরি হয়েই এসেছ?”

—“কতকটা তাই বটে।”

—“এটা আগে আমাকে জানালেই পারতে! এখানে রাত কাটাবার প্রস্তাব আমার ভালো লাগছে না।”

এমন সময়ে মাণিক বললে, “অমিয়বাবু, আপনি না বলেছিলেন, কোন মানুষ এখানে আসতে চায় না?”

—“হ্যাঁ। এ-জায়গাটার বদ-নাম আছে। আর সে বদ-নাম যে মিছে নয়, তারও প্রমাণ আমরা পেয়েছি।”

—“তাহ’লে বালির উপরে এই পায়ের দাগগুলো কিসের?”—ব’লে মাণিক নদীর তীরে অঙ্গুলী নির্দেশ করলে।

জয়ন্ত তাড়াতাড়ি বুকে প’ড়ে দেখতে লাগল।

বালুতে লম্বা পায়ের দাগের সারি,—নদীর জলের দিক থেকে উপরদিকে উঠে এসেছে ! আর সবগুলোই হচ্ছে মানুষের পায়ের দাগ !

জয়ন্ত বললে, “সুন্দরবাবু, আপনি পায়ের দাগ পরীক্ষা করতে জানেন ?”

—“পুলিসে কাজ করি, তা আর জানিনা ?”

—“আমেরিকার ‘রেড-ইণ্ডিয়ান’রা পুলিসে কাজ করে না, কিন্তু পায়ের দাগ দেখে অপরাধী ধরতে তারা যেমন ওস্তাদ, পৃথিবীর কোন বড় ডিটেক্টিভও তেমন নয়। কিন্তু সে-কথা এখন থাক্। আমাদের সামনের এই দাগগুলো দেখে অনেক কথাই বলা যায়।”

—“হুম্। কি বলা যায় শুনি ?”

জয়ন্ত পকেট থেকে গজকাঠি বার ক’রে একমনে দাগগুলো মাপতে লাগল। তারপর বললে, “দাগগুলো যখন এত স্পষ্ট তখন নিশ্চয়ই পুরাণো নয়। হয়তো কালই দাগগুলোর উৎপত্তি হয়েছে। এখান দিয়ে একদল লোক গিয়েছে। সে দলের একজন লোক খুব-বেশী ঢ্যাঙা। বেঁটেদের চেয়ে লম্বা লোকদের পায়ের দাগের মধ্যে ব্যবধান হয় বেশী। দলের একজন লোক খুব মোটা, তাই তার পায়ের দাগ বালির ভিতরে বেশী গভীর হয়ে বসেছে। দলের একজনের ডান পা খোঁড়া—বালির উপরে তার ডান পায়ের আঙুলের চিহ্ন রয়েছে, কিন্তু গোড়ালির চিহ্ন নেই ! এখানে ছয়জন লোকের পায়ের দাগ আছে ! আমি ছয়জোড়া আলাদা আলাদা পায়ের মাপ পেয়েছি। অমিয়বাবু, আপনাদের যারা আক্রমণ করেছিল—”

বিবর্ণমুখে অমিয় ব’লে উঠল, “তাদের দলেও ছয়জন লোক ছিল !”

জয়ন্ত খানিকক্ষণ চুপ ক’রে থেকে বললে, “এগুলো তাদেরই পায়ের

## পদচিহ্ন ও গোরস্থান

দাগ হ'লে বলতে হয়, তাদের ভূত-প্রেত ব'লে সন্দেহ করবার কোন কারণ নেই। তারা ছায়ামূর্তি হ'লে এখানে তাদের পায়ের দাগ পড়ত না।”

পরেশ বললে, “তারা ভূত-প্রেত কিনা জানি না, কিন্তু আমাদের বগুলি খেয়েও তারা যে এগিয়ে এসেছিল, এ-বিষয়ে কোনই সন্দেহ নেই।

মাণিক বললে, “কিন্তু তখন কি আপনাদের মাথার ঠিক ছিল? নিশ্চয় আপনাদের গুলিতে তারা আহত হয় নি।”

নিশীথ বললে, “আমাদের পক্ষে জোর ক'রে কিছু বলা সাজে না, অসম্ভবে কেউ বিশ্বাস করবেই বা কেন? কিন্তু জানবেন, তারা আমাদের এ কাছে ছিল যে অতি-বড় আনাড়ির বন্দুকের গুলিও ব্যর্থ হবার কথা নয়।”

জয়ন্ত বললে, “যাক, এখন আর ও-নিয়ে তর্কের দরকার নেই, কামসেই মূর্তি ছ'টা সামনে না থাকলে ও-তর্কের কোন মীমাংসাই হবে না চেয়ে এখন দেখা যাক, ঐ দাগগুলো কোন্ দিকে গিয়েছে?”

সুন্দরবাবু তখন ‘রসদ’ খানাতল্লাস করবার জগ্বে নিশীথদের মোটে ভিতরে প্রবেশ করেছেন।

আগেই বলা হয়েছে পায়ের দাগগুলো উঠে গিয়েছে উপর দিকে। সকলে সেই রেখা ধ'রে চালু জমির উপর দিয়ে অগ্রসর হ'ল। কিন্তু বেশীদূর যেতে হ'ল না। কারণ নদীর প্রায় ধারেই রয়েছে একটা জঙ্গলময় জমি, একসময় তার চারিদিকে যে প্রাচীর ছিল, স্থানে স্থানে তার কিছু কিছু আঙ্গুল বর্তমান রয়েছে। পায়ের দাগগুলো সেই জমির ভিতরেই প্রবেশ করেছে।

সকলে ভাঙা প্রাচীরের সামনে দাঁড়িয়ে রইল। মাণিক উত্তেজিত কণ্ঠে বললে, “সারাদিনের পর একটা হৃদিসের মত হৃদিস মিলল বটে, কিন্তু অস্বাভাবিক বোধহয় আর-কিছু নূতনত্ব পাওয়া যাবে না। সূর্য্য ডুবে গিয়েছে।”

পশ্চিমের আকাশে তখন সোনালি ও লাল রং গুলে কে যেন নূতন ছবি  
 াকবার জন্তে শ্রান্ত হচ্ছিল। কিন্তু সে চেষ্টা ব্যর্থ করবার জন্তে অন্ধকার  
 ব-তাড়াতাড়ি এগিয়ে আসছে! .....সুমুখের জমির ঝোঁপঝাপের আশে-  
 শে অন্ধকার এখনি ঘন ও রহস্যময় হয়ে উঠেছে। চারিদিক এমন স্তব্ধ  
 একটা সূচ পড়লেও শোনা যায়! সেই মৌনতার ভিতরে মাথার উপর দিয়ে  
 ান একসাঁক বক উড়ে গেল, তখন তাদের ডানাগুলোর ঝটপট শব্দ শুনে  
 ন হ'ল, যেন অনেকগুলো ভৌতিক আত্মা যন্ত্রণায় ছটফট ছটফট করছে!

এমন সময় দেখা গেল, সুন্দরবাবু হাঁস্ফাস্ করতে করতে দৌড়ে আসছেন  
 তাঁর একহাতে খানকয় স্মাগু-উইচ্ এবং অণ্ড হাতে এক ছড়া কলা!  
 ছে এসেই তিনি বললেন, “এই ভরস্ক্যোবেলায়, এই মারাত্মক জয়গায়  
 াকে একলা ফেলে তোমরা কোথায় পালিয়ে যেতে চাও?”

মাণিক বললে, “সে কি সুন্দরবাবু, অমন বুড়ীভরা আম, কলা, কেক,  
 কল, বিস্কুট আর স্মাগু-উইচের মাঝখানেও নিজেকে আপনি একলা ব'লে  
 ন করছিলেন?”

সুন্দরবাবু বললেন, “ঠাট্টা কোরোনা মাণিক, ও-রকম ঠাট্টা আমি পছন্দ  
 রি না! কিন্তু জয়ন্ত, তোমরা কোথায় যাচ্ছ?”

—“ঐ জমির মধ্যে। পায়ের দাগগুলো ওর মধ্যে গিয়ে ঢুকেছে।”

সুন্দরবাবু ছ-চারবার উকি-ঝুকি মেরে বললেন, “বাববাব, ওটা যে  
 ারস্থান ব'লে মনে হচ্ছে!”

—“হ্যাঁ, ওটা গোরস্থানই বটে! এখনো ছ-চারটে কবরের পাথর অটুট  
 ছে। আমি জানতে চাই, এই পরিত্যক্ত সহরে, এই পোড়ো ভাঙা গোর-  
 নে হয়জন মানুষ কি উদ্দেশ্যে এসেছিল? হয়তো তারা এখনো ওর



# পদচিহ্ন ও গোরস্থান



তাঁর এক হাতে খানকয় শাওঁউইচ্ এবং অত্র হাতে একছড়া কলা...

মধ্যেই আছে। কারণ পায়ের দাগ দেখেই বোঝা যাচ্ছে, এ পথ দিয়ে এখনো তারা বেরিয়ে আসে নি।”

—“হয়তো তারা অন্য পথ দিয়ে বেরিয়ে গিয়েছে।”

—“হুঁতে পারে। কিংবা এখনো তারা বেরিয়ে যায় নি।”

—“কিন্তু আর যে আলো নেই।”

—“আকাশের আলো নেই, আমাদের আলো আছে। সুন্দরবাবু, ভুলে যাচ্ছেন কেন, আমরা ছ’টা বড় বড় পেট্রলের লণ্ঠন এনেছি। সেগুলো জ্বাললে এখানটা আলোয় আলো হয়ে উঠবে।”

সুন্দরবাবু বললেন, “শোনো জয়ন্ত, রাত্রিবেলায় বেড়াবার পক্ষে গোরস্থান খুব ভালো জায়গা নয়! আমরা তো কাল সকালেও ওর মধ্যে যেতে পারি?”

জয়ন্ত দৃঢ়স্বরে বললে, “এক রাত্রের হেরকেরে মস্ত সুযোগও নষ্ট হয়ে যেতে পারে! আমি আজকেই এই গোরস্থানটা দেখব!”

আচম্বিতে খানিক তফাতে হাঃ হাঃ হাঃ হাঃ করে একটা অত্যন্ত কঠিন ও নির্ভুর অট্টহাসি জেগে উঠল।

সুন্দরবাবু চমকে একেবারে দলের মাঝখানে এসে দাঁড়ালেন—তাঁর হাত থেকে কলার ছড়া খসে পড়ে গেল।

সন্ধ্যার অন্ধকারে চারিদিক তখন ঝাপসা, জয়ন্ত কারুকেই দেখতে পেলেন না—সে বকের উপরে দুই হাত রেখে স্তব্ধ ও স্থির হয়ে দাঁড়িয়ে সেই আশ্চর্য্য অট্টহাসি শুনে লাগল।

অমিয় ম্লানমুখে অশ্রুট স্বরে বললে, “সেদিনও আমরা এই অমানুষী হাসিই শুনেছিলুম!”

## চতুর্থ পরিচ্ছেদ আবার সেই মারাত্মক 'ছন্ন'

নদীর মত শব্দেরও স্রোত আছে। নদীর স্রোত দেখা যায়, কিন্তু শব্দের স্রোত ধরা পড়ে কাণে।

খানিকক্ষণ ধ'রে সেই ভয়াবহ অট্টহাসির শব্দ ঠিক স্রোতের মতই শূন্যতার মধ্য দিয়ে অবিরাম বয়ে চলল। তারপর হঠাৎ হাসি থেমে গেল এবং তার প্রতিধ্বনিগুলো ক্ষীণ থেকে ক্ষীণতর হয়ে ধীরে ধীরে মিলিয়ে গেল যেন নিস্তরতার মহাসাগরে।

সুন্দরবাবু তখন দুইহাতে দুই কাণ চেপে মাটির উপরে উবু হয়ে ব'সে পড়েছেন।

অমিয়, নিশীথ ও পরেশ প্রাণপণে পরস্পরের হাত চেপে ধ'রে আড়ষ্টের মত দাঁড়িয়ে রইল।

জয়স্তু বললে, “যে হাসছে, সে হয় পাগল, নয় আমাদের ঠাট্টা করছে!”

মাণিক কিছু বললে না, কেবল নিজের বন্দুকের কুঁদোটা মাটির উপরে ঠক্ ঠক্ করে ঠুকতে লাগল।

রাত্রিময়ী বনভূমি, ভয়-ভরা রহস্যময় তার রূপ! মাথার উপরে অন্ধকার আকাশ-দানবের হাজার হাজার তারকা-চক্ষু মিটমিট করে তাকিয়ে আছে, তার তলায় আরো-ঘন অন্ধকারে পর্বতশিখরগুলো যেন দৈত্যপুরীর বিচিত্র ও বিরাট অভিনয়-ভঙ্গিতে স্থির ও স্তম্ভিত হয়ে আছে এবং তারও তলায় যেন

সীমাহারা বিশাল অরণ্য সভয়ে বন্ধস্বরে থেকে থেকে অস্ফুট আর্তনাদ করে

ঘুঘুর ত্রিয়মান সুরকে ঘুম পাড়িয়ে জেগে উঠেছে প্যাঁচার বিরক্ত, কর্কশ কণ্ঠ—সে যেন এই বিপুল বনকে এবং এই বনের ভিতরে আজ যারা এসে পড়েছে তাদের সবাইকে ক্রমাগত অভিশাপের পর অভিশাপ দিয়ে যাচ্ছে এবং তারই সঙ্গে তাল রেখে ঘন ঘন বেজে উঠেছে কালো বাহুড়দের অলক্ষুণে ডানাগুলো।

সুন্দরবাবু শিউরে শিউরে ব'লে উঠলেন, “আলো জ্বালো, আলো জ্বালো, আলো জ্বালো।”

পেট্রলের লণ্ঠন আনবার জন্তে পরেশ গাড়ীর দিকে অগ্রসর হ'ল।

জয়ন্ত তার একখানা হাত ধরে তাকে থামিয়ে বললে, “কোথায় যাচ্ছেন?”

—“আর যে অন্ধকার সহিতে পারছি না, আলোগুলো এনে জ্বলে ফেলি।”

—“না। যদি এখানে সত্যিই শত্রু থাকে, তাহ'লে আলো জ্বাললে আমাদের দেখতে পাবে। এখন অন্ধকারই আমাদের বন্ধু।”

সুন্দরবাবু ব'সে ব'সেই পিছনে হটুতে হটুতে বললেন, “কিন্তু শত্রুরা অন্ধকারেই আমাদের দেখতে পেয়েছে—ঐ ঝোঁপের ভিতর থেকে তারা আমাদের দিকে তাকিয়ে আছে।”

নাগিক দেখলে সামনের একটা ঝোঁপ থেকে সত্যসত্যই চার-চারটে চোখের আগুন জ্বলছে আর নিবুছে—জ্বলছে আর নিবুছে!

অমিয় ও নিশীথ বন্দুক তুললে।



চার চারটে চোখের আগুন জ্বলছে আর নিবছে

জয়ন্ত হেসে বললে, “খুব-সস্তব ছুটো শেয়াল আশ্চর্য্য হয়ে আমাদের দেখছে !”

তারপরেই আগুন-চোখগুলো আর দেখা গেল না।

জয়ন্ত বললে, “সুন্দরবাবু, মিছে ভয় পেয়ে রজ্জুতে সর্পভ্রম করবেন না। ভয় বড় সংক্রামক। একজন ভয় পেলে আর সকলেও ভয় পাবে। অথচ এখানে ভয় পাবার মত কিছুই আমি দেখছি না।”

কিন্তু সুন্দরবাবু জয়ন্তের কথা শুনতে পেলেন ব’লে মনে হ’ল না,—তিনি তখন কাণ পেতে অণু কি যেন শুনছিলেন !

মানিক চুপিচুপি বললে, “জয়, নদীর জলে ছপ্-ছপ্ শব্দ হচ্ছে। কে যেন নদী পার হচ্ছে !”

তারপরেই শব্দটা থেমে গেল।

খানিক পরে খুব কাছেই শোনা গেল কার পায়ের শব্দ। কে দ্রুতপদে গোরস্থানের দিকে অগ্রসর হচ্ছে ! কিন্তু সে যে কে, কিছুই নজরে পড়ল না, ছিদ্রহীন অন্ধকার তার মূর্তিকে একেবারে গ্রাস ক’রে ফেলেছে !

পায়ের শব্দও ধীরে ধীরে মিলিয়ে গেল।

অমিয় অফুটস্বরে বললে, “জয়ন্তবাবু, যেখানে দিনের বেলায় মানুষ আসতে ভয় পায়, সেখানে এমন সময়ে এই অন্ধকারে যে বেড়াতে আসে, তাকে কি সাধু ব’লে মনে হয় ?”

সুন্দরবাবু বললেন, “হুম্। কিন্তু এখান দিয়ে যে গেল সে কি মানুষ ? এত রাত্রে এই পোড়ো সহরের গোরস্থানের সঙ্গে জ্যান্তো মানুষের কি সম্পর্ক থাকতে পারে ? আমরা চোখে দেখছি খালি অন্ধকার, ও কিন্তু দিব্যি হন্ হন্ ক’রে এগিয়ে গেল !”

মাণিক বললে, “জয়, আমরাও কি ওর পিছনে পিছনে গোরস্থানে গিয়ে ঢুকব ?”

জয়ন্ত বললে, “গোরস্থানে ঢুকতে হ'লে আলো জ্বালতে হয়। কিন্তু এখন আলো জ্বালা আর নিজে-থাকতে ধরা দেওয়া একই কথা! কি যে করব বুঝতে পারছি না!”

সুন্দরবাবু বললেন, “এখন আমাদের একমাত্র কর্তব্য হচ্ছে, মানে মানে গাড়ীতে গিয়ে উঠে পড়া। নইলে ভূত কি মানুষ শত্রুর হাতে না হোক, সাপ কি বিচ্ছুর কামড়ে আমাদের মৃত্যু হবে অনিবার্য!”

পরেশ বললে, “এইমাত্র আমার পায়ের ওপর দিয়ে সড়্ সড়্ ক'রে কি চ'লে গেল!”

সুন্দরবাবু আঁংকে উঠে লাফাতে ও পা ঝাড়তে ঝাড়তে বললেন, “হুম্। আমার পায়ের উঠলে সে নিশ্চয়ই আমাকে কামড়ে দেবে! এই, হস্ হস্! এই, হস্ হস্!”

মাণিক হেসে ফেলে বললে, “সুন্দরবাবু, হস্-হস্ ক'রে আপনি কি কাক তাড়াচ্ছেন?”

সুন্দরবাবু চোখ রাঙিয়ে বললেন, “মরছি নিজের জ্বালায়, এখন আর ঠাট্টা ক'রে কাটা ঘায়ে লুণের ছিটে দিওনা মাণিক!.....ওরে বাস্ রে, এ কী অন্ধকার! ছনিয়ায় এত এত অন্ধকারও থাকতে পারে! অ জয়ন্ত, কোন্ দিকে গাড়ী আছে ব'লে দাও, তোমরা না যাও, আমি একলাই গাড়ীতে গিয়ে ব'সে থাকুব!”

সুন্দরবাবু পায়ের পায়ের এগিয়ে চললেন, এবং আচম্বিতে বনের ভিতর থেকে জেগে উঠল বাঘের গম্ভীর গর্জন!.....তিনি চমকে আবার পায়ের

পায়ে পিছিয়ে দলের মাঝখানে এসে হতাশ ভাবে বললেন, “তাহ’লে উনিও এখানে আছেন ?” তাড়াতাড়ি পিঠ থেকে বন্দুকটা নামিয়ে তিনি আত্মরক্ষার জন্তে প্রস্তুত হ’লেন ও সাপের ভয়ে মাঝে মাঝে পা ঝাড়তে লাগলেন !

শৃগালদের সম্মিলিত কোলাহল জানিয়ে দিলে, এখন ছুপব রাত্রি ! নদীর কলতান শোনাচ্ছে কারার মত ! আকাশ একে অন্ধকাব, কিন্তু হঠাৎ দেখা গেল অধিকতর পুরু আর-একটা অন্ধকারেব ঘোমটা ছড়িয়ে প’ড়ে আকাশের তারকা-নেত্রগুলোকে ঢেকে দিচ্ছে !

জয়ন্ত বললে, “মেঘ উঠেছে। আজও হয়তো ঝড়-বৃষ্টি হবে !”

অমিয় বললে, “তাহ’লে আমাদের ছুঁদশার বাকি কিছু আর বইল না ! এই বেলা—”

কিন্তু তাব মুখের কথা মুখেই বইল—সেই আসন্ন দুর্ঘোষণেব বিভীষিকা, সেই নিবিড় তিমিরের ভয়াল অন্ধতা, সেই নানাশব্দবিচিত্র বাত্মিব গভীরতা, সেই পরিত্যক্ত সমাধিক্ষেত্রের অমানুষিকতার ভিতব থেকে জাগ্রত হ’ল ভয়ঙ্কর অস্বাভাবিক এক কণ্ঠধ্বনি—কে যেন আকাশ-বাতাসকে কাঁপিয়ে কাদের ডেকে ডেকে তীব্র স্বরে বলছে—“ওরে আয়, ওরে আয়, ওরে আয় আয় তোরা আয় রে ! অন্ধকারে যারা দেখতে পায় তারা আশুক এখন অন্ধকারে যারা দেখতে পায় না তাদের কাছে ! আকাশের মেঘ তোদের ডাকছে, নিরুন্ন রাতেব আঁধার তোদের ডাকছে, মৃত আত্মার বন্ধু তোদের ডাকছে। কবরে কবরে ছুয়ার খুলে যাক, কফিনে কফিনে জীবন জাগুক, নরা গোখে চোখে আলো ফুটুক। বেগম-সাহেবা ব’সে ব’সে কাঁদছে, বাঁদীরা অন্ধকারে দেখতে পাচ্ছে না, আলো নিয়ে তোরা সবাই আয় আয়,—ওরে আয় রে !”



বৌ-বৌ-বৌ-বৌ করে হঠাৎ একটা পাগ্লা হাওয়ার ঝাপ্টা ব'য়ে গেল, কড়-কড়-কড়-কড় করে বজ্রের ধমক শোনা গেল, মড়-মড়-মড়-মড় করে বড় বড় গাছের মাথা মাটির দিকে ছুয়ে পড়ল! বাঘ আর ভয়ে গর্জন করেছে না, প্যাঁচা-বাতুড় ভয়ে আর ডানা ঝটপটিয়ে উড়ছে না, শূগলরা ভয়ে আর আশুন-চোখ মেলে তাকাচ্ছে না!

তারপরেই খল্-খল্-খল্-খল্ করে আবার সেই অট্ট হাসির পর হাসির শ্রোত!

অমিয় প্রায়-আর্ধস্বরে ব'লে উঠল, “ও হাসি আমি চিনি, কিন্তু অমন করে কথা কইলে কে?”

সুন্দরবাবু ঠক্-ঠক্ করে কাঁপতে কাঁপতে বললেন, “কে ডাকছে, কে আসবে, কে অন্ধকারে দেখতে পায়, কে বেগম আর কেই বা বাঁদী? আমরা কি স্বশরীরে নরকে এসে পড়েছি?”

জয়ন্তুও যেন আপন মনেই অক্ষুট স্বরে বললে, “বেগমই বা কে, আর বাঁদীই বা কারা? এ কি পাগলের প্রলাপ? মাণিক, তোমার কি মত? লর্ঠন-গুলো জ্বলে আমরা কি গোরস্থানে ঢুকে ঐ পাগ্লাটাকে আক্রমণ করব?”

মাণিক সজোরে জয়ন্তুর কাঁধ চেপে ধ'রে বললে, “চুপ চুপ! ঐ দেখ!”

জয়ন্তুর হুই চক্ষে অত্যন্ত বিশ্বয়ের ভাব জেগে উঠল! তাদের কাছ থেকে প্রায় দুইশত গজ তফাতে, গোরস্থানের ভিতরে ন'ড়ে-চ'ড়ে বেড়াচ্ছে কতগুলো আলো! তাহ'লে ঐ গোরস্থান নির্জন নয়? ওখানে আলো নিয়ে কারা কি করছে?

আবার সেই কণ্ঠস্বর!—“ওরে আয়, ওরে আয় আয় তোরা আয় রে! রোস্নাই কৈ, খানা কৈ, বিছানা কৈ?”

আলোগুলো এতক্ষণ এলোমেলো ছিল, হঠাৎ এখন সার বেঁধে একদিকে এগিয়ে চলল !

সুন্দরবাবু বললেন, “হুম্ । ও হচ্ছে আলেয়ার আলো !”

পরেশ বললে, “না, ও আলেয়ার আলো নয় !- যাদের হাতে আলো আছে, তাদেরও আব্‌ছা-আব্‌ছা দেখা যাচ্ছে !”

নিশীথ বললে, “কিন্তু ভালো ক’রে কিছুই দেখা যাচ্ছে না ! কে ওরা ? এই গোরস্থানের ভিতরে কি ডাকাতদের আড্ডা আছে ?”

জয়স্তু বললে, “অমিয়বাবু, আপনাদের ছয়জন লোকে আক্রমণ ক’রেছিল তো ?”

—“আজ্ঞে হ্যাঁ ।”

—“মাণিক, নদীর তীরে আমরাও আজ ছয়জোড়া পদচিহ্ন আবিষ্কার করেছি তো ?”

—“হ্যাঁ ।”

—“এখন ঐ আলোগুলো গুণে দেখ দেখি !”

মাণিক গুণতে গুণতে বললে, “এক, দুই, তিন, চার, পাঁচ, ছয় ! ছ’টা আলো—তার মানে ছ’জন লোক !”

অমিয় উত্তেজিত কণ্ঠে বললে, “জয়স্তুবাবু, জয়স্তুবাবু ! তাহ’লে ওরাই আমাদের শীলাকে চুরি করেছে ! ওরা ভৃত্যই হোক্ আর মানুষই হোক্, কিছুই আমি কেয়ার করি না,—আমি এখনি ওদের আক্রমণ করব—আমার বোনকে উদ্ধার করব—হয় আমি মরব নয় ওদের মারব !”

জয়স্তু তাড়াতাড়ি তার হাত চেপে ধ’রে বললে, “শাস্ত হোন অমিয়বাবু, এখন গৌয়ার্ত্তুমি করবার সময় নয় ! ওখানে যদি ডাকাতের দল থাকে

তাহ'লে ওদের দলে কত লোক আছে তা কে বলতে পারে ? আমরা ওখানে গিয়ে প্রাণ দিলে তো আপনার বোনের কোন উপকার হবে না !”

মাণিক বললে, “আলোগুলো আবার কোথায় অদৃশ্য হয়ে গেল !”

জয়ন্ত স্থির ভাবে বললে, “যাক্ গে। আমাদের এখানে অপেক্ষা করা সার্থক হয়েছে। কাল সকালে এই গোরস্থানই হবে আমাদের কার্য্যক্ষেত্র ! আজ এই অন্ধকারে অজানা জায়গায় গোলমাল ক'রে আমরা কিছুই করতে করতে পারব না, মাঝখান থেকে শত্রুরা সাবধান হয়ে স'রে পড়বে। বৃষ্টি এল ব'লে, রাত পোয়াতে আর ঘণ্টাকয় মাত্র দেরি আছে, বাকি রাতটুকু মোটরে ব'সে কাটিয়ে দিই গে চল।”

অমিয় নিতান্ত অনিচ্ছা সত্ত্বেও জয়ন্তের কথামত নিজেদের মোটর-গাড়ীর দিকে যাবার জন্তে ফিরে দাঁড়াল।

—সঙ্গে সঙ্গে সকলে গুনতে পেল, বনের পথে আবার কার একখানা মোটর-গাড়ীর গর্জন,—গাড়ীখানা যেন খুব তাড়াতাড়ি ছুটছে !

অমিয় আশ্চর্য্য হয়ে বললে, “এখানকার সবই কি অস্বাভাবিক ! এমন জায়গায় এমন সময়ে কে আবার মোটরে চ'ড়ে হাওয়া খেতে এল ?”

নিশীথ বললে, “একখানা নয়, আবার আর একখানা মোটর ! ঐ শোনো, এখানাও খুব জোরে ছুটে চলেছে !”

মাণিক বললে, “ডাকাতরা আমাদের আক্রমণ করবার জন্তে কি মোটরে ক'রে দলবল নিয়ে এল ?”

আচম্বিতে অরণ্যের ভিতরে দূরে একটা ভয়ানক শব্দ হ'ল ! সকলে সবিস্ময়ে গুনছে, এমন সময়ে আবার সেই রকম আর একটা শব্দ।

অমিয় বললে, “এ যেন কোন accidentএর শব্দ !”

জয়ন্ত তাড়াতাড়ি এগিয়ে শুকনো গলায় বললে, “হ্যাঁ, হ্যাঁ, accidentই বটে! আমাদেরই সর্বনাশ হ'ল বোধ হয়!”

যেখানে তাদের গাড়ী ছিল, সেখানে গিয়ে দুখানা মোটরই আর খুঁজে পাওয়া গেল না!

জয়ন্ত তিক্তস্বরে বললে, “আমরা এখন অসহায়! আমাদের অদৃশ্য শত্রু এসে দুখানা মোটরই চালিয়ে ছেড়ে দিয়েছে আর চালকহীন গাড়ী দুখানা খানিক দূরে এগিয়েই গাছে কি পাহাড়ে ধাক্কা লেগে ভেঙে গুঁড়ো হয়ে গিয়েছে।”

সুন্দরবাবু বললেন, “হুম্। তাতে শত্রুদের লাভ?”

জয়ন্ত বললে, “আমাদের পালাবার পথ বন্ধ হ'ল। হয়তো শত্রুরা এখন আমাদের আক্রমণ করবে!”

সুন্দরবাবু বললেন, “হুম্। আমি এখন পায়ে হেঁটেই পালাতে চাই। এ বিষয়ে আমি দৃঢ়প্রতিজ্ঞ। তোমরা আসো আর নাইই আসো, এই আমি দৌড় মারলুম।”

সুন্দরবাবু সত্যসত্যই সকলের মায়া কাটিয়ে দৌড় দিলেন, কিন্তু জয়ন্ত এক লাফে তাঁর স্মুখে গিয়ে প'ড়ে বললে, “সুন্দরবাবু, একটু দাঁড়ান! বোধ হয় আমরাও আপনার সঙ্গী হ'তে বাধ্য হব!”

হঠাৎ পিছনে আর একটা অদ্ভুত শব্দ শোনা গেল। মাটির উপরে ধুপ্ ধুপ্ করে পায়ের শব্দ—যেন একদল সৈন্য তালে তালে পা ফেলে ক্রমেই কাছে এগিয়ে আসছে!

জয়ন্ত বললে, “যা ভেবেছি তাই! এঁ ওরা আক্রমণ করতে আসছে! এখন পালানো ছাড়া উপায় নেই!”

## পঞ্চম পরিচ্ছেদ

নবাব

অনেক কষ্টে মাইলের পর মাইল পাহাড়ে-পথ পায়ে হেঁটে পাহা হয়ে পরদিন তারা যখন লোকালয়ে গিয়ে পৌঁছলো, তখন বেলা ছপুর তাদের ছুঃখের পাত্র পূর্ণ করবার জন্তে বৃষ্টি পড়ছে তখনো।

এবং সে-বৃষ্টি সে-দিন সে-রাত আর থামবার নাম করলে না।

লোকালয়ে পৌঁছে তারা প্রথমেই পলে পুলিশের একটা ফাঁড়ি। জয়ন্ত ও মাণিক ছাড়া বাকি সকলের শরীরের অবস্থা হয়েছিল এমন ভয়ানক যে, ফাঁড়ির সামনে গিয়ে তারা একেবারে ভেঙে পড়ল। কাজেই জয়ন্ত ও মাণিক বাধ্য হয়ে তাদের নিয়ে ফাঁড়ির ভিতরেই প্রবেশ করল। তাদের অবস্থা দেখে, কাহিনী শুনে ও পরিচয় পেয়ে দারোগা পীর মহম্মদ সাহেব সকলকে যার-পর-নাই আদর-যত্ন করলেন এবং সেদিনকার মত তাদের ফাঁড়ির ভিতরেই থাকবার ব্যবস্থা ক'রে দিলেন।

কালকের রাত্রে জয়ন্তের মত লোককেও আজ পর্য্যন্ত বিস্ময়ে অভিভূত ক'রে রেখেছে! সে কী নিরেট অন্ধকার! যেন মুণ্ডরের বাড়ি মারলে সশব্দে ভেঙে টুকরো টুকরো হয়ে যায়! সে কী দুঃখোঁগ! যেন ঝড় আর বৃষ্টি তাদের বিরুদ্ধে ষড়যন্ত্র ক'রেই উন্নত ও নিষ্ঠুর আনন্দে আকাশ ও পৃথিবীকে ব্যাকুল ক'রে তুলেছিল অশ্রাস্ত ভাবে! সে কী বিভীষিকা! প্রেতাশ্মা-জগতের সিংহদ্বার খোলা পেয়ে যেন মূর্ত্তিমান অভিষাপের দল সেদিন মানুষের জগৎ আক্রমণ করেছিল!

সেই মুহূৰ্ছ নব নব ভয়-বিশ্বাসের অভিনয়-ক্ষেত্রে বৃষ্টির কনকনে  
 ঠাটলতায়, বজ্রসাথী ঝড়ের ঝাপটায় ও ধাক্কায়, কখনো উপল-সঙ্কুল ছুঁগম  
 পার্বত্য চড়াই-উৎরাইয়ের ভিতর দিয়ে, কখনো বর্ষাধারায় হঠাৎ-বেগবতী  
 দীর তীব্র শ্রোত ঠেলে ঠেলে, কখনো তীক্ষ্ণ কাঁটাবোঁপের মধ্যে লুকিয়ে প'ড়ে  
 এবং কখনো বা ধূ-ধূ খোলা মাঠের তৃণহীন পিচ্ছল পাথুরে জমির উপর আছাড়  
 খয়ে তারা প্রাণপণে পালিয়ে আসবার চেষ্টা করেছে—এবং তাদের পিছনে  
 পিছনে বরাবর ধেয়ে এসেছে সে যে কারা কেউ তা জানেনা, কেবল তাদের  
 গাণের কাছে একটানা সমান বেজে বেজে উঠেছে সেই মহা-অমানুষিক  
 মাশ্চর্য্য পায়ের শব্দ—একদল সৈন্য যেন সমতালে পা ফেলতে ফেলতে  
 ক্রমাগত এগিয়ে আসছে, ক্রমাগত এগিয়ে আসছে আর আসছে আর আসছে  
 —সে ভয়াবহ পা-গুলো যেন থামতে জানেনা, যেন কখনো থামবেও না, যেন  
 তারা চিরদিন ধ'রে এই মাটির পৃথিবীকে দলিত শক্তিত ও স্তম্ভিত ক'রে চ'লে  
 চ'লে বেড়াব !

উঃ ! সে কথা ভেবে ভেবে জয়ন্ত এখনো থেকে থেকে শিউরে শিউরে  
 ঠঠে লাগল !

জয়ন্তের দেহ লম্বায় ছয় ফুট চার ইঞ্চি, তার বুকের ছাতি পঁয়তাল্লিশ ইঞ্চি  
 ওড়ায় এবং তার ব্যায়ামপুষ্ট সুদীর্ঘ দেহকে দেখায় ঠিক দানবের দেহের মত !  
 মাণিকের দেহ অতটা জঁকালো দেখতে না হ'লেও যে-কোন পালোয়ানেরই  
 মতন বলবান । কিন্তু তাদের এমন বলিষ্ঠ দেহও কালকের রাত্রে ব্যাপারে  
 যথেষ্ট কাবু হয়ে পড়েছে । দলের অন্যান্য লোকদের কথা না তোলাই ভালো ।  
 তারা স্নাজ শয্যাশায়ী, উত্থানশক্তিশূন্য ।

কিন্তু কে তারা এমন একতালে পা ফেলে ফেলে আসে ? মাঝে মাঝে

বিছাৎ-আলোতে কতকগুলো ধবধবে সাদা মূর্তির মতন কি যেন দেখা গিয়েছে, কিন্তু সেটা চোখের ভ্রমও হ'তে পারে ! এবং মাঝে মাঝে অস্বাভাবিক হি হি হি হাসিও শোনা গিয়েছে ! হাসেই বা কে, আর আসেই বা কারা ? অনেক মাথা ঘামিয়েও জয়ন্তু কিছুই আন্দাজ করতে পারলে না ।

আর-একটা জায়গায় তার মনে খটকা লেগে রয়েছে ! ভোরবেলায় পূর্ব-আকাশে উষা যেই সিঁখায় সিঁদূরের রেখা টেনেছিল, কোথা থেকে বন-মুগী জাগরণের প্রথম ডাক ভেকে উঠেছিল, আবছা-আলো এসে অন্ধকারকে কাঁচের মতন স্বচ্ছ ক'রে তুলেছিল, অম্নি থেমে গিয়েছিল তাদের পিছনকার সেই একশুঁয়ে পায়ের শব্দগুলো ! যারা তাদের আক্রমণ করেছিল তবে কি তারা রাত্রির রহস্যযাত্রী,—প্রভাতকে তারা ভয় করে ?

কিন্তু এক বিষয়ে একটুও সন্দেহ নেই ! জয়ন্তু জানে, সে ঠিক সূত্রই ধরেছে,—ঐ গোরস্থানে বা তার আশেপাশেই আছে সমস্ত রহস্যের মূল । ওখানে ভাসা-ভাসা যাদের দেখেছে এবং যাদের হাসি ও পায়ের শব্দ শুনেছে, নিশ্চয় তারাই হচ্ছে আসল পাপী ও অপরাধী । নইলে একটা পোড়া সহরের পরিত্যক্ত গোরস্থানের ধ্বংসাবশেষের মধ্যে সাধু ব্যক্তির লুকিয়ে রাত্রিবাস করতে আসে না, নইলে বাহির থেকে কেউ সেখানে এসেছে জেনে মোটরগাড়ী ভেঙে তার পালাবার পথ বন্ধ ক'রে দেয় না, নইলে অকারণে কেউ কারকে আক্রমণ করতে উদ্যত হয় না !

আজ সকালে সে যদি ঘটনাস্থলে থাকতে পারত, তা'হলে কতটা সুবিধাই হ'ত ! ওখানে নিশ্চয়ই আরো অনেক-কিছুই আবিষ্কার করা যেতে পারে

কিন্তু আজ আর ওখানে যাবার কোন উপায়ই নেই ! তাদের, গাড়ী দুখানা শব্দর চক্রান্তে ভেঙে গুঁড়িয়ে গেছে, তার সঙ্গীদের গতিরও চূর্ণ হ'বে

গছে,—তার উপরে এই অশ্রান্ত ধারায় বৃষ্টি!..... একটা মূল্যবান দিন  
মিথ্যা নষ্ট হ'ল!

লম্বা ঘরে পাশাপাশি ছয়খানা খাটিয়ায় জয়ন্ত, মাণিক, সুন্দরবাবু, অমিয়,  
নিশীথ ও পরেশ আশ্রয় নিয়েছিল। সন্ধ্যার কিছু আগে তাদের জন্তো চা এল,  
মার-সকলের সঙ্গে সুন্দরবাবুও নিতান্ত চা খাবার লোভেই নারাজ ভাবে  
ঠে বসলেন। কিন্তু পেয়ালায় প্রথম চুমুক দিতে গিয়েই তিনি ক'রে উঠলেন

জয়ন্ত বললে, “কি হ'ল সুন্দরবাবু? হঠাৎ অমন ক'রে উঠলেন কেন?”  
সুন্দরবাবু ক্রুদ্ধ স্বরে বললেন, “হুম্। অমন ক'রে উঠলুম কেন? জেনে-  
জেনে শাকা সাজা হচ্ছে? মনে নেই, কাল পাহাড়ের উপর থেকে এই বুড়ো-  
য়সে ডিগ্বাজি খেয়ে মুখ খুবড়ে প'ড়ে গিয়েছিলুম? এখনো চোয়াল  
পাড়বার ঘো নেই?”

জয়ন্ত বললে, “ও! আচ্ছা, এইবারে মনে থাকবে!”

সুন্দরবাবু বললেন, “তোমার পাল্লায় প'ড়েই তো আজ আমার এই  
দর্দিশা! দিব্যি সুখে ছিলাম, মরতে আমায় ভূতে কিললো, তাই তোমার  
সঙ্গে বেড়াতে এসেছি। এ কী কাণ্ড রে বাবা! ভূতে-মানুষে টানাটানি,  
নিতান্ত এখনো পরমায়ু আছে, তাই এত-বড় ঝাঁড়া কাটিয়ে উঠেছি!  
হুম্, কাল সকালেই আমি ঘরের ছেলে ঘরে ফিরে যাব! জয়ন্ত, মাণিক,  
তোমরাও বাঁচতে চাও তো আমার সঙ্গে চল! অমিয়বাবু, আমি আপনাকে  
মাগেই বলেছি, আর এখনো বলছি, আপনি শীগ'গির ভালো রোজা  
ঢাকুন! আপনার বোনকে উদ্ধার করা পুলিশ কি সখের ডিটেক্টিভের কাজ  
নয়! কুমারী শীলাকে ভূতে উড়িয়ে নিয়ে গিয়েছে,—আপনি রোজা ঢাকুন!”



## নবাব

কিন্তু অমিয় মোটেই সুন্দরবাবুর দামী উপদেশ শুনছিল না। সে এতক্ষণ চা পান করতে করতে জান্না দিয়ে রাস্তার দিকে তাকিয়েছিল এবং হঠাৎ এখন চমকে দাঁড়িয়ে উঠল! তারপর চায়ের পিয়ালটা সশব্দে টেবিলের উপরে রেখেই ঝড়ের মতন বেগে ঘর থেকে বেরিয়ে গেল!

ঘরের ভিতরে বসে সকলে যখন সবিস্ময়ে পরস্পরের মুখ-চাওয়া-চাওয়ি করছে, তখন রাস্তা থেকে অমিয়ার উচ্চ চীৎকার শোনা গেল—“জয়স্ববাবু! মাণিকবাবু! শীগ্গির আশুন—তাকে ধরেছি!”

ঘরের ভিতর থেকে সবাই ছুটে বাইরে গিয়ে পড়ল—এমন-কি সুন্দরবাবু পর্যন্ত তাঁর ডিগবাজি-খাওয়ার বিষম ব্যথা বেমানুন ভুলে গেলেন!

বাইরে বেরিয়েই দেখা গেল, একটা দীর্ঘাকার লোক অমিয়কে ধাকা মেরে পথের উপরে ফেলে দিলে—তারপর হন্-হন্ ক’রে এগিয়ে চলল! যে-রকম অনায়াসে অমিয়কে সে ভূতলশায়ী করলে, তাতে বেশ বোঝা গেল যে, তার শরীরে রীতিমত ক্ষমতা আছে! কিন্তু অমিয় তবু ভয় পেলেন না বা তাকে ছেড়ে দিলেন না, সে মরিয়ার মত পর-মুহূর্ত্তেই মাটি থেকে উঠে ছুটে গিয়ে আবার তাকে দুইহাতে জড়িয়ে ধরলে! এবারে তার হাত ছাড়াবার আগেই আর সকলে গিয়ে লোকটাকে চারিদিক থেকে ঘিরে ফেললে!

অমিয় হাঁপাতে-হাঁপাতে বললে, “এই সেই লোকটা! যেদিন শীলা চুরি যায়, সেদিন একেই আমি ভাঙা মসজিদের ভেতরে দেখেছিলুম! আমার দৃঢ়বিশ্বাস, তাকাতরা যখন আমাদের আক্রমণ করেছিল, তখন এই লোকটাই হা-হা ক’রে হেসেছিল! পথ দিয়ে আজ ফাঁড়ির দিকে বার বার তাকাত্তে তাকাত্তে এ যাচ্ছিল, কিন্তু আমি দেখেই একে চিনতে পেরেছি!”

নিশীথ ও পরেশও একবাক্যে বললে, “হ্যাঁ, এই সেই লোক!”

জয়ন্ত লোকটার দিকে ভালো ক'রে তাকিয়ে দেখলে। দীর্ঘ দেহ, ঘোর-কালো মুখের উপরে লম্বা লম্বা কালো চুলগুলো বুলে পড়েছে, পরোণেও কালো 'ওভারকোট' ও কালো পাজামা। তার তীক্ষ্ণ চোখদুটো দেখলেই গোখরো-সাপের চোখের কথা মনে হয়। সে-রকম চোখ কেউ কখনো দেখে নি বোধ হয়। সে চোখদুটোতে যেন পলক পড়ে না! তাদের ভিতর থেকে এমন একটা দৃষ্ট ক্ষুধার ভাব ফুটে উঠছে যে, একবার দেখবার পর কেউ জীবনে আর কখনো সেই দৃষ্টো চোখকে ভুলতে পারবে ব'লে মনে হয় না!

দারোগা মহম্মদ সাহেবও গোলমাল শুনে এসে পড়েছিলেন। তিনি লোকটাকে জিজ্ঞাসা করলেন, “তোমার নাম কি?”

—“হাজী নবাব আলি।”

—“এই বাবুদের তুমি চেনো?”

—“না। ওঁদের আমি কখনো দেখিনি, ওঁরা কি বলছেন তাও বুঝতে পারছি না।”


—“আলিনগরের ভাঙা মসজিদে তুমি কি করতে গিয়েছিলে?”

—“জীবনে কোনদিন আমি আলিনগরেই যাই নি।”

অমিয় বললে, “মিথ্যাকথা!”

নবাবের সাপের মত চোখে বিদ্রোহ খেলে গেল। কিন্তু মুখে সে শান্ত হাসি হেসে বললে, “আমি হাজী। মিথ্যা বলা আমার পাপ।”

মহম্মদ-সাহেব বললেন, “তুমি হাজীই হও আর কাজীই হও আর পাজীই হও, আজ তোমাকে ফাঁড়িতে বন্ধ থাকতেই হবে! এখন আমার সময় নেই, কাল সকালে তোমাকে ভালো ক'রে পরীক্ষা করব।”



হুটে গিয়ে আবার তাকে দুই হাতে জড়িয়ে ধরলে

নবাবের চোখ আবার ধক্ ধক্ করে জ্বলে উঠল। সে বললে, “কোন আইনে আপনি আমাকে বন্ধ করে রাখতে চান?”

মহম্মদ সাহেব বললেন, “আইন ভাঙিয়ে যাঁরা খায় আইনের কথা তুমি সেই উকিলদেরই জিজ্ঞাসা কোরো। আমি উকিল নই,—আমি দারোগা। এই সেপাই! একে নিয়ে যাও—”

\* \* \* \*

গভীর রাত্রে ঘুমন্ত সুন্দরবাবুর মনে হ’ল, কে যেন তাঁর কাণের কাছে হি-হি-হো-হো করে অট্টহাসি হেসে উঠল!

জেগে বিছানার উপরে ধড়মড়িয়ে উঠে বসে সুন্দরবাবু চ্যাঁচাতে লাগলেন—“জয়ন্ত! জয়ন্ত! তারা এসেছে—তারা এসেছে—তারা এসেছে!”

সেই বিধম চীৎকারে ঘরশুদ্ধ লোকের ঘুম ভেঙে গেল!

জয়ন্ত বললে, “অত চ্যাঁচাচ্ছেন কেন সুন্দরবাবু, কী হয়েছে?”

—“হুম্। আমার কাণের কাছে একটা বিদকুটে হাসি শুনলুম।”

—“পাগল নাকি?”

বৃষ্টির জগ্নে ঘরের সমস্ত দরজা-জানলা বন্ধ ছিল। অমিয় আলো জ্বলে বললে, “কই, ঘরে তো আর কেউ নেই!”

জয়ন্ত বললে, “সুন্দরবাবুর ঘাড়ে স্বপ্নভূত চেপেছে!”

সুন্দরবাবু বিরক্ত হয়ে বললেন, “হ্যাঁ হে, হ্যাঁ! তবু তো আমার ঘাড়ে স্বপ্নভূত চেপেছে, কিন্তু তোমাদের ঘাড়ে চেপেছে যে আসল ভূত, সে খেয়ালটা আছে কি? হুম্, অট্টহাসিতে আমার কাণ গেল ফেটে, আমার ঘুম গেল ভেঙে, তবু ওঁদের বিশ্বাস হচ্ছে না!”

মাণিক একটা জান্না খুলে দিলে। ঘরের ভিতরে এসে ঢুকল হু-হু করে জোলো-হাওয়া। বৃষ্টিপাতের শব্দে বাইরের অন্ধকার মুখরিত।

কিন্তু মাণিকের কাণ আর-একটা কিছু শুনলে। অন্ধকারের ভিতর দিয়ে সমতালে পা ফেলে কারা চলে যাচ্ছে!

সে শব্দ জয়ন্তও শুনতে পেল। তড়াক করে লাফিয়ে উঠে লণ্ঠনটা তুলে নিয়ে সে গস্তীর স্বরে বললে, “এস মাণিক!” এবং তারপরেই দরজা খুলে তাড়াতাড়ি বেরিয়ে গেল—সঙ্গে সঙ্গে আর সকলেও তার পিছনে পিছনে চলল!

নবাব যে-ঘরে বন্দী ছিল, জয়ন্ত সিধে সেই ঘরের স্নমুখে গিয়ে দাঁড়াল। ঘরের দরজা খোলা—ভিতরে নবাব নেই!

সুন্দরবাবু বলে উঠলেন, “ফুস্মন্ত্র, ফুস্মন্ত্র! ফুস্মন্ত্রে নবাব উড়ে গেছে, আর যাবার সময়ে ফুস্মন্ত্রেই আমার কাণের কাছে মুখ এনে হেসে গেছে!”

জয়ন্ত বললে, “ফুস্মন্ত্রের নিকুচি করেছে! এই দেখুন, দরজার তালায় চাবি লাগানো রয়েছে। বাইরে থেকে কেউ ভাল। খুলে নবাবের পালাবার সুবিধা করে দিয়েছে!”

সুন্দরবাবু বললেন, “হুম্। কে সে? নিশ্চয়ই মাল্লুশ নয়!”

জয়ন্ত বললে, “যদি কোন মূর্ত্তিবান অলৌকিক শক্তি এসে এই দরজা খুলতে চাইত, তাহলে কুলুপ আপনাই খুলে যেত, এর মধ্যে আবার চাবি ঢুকিয়ে কুলুপ খুলতে হ’ত না! যখন চাবির দরকার হয়েছে তখন বুঝতে হবে যে, আমাদেরই মত কোন রক্ত-মাংসের হাত এই দরজার কুলুপ খুলেছে! আরো একটা ব্যাপার বেশ বোঝা যাচ্ছে। অনিয়বাবু ঠিক লোককেই

ধরেছেন। এই নবাব আলি যেইই হোক, নিশ্চয়ই সে অপরাধীদের একজন। হয়তো সে-ই হচ্ছে দলপতি। নইলে এমন করে পালিয়ে যেত না!”

নিশীথ বললে, “কিন্তু আশ্চর্যের বিষয় হচ্ছে এই যে, ফাঁড়ির ভিতরে নবাবের পালাবার সাহায্য করলে কে?”

মাণিক বললে, “দরজার সামনে যে একজন চোকিদার ছিল, সে কোথায় গেল?”

সুন্দরবাবু বললেন, “এও বুঝতে পারছ না? ফুস্মন্তে উড়ে গেছে!”

জয়ন্ত লণ্ঠনটা মাথার উপরে তুলে এদিকে-ওদিকে চেয়ে দেখলে।

মাণিক এগিয়ে যেতে যেতে বললে, “উঠোনের ওপরে দেয়ালে ঠেসান দিয়ে ও কে বসে আছে?”

সেই চোকিদার। মাণিক তার কাঁধে হাত দিতেই সে এলিয়ে একদিকে হেলে পড়ল।

মাণিক সচমকে বললে, “জয়, এ একেবারে ম’রে কাঠ হয়ে আছে। কিন্তু এর গায়ে কোথাও আঘাতের চিহ্ন নেই!”

জয়ন্ত লণ্ঠন নিয়ে এগিয়ে চোকিদারের মরা মুখ দেখেই স্তম্ভিত হয়ে গেল! তার ভুরুতুটো কপালের দিকে উঠে গেছে, তার চোখতুটো বিফারিত হয়ে যেন বাইরে ঠিকরে পড়তে চাইছে এবং তার মুখ হাঁ করে আছে! মৃত মানুষের মুখে এমন ভীষণ ভয়ের চিহ্ন সে আর কখনো দেখে নি! সে যেন চোখের সামনে নরক-দৃশ্য দেখেই আতঙ্কে আত্মহারা হয়ে মারা পড়েছে!

## ষষ্ঠ পরিচ্ছেদ

### প্রাস্তর-সমুদ্রে

খানিকক্ষণ পরে জয়স্তু ধীরে ধীরে বললে, “হ্যাঁ, এ লোকটিকে কেউ করে নি। কেবল ভয় পেয়েই এ মারা পড়েছে!”

মাণিক বললে, “ভেবে দেখ জয়, যা দেখলে মানুষ মারা পড়তে পারে সেটা কতদূর ভয়ানক দৃশ্য!”

সুন্দরবাবু বললেন, “এই চৌকিদার-বেচারার চোখের সামনে নিশ্চয় কে আস্ত জলজ্যান্ত ভূত দেখেছিল!”

জয়স্তু মাথা নেড়ে বললে, “আস্ত বা আধখানা, জ্যান্তো বা মরা—কোনকম ভূত-টুংই আমি বিশ্বাস করি না! চৌকিদার সত্যিই যদি কোন ভূত দেখে থাকে তবে বুঝতে হবে যে, ভূতের ছদ্মবেশে সে কোন মানুষকে দেখেছে!”

ইতিমধ্যে মহম্মদ সাহেব ও খানার অন্যান্য লোকেরাও গোলমাল শুরু বেরিয়ে এসে ব্যাপার দেখে হতভম্ব হয়ে দাঁড়িয়ে আছেন!

মৃত চৌকিদারের সেই ভয়বিকৃত ভয়ানক মুখ এবং বিস্ফারিত ও স্তম্ভিত দৃষ্টি আর তাকিয়ে দেখে সহ্য করা যাচ্ছিল না, একজন তাড়াতাড়ি পিলাসের উপরে কাপড় চাপা দিলে!

মহম্মদ ভাবতে ভাবতে বললেন, “ঈশাক খুব সাহসী চৌকিদার ছিল সয়তানের স্মৃখে গিয়েও সে বোধ হয় দাঁড়াতে ভয় পেনা! অথচ বোঝা যাচ্ছে, বিষম ভয়েই তার প্রাণ বেরিয়ে গিয়েছে! তাকে এমন আশ্চর্য

কারা দেখালে? নবাব ছিল ঘরের ভিতরে বন্ধ আর দরজার কুলুপের  
বি ছিল ঈশাকের পকেটে। কারা এসে সেই চাবি নিয়ে দরজা খুলে  
গাবকে খালাস করে দিলে? বুঝতে পারছি, নবাবের একটা দল আছে।  
কত তারা এর মধ্যে খবর পেলে কেমন করে? আর তাদের দেখে ঈশাকই  
এতটা অসম্ভব ভয় পেলে কেন? সুন্দরবাবু, আপনি তো কলকাতা  
লিসের পুরাণো আর পাকা লোক, আজকের রহস্য কিছু বুঝতে  
পারছেন কি?”

সুন্দরবাবু বিষন্ন ভাবে মাথার টাকে হাত বুলোতে বুলোতে বললেন,  
হুম্। এর মধ্যে আর না-বোঝবার কি আছে? আমি তো গোড়া থেকেই  
পারছি, এ-সব হচ্ছে ভৌতিক ব্যাপার! শীগগির রোজা না ডাকলে আমাদের  
পাইকেই অমনি দাঁত-মুখ খিঁচিয়ে ম'রে থাকতে হবে!”

হঠাৎ মাণিক ব'লে উঠল, “আচ্ছা, এইমাত্র এখানে এসে তো আমরা তালে  
লে পা ফেলে কাদের চ'লে যেতে শুনেছি! কে তারা?”

গোলে-হরিবোলে জয়মন্ত ও এতক্ষণ সে কথাটা ভুলে গিয়েছিল! সেও  
ভয়ঙ্কিত স্বরে ব'লে উঠল, “মাণিক, মাণিক! শীগগির আমাদের বন্দুকগুলো  
গানো! তারাই হচ্ছে নবাবের দল! মহম্মদ সাহেব, আর এক মিনিটও  
রি নয়—চলুন, আমরা তাদের পিছনে ছুটি,—তারা এখনো বেশীদূরে  
গাতে পারে নি!”

মহম্মদ নারাজ হ'লেন না। তখনই সশস্ত্র হয়ে সবাই থানা থেকে বেরিয়ে

ডল।

মহম্মদ জিজ্ঞাসা করলেন, “জয়সুন্দরবাবু, তাদের দলে কত লোক আছে?”

—“জানিনা। হয়তো ছ'—সাতজন, হয়তো আরো বেশী।”



## প্রান্তর-সমুদ্রে

—“তাদের দেখেই কি ঈশাক্ মারা পড়েছে?”

—“হ’তে পারে।”

—“আপনি কি তাদের দেখেছেন?”

—“দূর থেকে খালি কতকগুলো অস্পষ্ট সাদা সাদা গুঁর্তি দেখেছি।”

সকলে একটা তে-মাথার উপরে এসে দাঁড়িয়ে পড়ল।

তখনো ঝরছে সেই অশ্রান্ত বৃষ্টি এবং থেকে থেকে কেঁদে কেঁদে উঠে  
অশান্ত ঝোড়ো-বাতাস। বৃষ্টির সঙ্গে সঙ্গে কালো মেঘ থেকে  
অন্ধকারও যেন পৃথিবীর বুকে ঝর্-ঝর্ করে ঝরছে ক্রমাগত। সেই জম  
অন্ধকারকে ছাঁদা করে পুলিসদের লণ্ঠনের আলো বেশীদূর অগ্রসর হ’ত  
পারছিল না।

মহম্মদ বললেন, “এইবারেই তো মুস্কিল! পথ গিয়েছে তিনদিকে, বি  
সেই বদমাইসুরা গিয়েছে কোন্ দিকে?”

জয়ন্ত বললে, “এক কাজ করা যাক। মহম্মদ সাহেব আর সুন্দরব  
যান সামনের দিকে। অনিয়বাবু, নিশীথবাবু আর পরেশবাবু যান বাঁদিকে  
আমি আর মানিক যাই ডানদিকে। সব দলেই জনকয় করে চৌকিদ  
থাকুক।”

মহম্মদ বললেন, “এ ব্যবস্থা মন্দ নয়। বে-দল প্রথমে শত্রুর দেখা পা  
তখনি যেন তিনবার বন্দুক ছোঁড়ে। তাহ’লেই অণু ছু-দল তাদের সাহা  
করতে যেতে পারবে!”

জয়ন্ত ডানদিকের পথে দ্রুত পদচালনা করে বললে, “এই কথা  
রইল!”

ডানদিকের পথ হচ্ছে আলিনগরে যাবার পথ। জয়ন্তের ধারণা, নবা

## মানুষ-পিশাচ

মালবলে এই পথই ধরেছে। জয়ন্ত ও মাণিকের সঙ্গে রইল ছয়জন ঠিকিদার।

জলমাখা অন্ধকারের গায়ে বার বার ধাক্কা খেতে খেতে ছুটো লষ্ঠনের রালো অগ্রসর হচ্ছে এবং তারই পিছনে চলছে জয়ন্ত, মাণিক ও চৌকিদাররা।

ই ধারের ঘনবিহ্বস্ত গাছপালার মধ্য দিয়ে বয়ে যাচ্ছে যেন বজ্রগ্নিদন্ধ বিনিভ্র ত্ত্রির যন্ত্রণাভরা একটানা দীর্ঘনিশ্বাস। চিরকাল যারা কালো রাত্রির সঙ্গী, এই নিশাচর পেচক ও বাহুড়দেরও আজ দেখা নেই এবং শৃগালরাও আজ এই বীভৎস রাত্রের কালিমার চেয়ে গর্ভের অভ্যস্ত কালিমাকে নিরাপদ ভেবে ঠাকারের লোভ ছেড়ে বাসার ভিতরে বসে আছে। ঘ্যানঘেনে ঝিঝি-শাকাগুলোও মুখ বুঁজে যেন কোন অভাবিত অমঙ্গলের জন্তে রুদ্ধশ্বাসে অপেক্ষা করছে!

বৃষ্টি, বাতাস ও তরুমর্ম্বর ছাড়া কোথাও আর কোন শব্দই শোনা হচ্ছে না!

জয়ন্ত এগুতে এগুতে বারংবার বলছে, “আরো তাড়াতাড়ি—আরো তাড়াতাড়ি পা চালিয়ে চল! তারা অনেকটা এগুবার সময় পেয়েছে, তবু তাদের ধরতে হবেই!” যে-তুনিয়ায় আজ কীটপতঙ্গের মত জীবেরও সাড়া নেই সেখানে মানুষের এই উৎসাহিত কণ্ঠস্বর কী অস্বাভাবিকই শোনাচ্ছে! তার গলার আওয়াজ শুনে গর্ভের ভিতরে ঘুমন্ত বহু পশুরা সভয়ে চমকে জাগে উঠতে লাগল।

লোকালয় পিছনে ফেলে তারা এখন একটা বনের ভিতরে এসে পড়েছে।

মাণিক হতাশ কণ্ঠে বললে, “জয়, হয়তো তারা এ-পথে আসে নি!”

জয়ন্ত বললে, “অগ্র ছুটো পথের দিক থেকেও তো আমাদের কারুর

## প্রান্তর-সমুদ্রে

বন্দুকের আওয়াজ শুনছি না ! তুমি কি বলতে চাও তারা কোন পথে না গিয়ে হাওয়াব সঙ্গে হাওয়া হ'য়ে মিলিয়ে গিয়েছে ? তুমিও কি ভূত মানো ? যতক্ষণ না ওরা বন্দুক ছোঁড়ে, ততক্ষণ আমাদের এগিয়ে যেতে হবেই !”

—“কিন্তু যদি তাবা এই বনে ঝোঁপেঝোঁপে কোথাও গা-ঢাকা দেয় ? অন্ধকাবে তাদের কি আব খুঁজে বাব কবতে পাবব ?”

—“সে মুস্কিলের সম্ভাবনা আছে বটে, কিন্তু তবু থামলে আমাদের চলবে না ! এগিয়ে চল—আবো তাড়াতাড়ি এগিয়ে চল !”

সাবা বন যেন আজ বিভীষিকাব মদে মাশান হয়ে টেলোমলো টেলোমলো ! বড় বড় গাছের ডালপাতাব জালে বাধা প'ড়ে ঝোড়া-হাওয়া কখনো করছে, তীক্ষ্ণ স্ববে হাহাকাব, কখনো এবছে ভৈবব বিক্রমে ভাষণ গর্জন ! সেই সঙ্গে ছোট-বড় দমকা হাওয়ার দল গলা মিলিয়ে আবো যে কতবকন অদ্ভুত, আওয়াজে চতুর্দিক পবিপূর্ণ ক'বে তুলছে, তা বর্ণনা করবাব ভাষা কারুর কলমে নেই !

বন শেষ হ'ল—তাবপবেই সকলে একটা মাঠেব উপবে এসে পড়ল ।

একজন চোকিদার লণ্ঠনটা উঁচু ক'বে তুলে ধ'বে সামনের দিকে দেখবার বৃথা-চেষ্টা ক'রে বললে, “হুজুব, মাঠে জল থেঁ-থেঁ কবছে, পথ আর দেখা যাচ্ছে না !”

জয়ন্ত দৃঢ় স্ববে বললে, “জল ভেঙে এগিয়ে চল !”

—“কিন্তু কোন্ দিকে যাব ? পথ কোথায় ?”

—“সোজা চল !”

—“এই মাঠে যে খানা-ডোবা-পুকুর আছে ! যদি কোন পুকুরে গিয়ে পড়ি ?”

—“আমি তোমাকে টেনে আবার ডাঙায় তুলব ! কিন্তু এগিয়ে চল— এগিয়ে চল !”

আর একজন চৌকিদার বললে, “হুজুব, এ মাঠে এখন কোমর-ভোর জল আছে, তার ওপরে এ হচ্ছে বানের জল—এর টানে আমরা ভেসে যেতেও পারি।”

জয়ন্ত বললে, “এই জল ভেঙে নবাব যখন তার দলবল নিয়ে পালিয়ে যেতে পেরেছে, তখন আমরাই বা ভেসে যাব কেন ?”

—“না হুজুর, নবাবরা নিশ্চয় এদিকে আসেনি।”

—“যদি এসে থাকে, তাহলে তারা ঐ বনের ভিতরেই লুকিয়ে আছে।”

জয়ন্ত ও মাণিক বুঝলে, চৌকিদাররা আর এক পা এগুতে রাজি নয় ! আর তাদেরই বা দোষ কি ? এই অন্ধকার, এই ঝড়ের দাপট, মাঠ দিয়ে এই বগার মত জলপ্রবাহ, এই অবিরাম রষ্টির কনকনে ঝাপটা—যা তাদের হাড়ের ভিতর পর্যাস্ত ভিজিয়ে সাঁৎসেতে করে দিয়েছে ! তার উপরে অজানা, ভয়ানক শত্রুর ভয় তো আছেই ! আর, সে বড় সে-সে শত্রু নয়—কেবলমাত্র তাদের স্বচক্ষে দেখেই সাহসী চৌকিদার ঈশাক্ ইহলোক ছেড়ে পালিয়ে না গিয়ে পারেনি !

জয়ন্ত ও মাণিক দোমনা হয়ে অতঃপর কি করা উচিত তাই ভাবছে, এমন সময়ে দেখা গেল, সেই জলমগ্ন প্রান্তরের মাঝখানে নিবিড় অন্ধকারের গলায় হুলছে যেন একসার আলোর মালা !

জয়ন্ত চমকে বাঁলে উঠল, “ও কী ব্যাপার !”

চৌকিদাররা বললে, “আলেয়া !”

মাণিক বললে, “এতক্ষণ ও-আলোগুলো কোথায় ছিল ?”

জয়ন্ত উঠেদ্বারে গুণলে, “এক, দুই, তিন, চার, পাঁচ, ছয় ! মাণিক, মাণিক, আবার সেই ভয়ঙ্কর ছয় !”

—“তাহ’লে ওরাই হচ্ছে নবাবের সাক্ষোপাক্ষো ! আঁধারে গা ঢেকে ওরা তো বেশ পালিয়ে যাচ্ছিল, মরতে আলো জ্বলে আবার আমাদের দৃষ্টি আকর্ষণ করলে কেন ?”

—“আর একটা কথা বুঝে দেখ মাণিক ! আমাদের লণ্ঠনছটো সমান জ্বলছে, এ আলো ওরা দেখেছে, আর নিশ্চয় বুঝেছে যে, আমরা ওদের ধরবার জগ্গেই ছুটে এসেছি ! সেটা বুঝেও ওরা আমাদের চোখের সামনেই আলো জ্বালতে ভয় পায় নি !”

—“তাহ’লে কি হঠাৎ ওদের দলে আরো অনেক নতুন লোক এসেছে ? ওরা কি ভাবছে যে, আমাদের দেখে আর ভয় করবার দরকার নেই ?”

—“ওরা কি ভাবছে তা কে জানে ! এস, আগে আমরা তিনবার বন্দুক ছুঁড়ে আর সবাইকে জানিয়ে দি যে, শত্রুদের দেখা পাওয়া গেছে !”

জয়ন্ত ও মাণিক তিনবার বন্দুক ছুঁড়লে—তার তীব্র শব্দে চারিদিক ধ্বনিত-প্রতিধ্বনিত হয়ে উঠল !

দূর থেকে আঁধার-রাত্রির বক্ষ ভেদ ক’রে আরো কয়েকটা বন্দুকের গর্জন বাতাস-তরঙ্গের ভিতর দিয়ে শব্দ-তরীর মত ভেসে এল ! বোঝা গেল, আর সবাই তাদের সঙ্কেত শুনেই সাড়া দিলে এবং শীঘ্রই তারা তাদের কাছে এসে হাজির হবে !

জয়ন্ত বললে, “আমরা কোথায় আছি, আলো জ্বলে রেখে শত্রুদের সেটা আর দেখিয়ে দেবার দরকার নেই ! লণ্ঠন ছটো নিবিয়ে ফেলো !”

কিন্তু ইতিমধ্যেই আর-একটা ব্যাপার আবিষ্কার ক’রে মাণিক উদ্বেজিত

স্বরে বলল উঠল, “জয়, জয়! ওদের আলোগুলো যে আমাদের দিকেই এগিয়ে আসছে!”

সত্যই তাই! ছয়টা আলো ছলতে ছলতে জয়ন্তদের দিকেই অগ্রসব হচ্ছে! জয়ন্ত তাড়াতাড়ি বললে, “আলো নেবাও, আলো নেবাও! ওরা আমাদের আক্রমণ করতে আসছে!”

চৌকিদাররা চটপট আলো নিবিয়ে ফেললে।

তারপর ওদিককার আলোগুলো আসতে আসতে আবার থেমে পড়ল।

জয়ন্ত বললে, “এস, আমরা জলে নেমে খানিকটা এগিয়ে থাকি। আমাদের দলবল এসে পড়লেই আমরা ওদের আক্রমণ কবব। বন্দুক তৈরি রাখো, ওরা কাছে আসবার বা পালাবার চেষ্টা করলেই যথাসময়ে আমাদের আত্মরক্ষা বা আক্রমণ করতে হবে।”

জয়ন্ত ও মাণিকের সঙ্গে চৌকিদাররাও অত্যন্ত অনিচ্ছাসহেও জলের ভিতরে নামল। জল কোথাও প্রায় কোনর পর্য্যন্ত, কোথাও তার চেয়ে কম।

আঃ, সেই অস্বাভাবিক বৃষ্টি—আকাশে এত জলও থাকতে পারে! সারা প্রান্তর যেন সমুদ্রের ক্ষুদ্র সংস্ৰবণে পরিণত হয়েছিল এবং ঝড়ের উদ্দামতা তার মধ্যে রীতিমত তরঙ্গের পব তরঙ্গ সৃষ্টি করছে! ধারাপাতের রম্বম্ রম্বম্ ধ্বনির সঙ্গে জেগে আছে সেই সুবৃহৎ প্রান্তর-দীঘির পাগ্লা শ্রোতের কল্কল কল্কল শব্দ! সে জলের কী প্রচণ্ড টান! প্রতি পদেই সকলকে ঠেলে ফেলে দেবার চেষ্টা করছে! তার উপরে রাত্রির কালো রং এত পুরু যে, প্রান্তরের মাঝে মাঝে যে গাছগুলো দাঁড়িয়ে রয়েছে, একেবারে তাদের উপরে গিয়ে পড়ে থাকে না-খাওয়া পয়ান্ত কারুর অস্তিত্ব জানবার উপায় নেই!

\*বহুদূরে ছয়টা আলো কালো শৃঙ্গের কোলে কখনো দেখা দিচ্ছে, কখনো



“মাণিক, আবার সেই ভয়ঙ্কর ছয়!”

মিলিয়ে যাচ্ছে ! জয়ন্তের মনে হ'ল, আলোগুলো বেন তাদের চেয়ে উচুতেই রয়েছে !

জয়ন্তই সকলের আগে-আগে যাচ্ছিল। হঠাৎ সে পায়ের তলায় আর মাটি পেলো না এবং অতলের দিকে তলিয়ে গেল ! তাড়াতাড়ি জলের উপরে ভেসে উঠে সে বললে, “হুঁসিয়ার ! এখানে একটা পুকুর আছে !”

আন্দাজে আন্দাজে পুকুরের গভীরতা এড়িয়ে অচ্যদিক দিয়ে তারা আবার অগ্রসর হ'তে লাগল।

মাণিক সভয়ে ব'লে উঠল, “আনার গায়ের উপর দিয়ে সাপের মত কি-একটা সাঁৎ ক'রে চ'লে গেল !”

জয়ন্ত বললে, “সাপের মত বলছ কেন মাণিক, ওটা সাপ ছাড়া আর কিছুই নয় !”

একজন চৌকিদার বললে, “এ-সময়ে মাঝে মাঝে মাঠের জলে কুমীররাও ভেসে আসে !”

জয়ন্ত বললে, “হ্যাঁ, তারাও আর বাকি থাকে কেন ? কেবল কুমীর নয়। আমি শুনেছি বানের জলে বাঘ-ভাল্লুকও বাধা হয়ে সাঁতার কাটে !”

হয়টা আলো বেশ-খানিকটা কাছে এসে পড়েছে ! সেগুলো এদিকে-ওদিকে নড়ছে বটে, কিন্তু অচ্য কোনদিকে আর অগ্রসর হচ্ছে না।

জয়ন্ত বললে, “নবাব বোধহয় বুঝতে পেরেছে, আমরা তাদের সঙ্গেই দেখা করতে যাচ্ছি ! সে হয়তো দলবল নিয়ে আমাদের সঙ্গে যুদ্ধ করবার জন্তেই প্রস্তুত হয়ে আছে !”

মাণিক নিজের বন্দুকটা আরো জোরে চেপে ধরলে !

• আরো কিছুদূর এগিয়ে জয়ন্ত বললে, “নবাব খুব চালাক লোক বটে !



দেখছ মাণিক, আলোগুলো এখনো আমাদের কত উপরে নড়া-চড়া করছে ? এই মাঠের কোন-একটা উঁচু জায়গা নিশ্চয় দ্বীপের মত জলের উপরে জেগে আছে ! নবাব তার দল নিয়ে তারই উপরে উঠে আমাদের জন্তে অপেক্ষা করছে ! যুদ্ধ বাধ্লে আমাদেরই বিপদ !”

মাণিক ভাবতে লাগল, নবাবকে আজ তারা দেখেছে বটে, কিন্তু তার দলের লোকগুলো দেখতে কেমন ? অমিয় যে বর্ণনা করেছে, তাতে তো তাদের আকৃতি অমানুষিক বলেই মনে হয় ! চোন্ধিদার ঈশাকুও তাদের চেহারা অমানুষী কোন ভাব দেখে ভয়ে মারা পড়েছে ! এ রহস্যের কারণ কি ? কে তারা ?

এমন সময়ে পিছনে ছই-তিনবার বন্দুকের শব্দ হ'ল ।

সকলে ফিরে দেখলে, পিছনে—যেদিক থেকে তারা এসেছে সেইদিকে অনেকদূরে চারটে আলো দেখা দিয়েছে !

জয়ন্ত ও মাণিক আবার তিনবার বন্দুক ছুঁড়ে নিজেদের অস্তিত্বের কথা জানিয়ে দিলে, কারণ এই নতুন আলোগুলোর সঙ্গে আসছে যে তাদেরই বন্ধুরা, সে-বিষয়ে কোনই সন্দেহ নেই !

কিন্তু শত্রুদের আলোগুলো তখনো নিবে বা পালিয়ে গেল না ।

জয়ন্ত বললে, “নবাব কি বুঝেছে তা সেইই জানে ! এত লোক দেখেও সে ভয় পেলো না ? না, বানের জলে তার পালাবার পথ বন্ধ হয়ে গিয়েছে, তাই সে মরিয়া হয়ে আমাদের সঙ্গে লড়াই করবে ?”

মাণিক চোখের স্তম্ভে যেন স্পষ্ট দেখতে পেলো, কতকগুলো ভৌতিক মূর্তি দীর্ঘ দীর্ঘ বাহু বাড়িয়ে তাদের সকলকে এগিয়ে আসবার জন্তে সাগ্রহে আহ্বান করছে !

## সপ্তম পরিচ্ছেদ

### রক্তশৃঙ্গ মড়া

ঘুটঘুটে কালোর কোলে মিটমিটে আলোর মালা ! এতগুলো বন্দুকের আওয়াজ শুনেও মালাকররা মালা ছিঁড়ে পালিয়ে গেল না ।

অথচ তারা এত কাছে এসে পড়েছে !

মাণিক বললে, “জলের ভিতরে নিশ্চয়ই একটা উঁচু জমি আছে, অন্ধকারে দেখা যাচ্ছে না। কিন্তু সেই জমির উপরেই গাছপালার ভিতর থেকে যে ঐ আলোগুলো দেখা যাচ্ছে এটা এখন স্পষ্ট-বুঝতে পারছি। জয়, ওরা হয় পাগল নয় মরিয়া ! আমার মতে, আমাদের দল যখন সাড়া আর দেখা দিয়েছে, তখন তাদের জন্তো আরো কিছুক্ষণ অপেক্ষা করা উচিত। তারপর সবাই মিলে একসঙ্গে আক্রমণ করব।”

জয়ন্ত বললে, “তোমার পরামর্শই শুনব। আমাদের পুরোদলে থাকবে পঁচিশটা বন্দুক নিয়ে পঁচিশজন লোক। এদের নিয়ে দস্তুরমত একটা খণ্ড-যুদ্ধের আয়োজন করা যেতে পারে।”

তারা সেইখানে প্রায় বুক পর্য্যন্ত জলে ডুবিয়ে দাঁড়িয়ে সঙ্গীদের জন্তো অপেক্ষা করতে লাগল।

এতক্ষণ পরে আকাশের বজ্র, মেঘের বৃষ্টি ও ঝড়ের রুদ্রগতি শাস্ত ও ক্ষান্ত হবার চেষ্টা করলে। তারপর যখন সদলবলে মহম্মদ, সুন্দরবাবু, অমিয়, নিশীথ ও পরেশ এসে তাদের সঙ্গে যোগ দিলে, তখন বজ্র, বৃষ্টি ও ঝড় পৃথিবীর কাছ

থেকে বিদায় নিয়েছে বটে, কিন্তু অন্ধকারের নিবিড়তা ও প্রাস্তুর-সমুদ্রে বস্তার কলকল্লোল জেগে রইল আগেকার মতই।

সুন্দরবাবু এসেই জয়ন্তের সুবৃহৎ দেহের উপরে হেলে প'ড়ে হাঁপাতে হাঁপাতে ব'লে উঠলেন, “বাস্ রে বাস্! চকীর মত ছুটোছুটি ক'রে এক মিনিট যে ব'সে একটু জিরিয়ে নেব তারও উপায় দেখছি না। এই অগাধ সাগরে ব'সে পড়লেই ডুবে যাব আর ডুবে গেলেই ভেসে যাব! হুম্!”

মাণিক বললে, “ভয় কি সুন্দরবাবু, ভেসে গেলে আপনি তো চিং-সাঁতার কাটতে পারবেন!”

সুন্দরবাবু ধমক দিয়ে ব'লে উঠলেন, “ঠাট্টা কোরোনা মাণিক, এ-সময়ে ঠাট্টা-ফাট্টা ভালো লাগে না!”

মহম্মদ বললেন, “জয়ন্তবাবু, গুগুলো নিশ্চয়ই শত্রুদের আলো?”

—“তাই তো মনে হচ্ছে। নইলে এই দুর্ঘ্যোগে এখানে এসে দেয়ালী-উৎসব করবার সখ হবে কার?”

—“কিন্তু নবাবের আশ্পর্কী তো কম নয়! সে আলো জ্বলে ব'সে আছে, যেন আমাদের কোন তোয়াক্কাই রাখে না!”

সুন্দরবাবু বললেন, “ভূত আবার কবে মানুষের তোয়াক্কা রাখে? মানুষ হ'লে ওরা এতক্ষণে বাপ্ বাপ্ ব'লে পালিয়ে যেত!”

মহম্মদ বললেন, “রাতও আর বেশী নেই, কথায় কথায় সময় কাটাবারও আর দরকার নেই। চলুন, আমরা চারিদিকে ছড়িয়ে প'ড়ে এগিয়ে যাই, ওদের একেবারে ঘিরে ফেলি!”

সকলে অর্ধচন্দ্রাকারে সামনের উঁচু জমির দিকে এই অবস্থায় যতটা-সম্ভব

ভাড়াভাড়ি অগ্রসব হ'ল। আলোগুলো তবু নেব্বাব বা পালাবার চেষ্টা করলে না!

মহম্মদ বললেন, “এখান থেকে বন্দুক ছুঁড়ে আমরা অনায়াসেই ওদেব মানতে পারি। আচ্ছা, একবার বন্দুক ছুঁড়ে ওদের ভয় দেখানো যাক্!”

মহম্মদ ও তাঁর দেখাদেখি আরো কেউ কেউ বন্দুক ছুঁড়লেন, ওদিক থেকে তবু কোন উত্তরই এল না, ফিরে এল খালি তাঁদের নিজেদেরই বন্দুকগর্জনেব প্রতিধ্বনি! এবং বেপবোয়া আলোগুলো তখনো অচল!

সুন্দরবাবু রেগে তিনটে হয়ে বললেন, “ওরা ভৃত্যই হোক আর রাফসই হোক, ওদের আস্পর্শা আর আমি সহিতে পারছি না! আমরা পুলিশেব লোক—বিশেষ আমি হচ্ছি গিয়ে ক্যালকাটা পুলিশের লোক—আমাদের সঙ্গে চালাকি? আমি এইবাব সত্যি-সত্যি ওদের হাতের আলো টিপ্ ক'রে গুলি ছুঁড়ব।”

সুন্দরবাবু লক্ষ্য স্থির ক'রে হুইবাব বন্দুক ছুঁড়লেন। একটা আলো নিবে গেল, কিন্তু অন্য আলোগুলো তবু স'রে গেল না।

অমিয় বললে, “নাঃ, দেখছি ওরা এইবারে সত্যিই অবাক কববে, ওদের কি ভয়-ডব কিছুই নেই?”

মহম্মদ বললেন, “চল, আমরা সবাই এইবারে জমির ওপরে উঠে ওদের আক্রমণ করি!”

সুন্দরবাবু সন্দিক্ত স্ববে বললেন, “হুম। মহম্মদ-সায়েব, আমার বোধহয় অন্ধকারে ওরা আমাদের জন্তে কোন ফাঁদ পেতে রেখেছে! ঐ আলো-গুলো হচ্ছে টোপ্। এগুলো বিপদ হ'তে পারে।”

মহম্মদ বললেন, “হ্যাঁ, হ’তে পারে। তবু আমি এগুব। চল সবাই, :  
ছ সিয়ার !”

সবাই অগ্রসর হ’ল।

জয়ন্ত চুপিচুপি বললে, “মাণিক, আমার মনে একটা সন্দেহ জাগছে।”

—“কি ?”

—“হয়তো আমরা এখনি নিরেট গাধা ব’লে প্রমাণিত হব।”

—“তার মানে ?”

—“এই তো উঁচু জমির তলায় এসে দাঁড়িয়েছি। মহম্মদ-সায়ের উপরে  
উঠে গিয়েছেন। আলোগুলো এখনো জ্বলছে। না, এ অসম্ভব !”

জয়ন্ত ও মাণিক পাশাপাশি থেকে জমির উপরে উঠতে লাগল। তখনো  
কোন শত্রু কি বীভৎস মূর্তির সাড়া পাওয়া গেল না।

কিন্তু সাড়া পাওয়া গেল মহম্মদের। নীচে যারা ছিল তারা সবাই  
শুনলে, মহম্মদ বিপুল বিষ্ময়ে চোৎকার ক’রে বলছেন—“কেউ এখানে নেই,  
কেউ এখানে নেই !”

তারপরেই সুন্দরবাবুর কণ্ঠস্বর : “হুম্ ! গাছের ডালে খালি লঠনগুলো  
ঝুলছে ! আমাদের ভয়ে ভূতগুলো চম্পট দিয়েছে !”

উঁচু জমির উপরে জল ঝেঁটনি। বৃষ্টি-ভেজা জমির উপরে ব’সে প’ড়ে :  
জয়ন্ত বললে, “মাণিক, পূর্বদিকে মেঘের পর্দা ছিঁড়ে গিয়েছে !”

মাণিক বললে, “কিন্তু এ কি-রকম ব্যাপার ?”

জয়ন্ত পূর্বাকাশের দিকে স্থির-দৃষ্টিতে ত্রুাকিয়ে শান্ত মুহূ স্বরে বললে, :  
“প্রথম উবার স্বপ্নময় আলো ফুটছে। বর্ষা-প্রভাতে আলোকের নবজন্ম .কি  
মধুর !”

সুন্দরবাবু এসে বললেন, “এখন তোমার কবিত্ব বাখো জয়ন্ত! নবাব কোনদিকে গেল বল দেখি?”

—“যেদিকে বাত্রি গেছে সেইদিকে।”

—“কি বলছ হে?”

—“যারা রাত্রির অল্পচব তাবা প্রভাতের প্রতীক্ষা করে না। চেয়ে দেখুন, উষা এখন সিঁথায় সিঁদূর পবছে। নাশিক, ভৈবববাগে এখন একটা ভজন গাইতে পাবো?”

বঙ্গুর মাথা হঠাৎ খাবাপ হয়ে গেছে ভেবে জ্বলন্ত মূর্খের দিকে নাশিক কটমট্ ক’বে তাকিয়ে দেখলে।

জয়ন্ত হঠাৎ অট্টমস্তে উচ্ছ্বসিত হয়ে উঠল। সুন্দরবাবু ভয় পেয়ে চুপে পিছিয়ে গেলেন। তিনিও ঠাট্টের মিনেণ, ডবল পাগল হ’য়ে গিয়েছে, হয়তো এখন সে তাঁকে কামড়ে দেবে!

মহম্মদ আশ্চর্য্য হয়ে বললেন, “জয়ন্তবাবু, এত হাঙ্গামা কেন? এটি কি হাসবাব সময়?”

জয়ন্ত হাসতে-হাসতেই বললো, “বলেন কি মহম্মদ-সাহেব! এত-বড় প্রহসনেও হাসব না? ঐ লঠনগুলো অ’লো নয়, আ’লোব মতই আমাদের বিপথে চালনা ক’বে সাত ঘাটের জল খাইয়ে বাদা ঘাঁটিয়ে এখানে এনে ফেলেছে! বুঝছেন? নবাব আমাদের চেয়ে চেব-বশী ঢালাক! সে অন্ধক’বে গাভের ডালে এই লঠনগুলো ঝুলিয়ে লেখে গিয়েছে কেবল আমাদেরই দৃষ্টি আকর্ষণ করবার জ্যে।”

—“অর্থাৎ—”

—“অর্থাৎ আমরা যখন আলোর দিকে ছুট আসব, তাবা তখন অগ্নিদিকে

ছুটে পালিয়ে কলা দেখাবার সময় পাবে। বাহাছুর নবাব, বাহাছুর! কাজেই এখন প্রভাতের সূর্যোদয় দেখা ছাড়া আমাদের আর কিছুই করবার নেই!”

সুন্দরবাবু বললেন, “আমি ঐ হতভাগা সূর্যোদয় দেখতে চাই না।”

—“তাহ’লে কি করবেন?”

—“আমি এখন ঘুমোতে চাই।”

—“তাহ’লে ঘুমিয়ে পড়বার আগে নবাবের নামে একবার জয়ধ্বনি দিন!”

—“হুম্। নিজের মুখে চুপকালি মাখিয়ে শত্রুর নামে জয়ধ্বনি দেবার ইচ্ছে আমার নেই।”

—“কিন্তু সুন্দরবাবু, আমার গুটুকু উদারতা আছে। আমাদের মত এতগুলো মাথাকে যে পঁাকে ডুবিয়ে দিয়ে গেল, সে অসাধারণ ব্যক্তি! এমন-ধার! অসাধারণ শত্রুর সঙ্গে লড়াই করতে নেমে যদি কেলা ফতে করতে পারেন, তাহ’লে নেই জয়ই হবে অতুলনীয়! এতদিন পরেই তো খেলা জ’মে উঠল! এখন দেখা যাক কে হারে কে জেতে!”

উপর-উপরি বিষম কৰ্মভোগের পর প্রায় সকলেরই শরীরের অবস্থা হ’ল এমন শোচনীয় যে, তার পর দিন কেউ আর বিছানা থেকে উঠবার নাম করলে না।

তার পরের দিনের রাত্রি প্রভাত হ’লে পর মাণিক বিছানা থেকে উঠে দেখলে জয়ন্তের শয্যা শূন্য! সে কখন উঠে বেরিয়ে গিয়েছে।

সুন্দরবাবুও তখন গাত্রোথান ক’রে দাড়ী কামাতে ব’সে গিয়েছেন।

এমন সময়ে মহম্মদ এসে ঘরের ভিতরে ঢুকলেন ।

মাণিক সুধোলে, “কি মহম্মদ-সায়েব, এর মধ্যে নবাবের আর কোন খবর পান নি ?”

তিনি বললেন, “না । কিন্তু এখানকার এক মুসলমান দোকানীর একটি মেয়ে চুরি গিয়েছে !”

মাণিক উত্তেজিত স্বরে বললে, “আবার মেয়ে-চুরি !”

—“হ্যাঁ । কিন্তু এবারে কেবল মেয়ে-চুরি নয়, সঙ্গে সঙ্গে খুন !”

সুন্দরবাবু চম্কে উঠে দাড়ীর উপরে ক্ষুরের কোপ্ বসাতে বসাতে ভারি সামলে গেলেন ।

মহম্মদ বললেন, “কাল রাত্রে দোকানী বাসায় ছিল না । ঘরের ভিতরে তার প্রৌঢ়া স্ত্রী আর সতেরো বছরের মেয়ে ঘুমোচ্ছিল । গভীর রাত্রে পাড়ার লোকে শুনতে পায়, দোকানীর ঘরের ভিতর থেকে মেয়ে-গলায় চীৎকার হচ্ছে ! পাড়ার লোক যখন বাইরে বেরিয়ে আসে চীৎকার তখন থেমে গেছে । কিন্তু চীৎকারের বদলে তারা তখন আর একটা শব্দ শুনতে পেলো । কারা যেন সমতালে পা ফেলে অন্ধকারে গা ঢেকে চ’লে যাচ্ছে । এই পায়ের শব্দের কথা এখন এ-অঞ্চলের চারিদিকে ছড়িয়ে পড়েছে । সেই শব্দ শুনেই পাড়ার লোকের সমস্ত সাহস উপে যায়,—সকলে আবার যে যার ঘরে ঢুকে খিল্ এঁটে দেয় । আজ সকালে উঠে সবাই দোকানীর ঘরে ঢুকে দেখে, তার মেয়ে অদৃশ্, আর তার বউ ম’রে কাঠ হয়ে মেঝের উপরে প’ড়ে রয়েছে !”

সুন্দরবাবু ক্ষুর নামিয়ে ঘুরে ব’সে বললেন, “হুম্ । আধখানা দাড়ী, আমি পরে কামাব, আগে সব গল্পটা শুনে নি !”





ভারি সামলে গেলেন

মহম্মদ বললেন, “খবর পেয়ে আমি ঘটনাস্থলে গিয়ে হাজির হলুম। ভয়ানক দৃশ্য! একটি আধবয়সী স্ত্রীলোকের মৃতদেহ, আর তার আতঙ্ক-ভরা চোখ-মুখ দেখে আমার ঈশাক-বেচারীর মুখ মনে পড়ে গেল! ঈশাকের মুখে-চোখেও ঠিক এই রকম বীভৎস ভয়ের ভাব মাখানো ছিল। স্ত্রীলোকটির গলায় একটা মস্ত ছাঁদা, কিন্তু ঘরের কোথাও রক্তের একটুও চিহ্ন নেই। অথচ তার দেহ একেবারে সাদা, যেন সমস্ত রক্তই সেই গলার ছাঁদা দিয়ে বেরিয়ে গিয়েছে! ঘরের কোথাও রক্ত নেই, দেহেও রক্ত নেই—অথচ গলায় অত-বড় ছাঁদা! আমি তো হতভম্ব হয়ে গিয়েছি!”

সুন্দরবাবু বললেন, “আনি বরাবরই বলছি এ-সব ভুলভুলে কাণ্ড, তা তোমরা কেউ তো আমার কথায় কাণ পাতবে না!”

মহম্মদ বললেন, “তা যদি হয়, তবে এ-সব কাণ্ডের সঙ্গে নবাবের কোন সম্পর্ক নেই। কারণ নবাবকে আমরা গ্রেপ্তার করেছিলাম,—সে আমাদেরই মত রক্ত-মাংসের মানুষ।”

নিজের বিছানায় শুয়ে শুয়ে অমিয়ও সব শুনাছিল। এখন সে উঠে বসে বললে, “কিন্তু আলিনগরে যে-ছয়টা মূর্তি তালে তালে পা ফেলে এগিয়ে এসে আমাদের আক্রমণ করেছিল, আমাদের বন্দুকের গুলিও যাদের কোনই ক্ষতি করতে পারে নি, তাদের চেহারাও হিন অবিবল সাধারণ মানুষের মত!”

পারেশ ও নিশীথও উঠে বসে বললে, “আমরাও এ-কথায় সায় দি।”

মহম্মদ বললেন, “সমস্ত ব্যাপারই রহস্যময়। নবাব কেনন করে পালাল? কে তার ঘরের দরজা খুলে দিলে? ঈশাক কেন মারা পড়ল? পশু রাত্রি গাছের ডালে আলো ঝুলিয়ে কারা আমাদের চোখে ধুলো দিলে?”

কারা মেয়ে চুরি করে? কেন করে? পাড়া জাগিয়ে কারা তালে তালে পা ফেলে চলে যায়? এ-সব প্রশ্নের কোন জবাব নেই। আমি স্থির করেছি, আজই সদরে রিপোর্ট পাঠিয়ে সাহায্য চাইব।”

অমির বললে, “কিন্তু এই সব রহস্যেরই মূল আছে সেই আলিনগরের ভগ্নস্তূপের মধ্যে।”

মহম্মদ বললেন, “বেশ, সদর থেকে সাহায্য পেলে আমরা সদলবলে আলিনগরেও গিয়ে হাজির হ’তে পারব।”

এমন সময়ে জয়ন্ত ফিরে এল। তার গম্ভীর মুখে চিন্তার রেখা।

সুন্দরবাবু ব’লে উঠলেন, “জয়ন্ত, জয়ন্ত! কী খবর!”

জয়ন্ত ভুরু কুঁচকে সুন্দরবাবুর মুখের পানে তাকিয়ে বললে, “এমন কি ভয়ানক খবর থাকতে পারে, যা আমি জানিনা?”

—“হুম্! এবারে মেয়ে-চুরির সঙ্গে মেয়ের না খুন!”

—“আমি জানি। এইমাত্র ঘটনাস্থল থেকেই ফিরে আসছি।”

—“মহম্মদ-সায়ের সদর থেকে সাহায্য আনিয়ে আলিনগর আক্রমণ করবেন।”

—“কবে মহম্মদ-সায়ের?”

—“দিন-চারেক পরে।”

জয়ন্ত আর কিছু না ব’লে মাণিককে ইসারা ক’রে আবার ঘরের বাইরে গেল।

মাণিক তার কাছে গেলে পর জয়ন্ত বললে, “আমি আরো দিন-চারেক অপেক্ষা করতে পারব না। বিশেষ, এত লোকজন নিয়ে শোভাযাত্রা ক’রে আলিনগরে গেলে আসামীর সাবধান হয়ে পালাতে পারে।”

—“তুমি কি করতে চাও ?”

—“তুমি আর আমি কাল রাত থাকতে উঠে চুপিচুপি আলিনগরে ঘাত্রা করব।”

—“সে কি, পায়ে হেঁটে ? আলিনগর যে এখান থেকে ত্রিশ-পঁয়ত্রিশ মাইল দূরে !”

—“না, এখানে আমার পরিচিত এক জমিদার-বন্ধু আছেন শুনে তাঁর সঙ্গে দেখা করতে গিয়েছিলুম। তিনিই মোটর দেবেন। অনেক সন্ন্যাসীতে গাজন নষ্ট হয়, তুমি-আমি ছুজনে লুকিয়ে যেতে পারব। আগে নিজেরা খোঁজ নিয়ে আসি, তারপর দরকার হ'লে মহম্মদ-সায়েবের সাহায্য নেব। মাগিক, আজ যে অমাহুষিক কাণ্ড স্বচক্ষে দেখে এসেছি, তারপর আর এখানে হাত-পা গুটিয়ে অপেক্ষা করা চলে না ! সেই রক্তশূণ্য মড়ার মুখ চিরদিন আমার মনে থাকবে ! গলার ছঁাদা দিয়ে নিশ্চয় রক্তের বরণা ধ'রেছিল, কিন্তু সে রক্ত কোথায় গেল ? আর তার গলার ক্ষতটা কি-রকম দেখতে জানো মাগিক ? যেন কোন রক্তলোলুপ জন্তু ধারালো দাঁত দিয়ে তার গলা কামড়ে ধ'রেছিল—আর তার দেহের সমস্ত রক্ত সেইই প্রাণপণে শুষে পান ক'রে ফেলেছে !”

---

## অষ্টম পরিচ্ছেদ

### প্রেতের প্রতিহিংসা

ভোর-বেলায় মোটর ছুটে চলেছে আলিনগরের দিকে ।

জয়ন্ত গাড়ীর ‘হুইল’ ধ’রে চারিদিকে তাকাতে তাকাতে বললে, “মাণিক, মাঠে মাঠে আর পথের মাঝে মাঝে দেখছি এখনো মন্দ জল জ’মে নেই । আমরা বেলা ছুটো-আড়াইটের আগে আলিনগরে গিয়ে পৌঁছতে পারব ব’লে মনে হচ্ছে না ।”

মাণিক বললে, “কিন্তু আমরা হুজনে আলিনগরে গিয়ে কি করব ? সেখানে তুমি কী দেখবার আশা কর ?”

—“তোমার প্রথম প্রশ্নের উত্তর হচ্ছে : গোয়েন্দার কাজ দল বেঁধে চলে না । তাতে শত্রুরা সাবধান হবার সুযোগ পায় । আমার দৃঢ়বিশ্বাস, প্রথম দিনেই আমাদের দলে যদি বেশী লোক না থাকত, তাহ’লে এতক্ষণ সমস্ত রহস্য হয়তো আমরা আবিষ্কার ক’রে ফেলতে পারতুম । তোমার দ্বিতীয় প্রশ্নের উত্তর হচ্ছে : আলিনগরে গিয়ে যে কি দেখব, সেটা আমি নিজেই জানি না । গত পশু’ পর্য্যন্ত এই রহস্য সম্বন্ধে আমার স্বে-ধারণা ছিল, গেল-কাল সকালে সেই রক্তহীন মৃতদেহ দেখবার পর থেকে সে-ধারণা একেবারেই বদলে গেছে । মাঝে মাঝে এখন মনে হচ্ছে, হয়তো সুন্দরবাবুর সন্দেহই সত্য, হয়তো এই-সব মেয়েচুরির মধ্যে অলৌকিক কোন ব্যাপারই আছে !”

মানিক চকিত কণ্ঠে বললে, “অলৌকিক বলতে তুমি কি বুঝেছ ?  
ভৌতিক ব্যাপার ?”

জয়ন্ত বললে, “ভূত বলতে লোকে যা মানে, আমি তা মানি না। ভূতে  
বেছে বেছে খালি মেয়ে চুরি করবে কেন ? তবে ভূতে যে মানুষ চুরি করে  
এমন একটা বিলাতী গল্প আমি প’ড়েছিলুম। আলিনগর এখন অনেক  
দূরে। সময় কাটাবার জন্যে তুমি যদি সেই গল্পটা শুনতে চাও, আমি বলতে  
রাজি আছি। কিন্তু মনে রেখো, এটা গল্প ছাড়া আর কিছু নয়।”

মানিক মোটরের একটা কোণ নিয়ে আরাম করে ব’সে বললে, “খল।”

জয়ন্ত গাড়ীর গতি একবার থামিয়ে, রূপোর শামুকের ভিতর থেকে এক  
টিপ্-নস্র নিয়ে নাকে গুঁজে গল্প আরম্ভ করলে :

লগুন সহরের পথ। শীতার্ভ রাত্রি। একখানা বাস ছুটেছে—আজকের  
মত এই তার শেষ যাত্রা। বাসের ভিতরে নীচের তালার লোকজন  
বেশী নেই।

দোতালার কেউ উঠেছে ব’লে কণ্ডাক্টরের মনে হ’ল না। তবু একবার  
নিশ্চিত হবার জন্যে সে বাসের দোতালায় গিয়ে উঠল।

সামনের আসনে একজন আরোহী !

কণ্ডাক্টরের বিশ্বাসের সীমা রইল না ! এই যাত্রীটি তার চোখকে ফাঁকি  
দিয়ে কখন উপরে উঠে ব’সে পাড়েছে ?

যাত্রী মাথার টুপীটা মুখের উপরে টেনে নামিয়ে দিয়েছে এবং ‘মাক্‌লার’  
ও টকাটের কলার দিয়ে মুখের নীচের দিকটা ঢেকে ফেলেছে—শীতের হাড়া-

কাঁপানো হাওয়ার চোট সামলাবার জগ্গে। স্থির ভাবে ব'সে যেন আড় হযেই সে সামনের দিকে তাকিয়েছিল।

বোধ হয় সে কণ্ডাক্টরের পায়ের শব্দ শুনতে পেয়েছিল। কারণ সে ছ আঙুলে একটি আনী ধ'রে হাত বাড়িয়ে ব'সে আছে! \_\_\_\_\_

কণ্ডাক্টর বললে, “ওঃ, ভারি ঠাণ্ডা রাত মশাই!”

যাত্রী জবাব দিলে না।

—“কোথায় যাবেন?”

—“ক্যারিক্ ষ্ট্রীট।”

যাত্রীর উচ্চারণ অদ্ভুত। কণ্ডাক্টর আবার সুধলে, “কোথায় যাবে বললেন?”

—“ক্যারিক্ ষ্ট্রীট—ক্যারিক্ ষ্ট্রীট—”

—“আচ্ছা, আচ্ছা, আমি জানি—অন্তবার আর বলতে হবে না!”—  
ব'লেই কণ্ডাক্টর যাত্রীর হাত থেকে আনীটা টেনে নিলে।

যাত্রী একটুও না ফিরে বললে, “জানো? কী জানো, তুমি?”

কিন্তু কণ্ডাক্টরের বুকের ভিতর পর্যাস্ত তখন শিউরে-শিউরে উঠছে আনীটা কি অস্বাভাবিক ঠাণ্ডা! যেন সেটাকে জমাট বরফের ভিতর থে টেনে বার করা হয়েছে!

টিকিট কেটে কণ্ডাক্টর যাত্রীকে হাত বাড়িয়ে দিতে গেল।

যাত্রী বললে, “যেখানে আনী ছিল টিকিটখানা সেইখানে গুঁজে দাও।”  
কেন তা সে জানে না, কিন্তু কণ্ডাক্টরের ইচ্ছা হ'ল না যে যাত্রীর হা হাত দেয়। তার হাতখানা আড়ষ্ট, বোধ হয় পক্ষাঘাতে পঙ্গু। টিকিটখা কোনরকমে গুঁজে দিয়ে কণ্ডাক্টর বললে, “কেমন, পেয়েছেন জগন্নাথ-মশাই

তাকে ঠুঁটো জগন্নাথ ব'লে কোঁতুক করা হচ্ছে ভেবেই বোধ হয় যাত্রী ললে, “তুমি আর আমার সঙ্গে কথা কয়ো না।”

—“কে কথা কইতে চায়” ব'লে কণ্ডাক্টর নেমে গেল।

বাস ক্যারিক ষ্ট্রীটের মোড়ে এসে থামল। কণ্ডাক্টর চ্যাঁচাতে লাগল—  
ক্যারিক ষ্ট্রীট! ক্যারিক ষ্ট্রীট!”

কিন্তু দোতলা থেকে আড়ষ্ট যাত্রী নামবার নাম করলে না।

কণ্ডাক্টর আপন মনে বললে, “ও যদি সারারাত টঙে ব'সে থাকতে চায়, কুক! আমি আর ওপরে উঠছি না!.....এও হ'তে পারে, হয়তো কখন।  
নেমে গিয়েছে, আমি দেখতে পাইনি।”

\*

\*

\*

\*

সেই দিন সন্ধ্যাতেই ক্যারিক ষ্ট্রীটের একটি হোটেলের সামনে এসে দাঁড়াল  
কখনা ট্যাক্সি।

ট্যাক্সি থেকে মোটমাট নিয়ে যে ভদ্রলোকটি নামলেন তাঁর নাম মিঃ  
মবোল্ড্। কয়েক বছর আগে তিনি এই হোটলেই ঘর ভাড়া নিয়ে বাস  
কতেন। তারপর অষ্ট্রেলিয়ায় গিয়েছিলেন ব্যবসা-বাণিজ্য করতে। এত-  
ল পরে আবার তাঁর পুরাণো হোটলে ফিরে এলেন।

হোটেলের কর্তা তাড়াতাড়ি অভ্যর্থনা করতে এলেন।—“এই যে মিঃ  
মবোল্ড্! জানি, ব্যবসায় লক্ষ্মীলাভ ক'রে আবার আপনি আমাদের  
ছেই ফিরে আসবেন!”

মিঃ রামবোল্ড্ হাসিমুখে বললেন, “হ্যাঁ, আমি লক্ষ্মীলাভ করেছি। আজ  
মিঃ সন্ত ধনীই বটে।”



হোটেলের কর্তা বললেন, “কিন্তু তবু আপনি যে আমাদের মত গরীবাদ, ভোলেন নি, এইটেই যথেষ্ট !”

—“কি করে ভুলব ? এ হোটেল যে আমার নিজের বাড়ীর মত প্রিয় ! এখানকার পুরাণো চাকর ক্লুটসাম্ কোথায় ! এখানেই বাজ করে ? বেশ বেশ, তাকেই আমি চাই !”

রাত্রে নিঃ রাম্বোল্ড্ নিজের ঘবে বসে ক্লুটসামের সঙ্গে কথা কইছিলেন। ক্লুটসাম জিজ্ঞাসা করছিল, “আচ্ছা হুজুব, অষ্ট্রেলিয়া দেশটা কেমন ?”

—“ভালোই।”

—“সেখানকার আইন বোধ হয় এখানকার মত কড়া নয় ?”

—“কি-রকম ?”

—“ধরুন, আপনি যদি সেখানে কোন মানুষ খুন করেন, তাহলে পুলিশ আপনাকে ধরে ফাঁসি দেবে তো ?”

নিঃ রাম্বোল্ড্ অত্যন্ত-বেশী চমকে উঠলেন। শুকনো গলায় থতোমতে খেয়ে বললেন, “আমিই বা মানুষ খুন করব কেন, আর আমাকেই বা ফাঁসি দেবে কেন ?”

—“না হুজুব, আমি কথার কথা বলছি ! বাপরে, মানুষ খুন করার ক'বিপদ ! পুলিশ ফিরবে পাছে পাছে—”

রাম্বোল্ড্ বাধা দিয়ে জোবে জোবে বললেন, “কেন, পুলিশ পালা ফিরবে কেন ? যদি আমি কারকে খুন কবি, তার লাস লুকিয়ে ফেলি, বেশী সাক্ষী না থাকে, তাহলে পুলিশ জানতে পারবে কেমন করে ?”

—“কিন্তু হুজুব, যাকে খুন করেছেন সে যদি ভূত হয় ? প্রতিশোধ নেবার জন্য আপনাকে খুঁজতে আসে ?”

রামবোল্ডের মুখ ভয়ে বিবর্ণ হয়ে গেল। তিনি তাড়াতাড়ি বলে ঠঠলেন, “থামো, থামো !”

ক্লুটসাম্ আশ্চর্য্য হয়ে বললে, “ওকি হুজুর, আপনি অমন করছেন কেন ? আমি কথার কথা বলছি !”

—“আমার গলা শুকিয়ে গেছে ! শীগগির এক গেলাস জল আনো !”

ক্লুটসাম্ তখনি জল এনে দিলে। রামবোল্ড জল পান করে অল্প কথা পড়ে বললেন, “আচ্ছা ক্লুটসাম্, তোমাদের হোটেল এখন কেমন চলছে ?”

—“খুব ভালো চলছে হুজুর ! এই আজকের কথাই ধরুন না ! আজ ত্রে যদি কেউ এসে ডবল টাকাও দিতে চায়, তাহলেও তাকে আমরা ঘর দিতে পারব না। হোটেলের কোন ঘরই খালি নেই !”

—“ক্লুটসাম্, দেখছ আজকের রাত কি ঠাণ্ডা ? বাইরে বরফ পড়ছে। আজ কোন বেচারী যদি এখানে এসে ঘর না পায়, তাহলে তার কপ্টের আর শীমা থাকবে না ! আমার তো দুটো ঘর, দুটো বিছানা। আজ যদি সত্যিই কউ আসে, তাকে তাড়িয়ে দিও না, অন্তত আজকের জন্মেও তাকে আমি আমার একটা বিছানা ছেড়ে দিতে রাজি আছি !”

—“আচ্ছা হুজুর !”

\*

নাথ-রাত্রি। দেউড়ার ঘন্টাটা হঠাৎ খুব-জোরে খুব-তাড়াতাড়ি বেজে ঠিল—একবার, দুইবার, তিনবার !

হোটেলের দ্বারবান অবাক হয়ে ভাবলে, এই তুষার-ঝরা নিশুত রাতে কে প্রতিধি বাইরে থেকে এল !

আবার সেইরকম খুব-জোরে আর খুব-তাড়াতাড়ি তিনবার ঘন্টাধ্বনি !

দ্বারবান বিরক্ত হয়ে গজগজ করতে করতে দেউড়ীতে গিয়ে দরজা খুলে দিল।

ভিতরে এসে দাঁড়াল এক অদ্ভুত মূর্তি! তার মাথার টুপিটা মুখের উপর টেনে নামানো, আর গলার কলারটা টেনে চিবুকের উপরে তুলে দেওয়া। নর্কাস ঢাকা মস্ত-বড় বলবলে এক কালো মিশ্রনিশে ওভার-কোটে। ওভার-কোটের এক-দিকটা ঠেলে বেবিয়ে রয়েছে—বোধ হয় তার হাতে একটা বড় চূপড়ী কিম্বা একটা ব্যাগ আছে।

দ্বারবান বললে, “সেলাম হুজুর! আপনার কি দরকার?”

আগন্তুক কোন জবাব না দিয়ে এক কোণে একটা টেবিলের দিকে এগিয়ে গেল। তারপর বললে, “আমি আজকের রাতের জন্মে হোটেলের একখানা ঘর চাই।”

—“হুজুর, আজ যে হোটেলের সব ঘর ভর্তি হয়ে গেছে!”

—“তুমি কি ঠিক জানো?”

—“হ্যাঁ হুজুর!”

—“কিন্তু ভালো ক’রে ভেবে দেখ।”

—“ভালো ক’রে ভাববার দরকার নেই হুজুর! আমি জানি।”

আগন্তুক এতক্ষণে মুখ তুলে দ্বারবানের দিকে দৃষ্টিপাত করলে। তারপর ধীরে ধীরে বললে, “আর একবার ভালো ক’রে ভেবে দেখ দেখি!”

কেন, তা সে জানে না, কিন্তু দ্বারবানের মনে হ’ল, তার দেহের ভিতর থেকে যেন কি-একটা জিনিষ—হয়তো তার জীবনই—ঠেলে ঠেলে বাইরে বেরিয়ে আসতে চাইছে! সে ভয়ানক ভয় পেয়ে ব’লে উঠল, “দাঁড়ান হুজুর! আমি জেনে এসে বলছি!”

সে হোটেলের ভিতর-দিকে চ'লে গেল। কিন্তু খানিক পরে খবর নিয়ে ফিরে এসে আগন্তুককে আর দেখতে পেল না! কোথায় গেল সে? হোটেলের ভিতরে, না বাইরে?

ঠাৎ তার চোখ পড়ল আগন্তুক যেখানে দাঁড়িয়েছিল সেইখানটায়। সেখানে মেঝের উপরে লম্বা একটুকরো বরফ প'ড়ে চক্‌চক্ করছে।

তার বিশ্বয়ের আর অবধি রইল না! চারিদিক ঢাকা, তবু এখানে বরফ এল কেমন ক'রে?

সেই কনকনে শীতের রাতেও দ্বারবানের কপালের উপরে ঘামের ফোঁটা দেখা দিলে! রুমাল বার ক'রে কপালের ঘাম মুছতে মুছতে নিজের মনেই সে বললে, “যাকে এইমাত্র দেখলুম, কে সে? মানুষ?”

দোতালার হুল-ঘরে দাঁড়িয়ে ক্লুটসাম্‌ দেখলে, সিঁড়ি দিয়ে এক অচেনা ভদ্রলোক নিঃশব্দে উপরে উঠে আসছেন।

এগিয়ে এসে বললে, “কে আপনি? কাকে চান?”

—“তুমি মিঃ রামবোল্ডকে জিজ্ঞাসা ক'রে এস, আজ রাতে তাঁর অণু বিছানাটা আমি ব্যবহার করতে পারব কিনা?”

ক্লুটসাম্‌ ভ্যাবাচ্যাকা খেয়ে আগন্তুকের মুখের পানে তাকালে। মিঃ রামবোল্ডের বাড়তি বিছানার কথা এই অচেনা লোকটি কেমন ক'রে জানতে পারলে? কিন্তু সে কথা নিয়ে বেশীক্ষণ মাথা না ঘামিয়ে সে আগন্তুকের অনুরোধ রাখবার জন্তে ভিতর দিকে চ'লে গেল। অল্পক্ষণ পরে ফিরে এসে বললে, “মিঃ রামবোল্ড আপনার নাম জানতে চাইলেন!”

আগন্তুক পকেট থেকে বার করলে, খবরের কাগজ থেকে কেটে নেওয়া একটুকরো কাগজ। সেই কাগজের টুকরোটা এগিয়ে দিয়ে সে বললে, “মিঃ



“আপনার কি দরকার ?”

রাম্বোল্ডকে এটা দিয়ে এস। আর তাঁকে জানিয়ে আমার নাম হচ্ছে, জেমস্ হাগ্‌বার্ড।”

ক্লুটসাম্ সেই কাগজখানা পড়তে পড়তে আবার হোটেলের ভিতর-দিকে চলে গেল। তাতে লেখা রয়েছে—

“অষ্ট্রেলিয়ার সিড্‌নি সহরের মিঃ জেমস্ হাগ্‌বার্ড্ কোথায় অদৃশ্য হয়ে-ছিলেন, এতদিন সে খোঁজ পাওয়া যাচ্ছিল না। সংপ্রতি একটা জঙ্গলের ভিতর থেকে তাঁর মৃতদেহ পাওয়া গিয়েছে। বন্দুকের গুলিতে তিনি মারা পড়েছেন। এখন প্রকাশ পেয়েছে, মিঃ রাম্বোল্ড্ নামে তাঁর এক বন্ধুকে নিয়ে তিনি ঐ জঙ্গলের মধ্যে প্রবেশ করেছিলেন। কিন্তু সেইদিন থেকে মিঃ রাম্বোল্ডেরও আর কোন সন্ধান পাওয়া যাচ্ছে না।”

একটু পরে ক্লুটসাম্ আবার ফিরে এল। তারপর তফাতে দাঁড়িয়ে ভয়ে ভয়ে বললে, “মিঃ রাম্বোল্ড্ বললেন—আপনি নরক থেকে এসেছেন, আবার নরকেই বিদায় হোন!”—এই বলেই সে তাড়াতাড়ি পালিয়ে গেল।

মিনিট-পাঁচেক পরেই রাম্বোল্ডের ঘর থেকে ভেসে এল ঘন ঘন বিষম আর্দ্রনাদ ও ভীষণ গর্জন-ধ্বনি!

ক্লুটসাম্ ঠক্ ঠক্ করে কাঁপতে কাঁপতে সেইদিকে ছুটে গেল। কিন্তু ঘরের ভিতরে নেই জনপ্রাণী!

ঘরের বিছানা, চেয়ার ও টেবিল প্রভৃতি উন্টেপাণ্টে ছড়িয়ে পড়ে রয়েছে এবং রক্তের দাগে চারিদিক হয়ে উঠেছে ভয়ানক! এবং ঘরের ঠিক মাঝ-খানেই মেঝের উপরে পড়ে চক্ চক্ করছে, ইঞ্চিকয়েক লম্বা একটুকুরো বরফ!

## প্রেতের প্রতিহিংসা



রাম্বোল্ডের সঙ্গে ক্লুটসামের আর কখনো দেখা হয় নি।

কিন্তু সেই রাতে হোটেলের সামনের রাস্তায় যে কনষ্টেবল পাহারা দিচ্ছিল, সে একটা সন্দেহজনক দৃশ্য দেখেছিল।

কালো ওভারকোট-পরা একটা আড়ষ্ট মূর্তি তুষার-বৃষ্টির মধ্য দিয়ে হন্ হন্ করে এগিয়ে যাচ্ছে এবং তার কাঁধে রয়েছে মস্ত মোটের মতন কি-একটা জিনিষ !

কনষ্টেবল তাকে ধরবার জন্তে তাড়াতাড়ি ছুটে গিয়েছিল, কিন্তু খানিক দূর গিয়ে আর তাকে দেখতে পায়নি।

মাণিক বললে, “তাহলে ঘটনাটার অর্থ দাঁড়াচ্ছে এই যে, মিঃ জেম্‌স্‌ হাগ্‌বার্ডকে খুন করে মিঃ রাম্বোল্ড্‌ অষ্ট্রেলিয়া থেকে পালিয়ে এসেছিলেন। তারপর মিঃ হাগ্‌বার্ডের প্রেতাঙ্গা প্রতিহিংসা নেবার জন্তে বিলাতে এসে, মিঃ রাম্বোল্ডকে হত্যা করে তার দেহ নিয়ে নরকে ফিরে গেল। তুমি কি বলতে চাও, এখানেও মেয়ে চুরি করেছে ভূতেরা ?”

জয়ন্ত গাড়ী চালাতে চালাতে গল্প বলছিল। সে মাথা নেড়ে বললে, “পাগল ! আমি বললুম গালগল্প,—কেবল খানিকটা সময় কাটাবার জন্তে ! তার সঙ্গে এখানকার মেয়ে-চুরির কোনই সম্পর্ক নেই !.....এখন এ-সব কথা থাক—ঐ দেখ, সামনেই আশ্বিনগরের ভাঙা বাড়ীগুলোর এলোমেলো চূড়া দেখা যাচ্ছে ! এদিকে পথেই পড়েছে নদী। গাড়ী নিয়ে আর এগুবার উপায় নেই, এগুবার দরকারও নেই। গাড়ীখানাকে একটা ঝোঁপের মধ্যে লুকিয়ে রেখে এইবারে আমাদের পদব্রজে এগুতে হবে।”

মোটর থামিয়ে ছুজনে নামল। তারপর গাড়ীখানাকে লুকিয়ে এবং চারিদিকে সতর্ক দৃষ্টি রেখে অগ্রসর হ'ল।

কিন্তু পথ যেখানে নদীর ধারে গিয়ে শেষ হয়েছে, সেইখানে বালির উপরে পাওয়া গেল আবার-সেই ছয়-জোড়া পায়ের দাগ !

জয়ন্ত হাঁটু গেড়ে ব'সে খানিকক্ষণ ধ'রে পায়ের দাগগুলো পরীক্ষা করলে। তারপর মুখ তুলে বললে, “মাণিক, এবারের পায়ের দাগে বিশেষত্ব আছে। দাগগুলো বড়-বেশী গভীর হয়ে বালির ভিতরে ব'সে গেছে। যেন এরা সকলে মিলে কোন-একটা ভারি মোট বহন ক'রে নিয়ে গিয়েছে।”

মাণিক চমকে উঠে বললে, “ভারি মোট ! কী হতে পারে সেটা ?”

—“হয়তো কোন মানুষের—অর্থাৎ স্ত্রীলোকের দেহ ! নয়তো অস্ত্র-কিছু ! সেটা যাই-ই হোক, কিন্তু আমাদের অদৃষ্টের খুব জোর বলতে হবে ! এসেই এই দাগগুলো চোখে প'ড়ে গেল ! এ সূত্র আর ছাড়ছি না, কারণ এই সূত্র ধ'রেই এবার নিশ্চয়ই সেই ছয় মূর্তিকে আবিষ্কার করব—তারা আর আমাদের ফাঁকি দিতে পারবে না !”



## নবম পরিচ্ছেদ

### মৃত্যুপুরে

আলিনগরের কোন বিভীষিকাই তখন সেখানে জেগে নেই। সূর্য্যকরের সোনার ঢেউ আকাশের নীলিমাকে অগ্নান ক'রে তুলেছে, পাখীদের গানের তানের ঢেউ বনের শ্রামলিমাকে উচ্ছ্বসিত ক'রে তুলেছে, নদীর জলে রূপোলী ঢেউ ছুই তটের মাটি, বালি আর পাথরকেও সঙ্গীতময় ক'রে তুলেছে! চারিদিকে আলো আর গান, শাস্তি আর কাস্তি!

তারই মধ্যে অন্ধকারের হুঃস্বপ্ন বহন ক'রে আনছে কেবল এই ছয়জোড়া পদচিহ্ন! এই ছয়জোড়া পায়ের অধিকারী, কে তারা? কেন তারা সর্ব্বদাই একসঙ্গে থাকে, কেন তাদের দলের লোক বাড়েও না কমেও না, কেন তারা একতালে পা ফেলে চলে—আর কেন তারা মেয়ের পর মেয়ে চুরি করে? আর, তাদের সঙ্গে নবাবের কোন সম্পর্ক আছে, কিংবা নেই? আর, আলিনগরে এসে তারা সবাই মিলে কি করে?

জয়ন্ত ও মানিক এই-সব কথাই ভাবছিল।

জয়ন্ত বললে, “কিন্তু এই ছয়টা মূর্ত্তি যে প্রেতমূর্ত্তি নয়, এদের দেহ যে ছায়াময় নয়, এরা যে আমাদের মতই রক্তমাংসে গড়া পা দিয়ে মাটি মাড়িয়ে চলে, এখানকার দাগগুলো সে সত্যও প্রকাশ করছে! সেদিনের পায়ের দাগগুলোর ভিতরে যা লক্ষ্য করেছিলুম, আজও তাই লক্ষ্য করছি; এদের মধ্যে একজন খুঁড়িয়ে খুঁড়িয়ে হাঁটে, একটা পায়ের গোড়ালি মাটির উপরে ফেলতে পারে না। এটাও মনুষ্যত্বের আর একটা লক্ষণ—খোঁড়া ভূতের কথা কখনো শুনেছ?”

ছজনে নদীগর্ভের দিকে নামতে লাগল

মাণিক বললে, “দাগগুলো দেখছি নদীর জলের ভিতরে নেমে গেছে। তার মানে, সেই ছাঁটা মূর্ত্তি এইখানেই নদী-পার হয়েছে।”

জয়ন্ত বললে, “হ্যাঁ, তাই আমাদেরও এইখানে নেমেই পার হ’তে হবে! গেল-ছুর্যোগে নদীর জল বেড়ে উঠেছে বটে, কিন্তু বোধহয় আমাদের কোমরের বেশী উঠবে না। এই-সব ছোট ছোট পাহাড়ী নদীর রীতিই এই—এরা যেমন-হঠাৎ বড় হয়ে ওঠে, তেমনি-হঠাৎ ছোট হয়ে পড়ে, এরা যেন প্রকৃতির আবুহোসেন—আজ বড়, কাল ছোট!..... এই আমি ছুর্গা ব’লে নেমে পড়লুম,—যা ভেবেছি তাই! জল খুব কম! এস মাণিক, কিন্তু দেখো, বন্দুক রিভলভার আর রসদ যেন জলে ভেজে না!”

নদীর ওপারে উঠে একটুও খুঁজতে হ’ল না, আবার পাওয়া গেল সেই ছয়জোড়া পায়ের দাগ! নদীর বালির বিছানা যেখানে শেব হয়েছে সেখানেও মাটির উপর দিয়ে চ’লে গিয়েছে পদচিহ্নের সারি।

মাণিক খুসি-গলায় বললে, “জয়, সেদিনকার বিষম বৃষ্টি আমাদের ভারি কষ্ট দিয়েছে বটে, কিন্তু আজ আমরা তাকে যথেষ্ট ধন্যবাদ দিতে পারি! সেই বৃষ্টিতে ভিজ়ে মাটি খুব নরম ছিল ব’লেই পায়ের এমন স্পষ্ট আর স্থায়ী ছাঁচ তুলতে পেরেছে!”

জয়ন্ত বললে, “হ্যাঁ, আর এটাও বোঝা যাচ্ছে, এই ছাঁচগুলো টাট্কা, এদের সৃষ্টি হয়েছে বৃষ্টির পরেই। প্রথম শ্রেণীর পথপ্রদর্শকের মত এখন এই পায়ের দাগগুলোই আমাদের নিয়ে যাবে, যাদের খুঁজতে এসেছি তাদের ঠিকানায়! হ্যাঁ, ধন্যবাদ দি বৃষ্টিকে!”

পায়ে-হাঁটা মেটে পথ। কোথাও রূপসী পাছের তলা দিয়ে, কোথাও

কাঁটা ঝোঁপ ও জঙ্গলের তলা দিয়ে, কোথাও ভাঙা-চোরা বাড়ী, ধ্বংসস্থূপ বা চিপিচাপার পাশ দিয়ে অজগরের মত এঁকেবেঁকে, উঠে-নেমে, মোড় ফিরে ফিরে অগ্রসর হয়েছে। পথের উপরে পায়ের দাগগুলো মাঝে মাঝে অস্পষ্ট হয়ে গেছে বটে কিন্তু একটু পরেই আবার স্পষ্ট হয়ে উঠেছে। মাঝে মাঝে ঘাসজমির আবির্ভাবেও অদৃশ্য হয়ে গিয়ে তারা জয়ন্ত ও মানিককে ভয় দেখাচ্ছে বটে, কিন্তু জমির অন্ত প্রান্ত থেকে আবার আশ্রয়প্রকাশ করছে। পায়ের দাগ তাদের সঙ্গে যেন লুকোচুরি-খেলা খেলছে !✓

জয়ন্ত বললে, “মানিক, পৃথিবীর সব দেশেরই গোয়েন্দাগিরির ইতিহাস পড়লে দেখতে পাবে, পায়ের দাগ, রক্তের দাগ আর আঙুলের ছাপ দেখেই গোয়েন্দারা বেশীর ভাগ অপরাধীকে গ্রেপ্তার করতে পেরেছে। আঙুলের ছাপ দেখে অপরাধী ধরবার প্রথা একশো বছর আগেও আবিষ্কৃত হয় নি, কিন্তু পায়ের দাগ আর রক্তের দাগ মানুষের কাজে লেগে আসছে হাজার হাজার বছর আগে থেকেই—মানুষ যখন সভ্যও হয় নি। এই ছ-রকম দাগের কোন-না-কোনটি দেখে আদিম মানুষ বনে-জঙ্গলে শিকারের খোঁজ পেয়ে জীবনধারণ করেছে—এখনকার সখের শিকারীদেরও কাছে ঐ ছ-রকম দাগই হচ্ছে সব-চেয়ে বড় সম্বল। আর পাপীদেরও জব্দ করেছে চিরকাল ঐ ছ-রকম দাগই ! সব পাপীই এই ছ-রকম দাগকে ভয় করে, কিন্তু তবু এদের কবল থেকে নিস্তার পায় না—যেমন আজও পাবেনা আমাদের হাত থেকে মুক্তি, এই ছয়জন মেয়ে-চোর !”

মানিক বললে, “এরা খালি মেয়ে-চোর নয়, হত্যাকারীও বটে !”

জয়ন্ত ভাবতে ভাবতে ধীরে ধীরে বললে, “হুঁ। শেষ যে মেয়ে চুরি গেছে, এরা তার মাকে খুন করেছে। কিন্তু মানিক, এখনো এ-রহস্যটা

আমি কিছুতেই বুঝে উঠতে পারছি না যে, মৃতদেহের গলায় অতি-বড় ক্ষতচিহ্ন, কিন্তু তার দেহের রক্ত গেল কোথায় ? এক হ'তে পারে, হত্যাকারী দাঁত দিয়ে তার গলায় ছ'দা ক'রে সমস্ত রক্ত গুবে নিয়েছে—আর যেটুকু রক্ত মাটিতে প'ড়েছিল তাও জিভ দিয়ে চেটেপুটে তুলে নিয়েছে, কিন্তু মানুষের পক্ষে এও কি সম্ভব ? এই ছয়জন খুনে মেয়েচোর যে মানুষ, সে-বিষয়ে তো সন্দেহ করবার উপায় নেই !”

ইঠাং মাণিক উত্তেজিত বর্ণে ব'লে উঠল, “দেখ জয়, দেখ !”

মাণিকের দৃষ্টির অনুসরণ ক'রে জয়ন্ত দেখলে, যে-তুখানা মোটরে চ'ড়ে তারা সেদিন আলিনগরে এসেছিল, তাদেরই ভগ্নাবশেষ ! একখানা প্রকাণ্ড ভাঙা বাড়ীর স্তূপের উপরে ছ-জায়গায় গাড়ী-তুখানা চুরমার হয়ে প'ড়ে আছে !

জয়ন্ত কৌতূহলী চোখে দেখতে দেখতে পায়ে পায়ে তাদের কাছে গিয়ে দাঁড়াল। তাদের ভিতর থেকে এটা-ওটা-সেটা তুলে নিয়ে নাড়াচাড়া করতে লাগল। খানিকক্ষণ পরে ফিরে বললে, “মাণিক, একটা ব্যাপার লক্ষ্য করেছ কি ?”

—“কি ?”

—“গাড়ীর ভিতরে আমাদের খাবার ছিল। হয়তো ফল বা পাঁউরুটি প্রভৃতি চারিদিকে ঠিকরে ছড়িয়ে পড়েছিল ব'লে বনের পশু-পক্ষীরা সেগুলোর সন্ধ্যাবহার করেছে। কিন্তু গাড়ীর ভিতরে ছিল বন্ধ একটিন বিস্কুট আর তিন টিন ‘জাম্’ আর চায়ের ‘ফ্লাস্ক্’। সেগুলোর একটা ভাঙা টুকরোও এখানে নজরে পড়ছে না ! খাবারের চাঙাড়িরও টুকরো এখানে নেই—তাও কি জন্তুরা খেয়ে ফেলেছে ?”

• মাণিক আশ্চর্য্য হয়ে বললে, “তাইতো দেখছি ! সত্যি, অতি-বড় পেটুক

## মৃত্যুপুরে

জন্তুও তো টিন বা ধাতু বা ভাঙা চাঙাড়ি হজম করতে রাজি হবে না ! সেগুলো গেল কোথায় তবে ?”

—“কোথায় আর ? ঐ নবাব, কি ছয় মূর্তির বাসায় ! গাড়ীছানাকে ধ্বংসের পথে চালিয়ে দেবার আগে খাবারগুলোকে বাজে নষ্ট হবার সম্ভাবনা থেকে রক্ষা করা হয়েছে আর কি ! মাণিক, যারা স্মাণ্ড্‌উইচ্ আর কলা খায়, ‘জ্যাম্’ আর বিস্কুটের টিন খোলে, নিশ্চয়ই তারা ভূত নয় ! এই-সব মেয়ে চুরি আর খুনের মূলে আছে তোমার-আমার মত মানুষই !”

মাণিক বললে, “এ প্রমাণটা পেয়ে হাঁপ ছেড়ে বাঁচলুম ! চল তবে, আবার সেই খুনে মেয়ে-চোর আর খাবার-চোর মানুষদের পদচিহ্ন অনুসরণ করা যাক !”

তারা জনশূন্য আলিনগরের একপ্রান্ত দিয়ে চলেছে। ছোট-বড়-মাঝারি বিবর্ণ, সংস্কার অভাবে জীর্ণ, কঙ্কালসার বা একেবারে ভাঙা বাড়ীর পর বাড়ী যেন নিজেদের দুর্ভাগ্যের ভারে স্তম্ভিত ও স্তব্ধ হয়ে আছে, কিন্তু একদিন তারা অনেক আলোকমালা দেখেছে, অনেক উৎসব-কোলাহল শুনেছে। তাদের ছায়ায় ছায়ায় কত হাসি আর অশ্রুর বিচিত্র অভিনয়ের যবনিকা বারংবার উঠেছে ও পড়েছে, সে হিসাব যেন তারা আজও ভুলে যায় নি। যেখানে আগে শত শত সঙ্গীতের ও শত শত নূপুরের ধ্বনি জেগে উঠত ক্ষণে ক্ষণে, সেখানে আজ স্তব্ধতার মৃত্যু-নিদ্রা ভঙ্গ করছে কেবল দেয়ালে দেয়ালে গজিয়ে-গুঠা অশথ-বটের শাখায় শাখায় বন্য বাতাসের দীর্ঘশ্বাসের কান্না। যাদের চাতালে চাতালে আগে জীবন্ত ফুলের মত শিশুরা করত সুমধুর লীলা-খেলা, সেখানে আজ পাথরে পাথরে বেড়িয়ে বেড়াচ্ছে কেবল সাপ, বিছা ও গিরগিটির দল !

মাণিক দুঃখিত স্বরে বললে, “জয়, আমার পার্সী কবি ওমর খৈয়ামের কবিতা মনে পড়ছে :

রাজার বাড়ীর খামের সারি আকাশ-ছোঁয়া তুলত মাথা,  
রতন-মুকুট ‘পরে হেথায় সোনার তোরণ ধরত ছাতা ।  
আজ সেখানে অধূল মায়ায় বিজন ছায়া জুলিয়ে দিয়ে  
‘ঘু-ঘু-ঘু’র আকুল স্বরে গাইচে কপোত অশ্রু-গাথা ।”

জয়ন্ত বললে, “এখন মনে হচ্ছে, এই ছয়জন ছুরায়া বাস করবার ঠিক জায়গায়ই বেছে নিয়েছে ! যারা সমাজের আর মানুষের শত্রু, জ্যাশ্বেক সহরের জনতা তাদের ভালোও লাগবে না, সহ্যও হবে না ! তাই এসে আস্তানা গেড়েছে তারা এই মরা সহরে ! ভাই মাণিক, ঘর-বাড়ীর আত্মা থাকে না জানি, কিন্তু এখানকার বাড়ী-ঘরগুলোকে দেখলে প্রেতাঙ্গার ছবি দেখছি ব’লেই কি সন্দেহ হয় না ?”

মাণিক বললে, “হ্যাঁ, এরা প্রেতাঙ্গার মতই ভয়ের ভারে প্রাণ-মন অভিভূত ক’রে দেয় !”

জয়ন্ত দাঁড়িয়ে প’ড়ে বললে, “এই আমরা সেই গোরস্থানের আর এক-দিকে এসে পড়লুম ! এরই মধ্যে সেই ভয়ানক রাতে ছয়টা আলো-কে চলা-ফেরা করতে দেখেছিলুম !”

মাণিক বললে, “পায়ের দাগের রেখা যে এরই মধ্যে গিয়ে ঢুকেছে !”

—“তা’হলে আমরাও এর মধ্যে ঢুকব ! মাণিক, বন্দুক প্রস্তুত রাখো, হয়তো এইটেই সেই সয়তানদের আড্ডা ! হয়তো এইবারে তারা আমাদের দেখতে পাবে, আর দেখতে পেলে যে জামাই-আদর করবে না, সে-বিষয়ে একতিল সন্দেহ নেই !”

তারা দুজনেই সেইখানে দাঁড়িয়ে বন্দুকে টোটা ভ'রে নিলে, নিজের নিজের রিভলভার পরীক্ষা করলে।

মাণিক বললে, “কিন্তু অমিয়বাবু আর তাঁর বন্ধুদের মতে, বন্দুকের গুলি বেমালুম হজম করে তারা আক্রমণ করতে পারে!”

জয়ন্ত বললে, “আমি ও-কথা বিশ্বাস করি না। গোলা-খা-ডালার যুগ আর নেই! অমিয়বাবুদের গুলি খেয়েছিল বনের গাছ আর পাহাড়!”

তার চারিদিকে সাবধানে তাকাতে তাকাতে গোরস্থানের ভিতরে প্রবেশ করলে! আলিনগরের কোথাও জীবনের পরিচয় নেই বটে, কিন্তু এইবারে দেখা দিলে খালি মৃত্যুর চিহ্ন! এখানকার প্রত্যেক উঁচু চিপটাও এক-একটি বিয়োগান্ত জীবন-নাট্যের শেষ-নিদর্শন—মানুষের অশান্ত উচ্চাকাঙ্ক্ষার তুচ্ছ পরিণাম! চঞ্চল আলো-ছায়ার জীবন্ত লীলা বৃক্কের উপরে নিয়ে নিস্পন্দ হয়ে পড়ে আছে কবরের পর কবরের সার। তাদের তলায় চির-নিজার স্বপ্নহীনতার মধ্যে শুয়ে আছে পৃথিবীর রঙ্গমঞ্চ থেকে বিতাড়িত কত মানুষের কঙ্কালের পর কঙ্কাল এবং তাদের উপর দলে দলে ফুটে আছে কত আগাছার কত রঙের ফুলের পর ফুল! মানুষের স্মৃতি যাদের ভুলেছে, প্রকৃতির প্রেম তাদের মনে করে রেখেছে।

ছ-ধারের কবরের মাঝখান দিয়ে চ'লে পদচিহ্নরেখা গোরস্থানের আর-একপ্রান্তে যেখানে গিয়ে শেষ হ'ল, সেইখানে মস্ত ছায়া ফেলে দাঁড়িয়ে আছে একখানা প্রকাণ্ড অট্টালিকা।

জয়ন্ত ও মাণিক তার দিকে তাকিয়ে দেখলে, এই অট্টালিকাও বহুকালের পুরাণো বটে, কিন্তু আলিনগরের অশান্ত বাড়ীর মত এখানা ততটা জীর্ণ ও ভাঙাচোরা নয়! এর অনেকগুলো দরজার কবাট ও জান্নার পাল্লা এখনে

অটুট আছে এবং এক সময়ে এখানা যে খুব বড় ধনীর বা রাজা-উজীরের প্রাসাদ ছিল, তাও অনুমান করা যায় !

অট্টালিকার প্রবেশ-পথটিও প্রকাণ্ড। হয়তো আগে এখানে জাঁকালো সাজ-পরা সেপাই-শাস্ত্রীরা বন্দুক ঘাড়ে নিয়ে পাহারা দিত, হয়তো আজ তাদেরও কঙ্কাল নিসাড় হয়ে আছে ঐ গোরস্থানেরই কোন বুঁজে-যাওয়া গর্ভে ! কিন্তু আজ এই দেউড়ী হয়েছে শেয়াল-কুকুরের আনাগোনার রাস্তা !

কিন্তু দেউড়ীর সামনেই কী ওটা প'ড়ে প'ড়ে পৈতার মত সরু সরু ধোঁয়া ছাড়ছে ?

ধোঁয়া ! জনহীনতার রাজ্যে ধোঁয়া ? ধোঁয়ার সৃষ্টিকর্তা হচ্ছে অগ্নি ! এবং অধিকাংশ অগ্নির সৃষ্টিকর্তা হচ্ছে মানুষ ! মানিক আশ্চর্য্য হয়ে এগিয়ে গেল এবং তাড়াতাড়ি একটা জিনিষ তুলে জয়ন্তের চোখের সামনে ধরলে !

জয়ন্ত সবিস্ময়ে চেয়ে দেখলে, একটা আধ-পোড়া 'কাঁচি' সিগারেট, তখনো তার আগুন নেবে নি ।

হুজনেই বুঝলে, শত্রু একটু আগেই এখান দিয়ে চ'লে গিয়েছে এবং খুব কাছেই কোথাও আছে—হয়তো আড়ালে গা ঢেকে তাদেরই গতিবিধি লক্ষ্য করছে !

হুই বন্ধুর সন্দিগ্ধ ও সতর্ক চক্ষু চতুর্দিকে ঘুরতে লাগল—কিন্তু কোথাও কারুর দেখা বা সাড়া পাওয়া গেল না !

মানিক চুপি চুপি জিজ্ঞাসা করলে, “এখন কি করবে ?”

জয়ন্ত তেমনি স্বরে বললে, “বাড়ীর ভিতরে ঢুকব !”

—“শত্রু আছে জেনেও ?”



—“আমরা তো এখানে বন্ধুদের সঙ্গে খোসগল্প করতে আসিনি ! যত শীঘ্র শত্রুর দেখা পাওয়া যায় ততই ভালো।”

—“তা বটে !”

বন্ধুকত্ৰুটো তারা পিঠের উপরে বাঁধলে। তারপর ‘বেল্ট’ থেকে রিভলভার খুলে হাতে নিয়ে পা টিপে টিপে বাড়ীর ভিতরে প্রবেশ করলে।

একটা বুক-চাপা ভয়াবহ নীরবতায় সেই বিশাল অট্টালিকার ভিতরটা পরিপূর্ণ হয়ে আছে। খানিকদূর এগিয়ে পাওয়া গেল প্রকাণ্ড এক উঠান—তার ভিতরে বোধহয় দুইহাজার লোকের স্থান সংকুলান হয়। উঠানের চারিদিকে সারি সারি থাম ও দরদালান এবং দালানের পরেই চক-মিলানো ঘর। উঠানের সর্বত্রই বড় বড় ঘাস ও আগাছার ঝোঁপ। কোথাও জীবনের এতটুকু লক্ষণ নেই—কেবল গান্ধীর্ষ্য গম-গম করছে, সে যেন মৃত্যুপুরীর গান্ধীর্ষ্য ! দেউড়ীতে এইমাত্র সেই জ্বলন্ত সিগারেটটা না দেখলে জয়ন্ত ও মাণিক কিছুতেই সন্দেহ করতে পারত না যে, এই নিদ্রিত অট্টালিকার ত্রিসীমানায় বহুবৎসরের মধ্যে কোন জ্যান্তো মানুষের ছায়া এসে দাঁড়িয়েছে ! এখানকার নির্জনতা যেন ভৌতিক,—বুকের রক্ত জ’নে যায়, গা হুম্ হুম্ করে, পা এলিয়ে পড়ে ! অসহনীয় !

মাণিক ফিস্-ফিস্ ক’রে বললে, “এই বিশালতার মধ্যে আমরাই যে হারিয়ে গেছি ব’লে মনে হচ্ছে ! এর মধ্যে কোন্দিকে কাকে আমরা খুঁজব ?” —তার সেই অতি-মৃচ্ গলার আওয়াজও সেই নিসাড় পুরীর মাঝখানে উচ্চকণ্ঠের গর্জনের মত শোনালো !

জয়ন্ত আরো খাটো-গলায় মাণিকের কাণে কাণে বললে, “কিন্তু খুঁজতে

হুঁই ! এস, আগে একতালার সব ঘরেই একবার ক'রে উকি মেরে আসি,  
—তারপর দোতালা, তারপর তেতালা !”

তারা একে একে প্রত্যেক ঘরে খুব সন্তর্পণে ঢুকে পরিদর্শন আরম্ভ করলে। ঘরে ঘরে বাস করছে যুগ-যুগান্তরের ধূলা ও সন্ধ্যার আলো-আঁধারি ! একটা ঘরের কোন্ কোণ থেকে সাপ ফোঁস ক'রে উঠল ! প্রত্যেক ঘরের দরজাই খোলা।

মাণিক বললে, “এই পোড়ো বাড়ীর একতালা ঘরে মানুষ থাকতে পারে না, মানুষের মন এখানে কুঁকড়ে পড়ে !”

জয়ন্ত বললে, “কিন্তু আমরা খুঁজছি সেই-সব অমানুষিক মানুষকে, পৃথিবীর সাধারণ মানুষ যাদের ভূতের চেয়ে কম ভয় করে না। ভালো-মানুষের প্রাণ যারা মাটির খেলনার মত ভেঙে ফেলতে পারে, এমন জায়গায় এলে তারা হয়ে ওঠে খুব-বেশী-খুসি !”

ডানদিকের দীর্ঘ দালানের শেষ ঘরটায় দরজার বাহির থেকে শিকল তোলা ছিল। শিকল নামিয়ে মাণিক প্রথমেই ঘরের ভিতরে ঢুকল, এবং তার পর-মুহূর্তেই চমকে বাইরে বেরিয়ে এল,—তার মুখ একেবারে সাদা !

জয়ন্ত তাড়াতাড়ি ঘরের ভিতরে মাথাটা একবার গলিয়ে দিলে !

ধূলিধূসরিত মেঝের উপরে পাশাপাশি শুয়ে আছে ছয়টা মানুষের মূর্তি !

## দশম পরিচ্ছেদ

### জীবনহারা জীবন্তের দল

যে-ছয়টা বিভীষণ মূর্তির জন্তে চতুর্দিকে এমন ছলুছলু বেধে গিয়েছে, এই আধা-আলোয় ও আধা-অন্ধকারে তারাই শুয়ে আছে পাশাপাশি !

কিন্তু ওরা জেগে, কি ঘুমিয়ে ? ওরা তাদের সাড়া পেয়েছে, কি পায়নি ? আর, অমন আছড় মাটিতে, ধূলো-জঞ্জালেই বা ওরা শুয়ে আছে কেন ? ওরা মট্কা মেরে প'ড়ে নেই তো ?

অসম্ভব নয়। এই ছয়টা মূর্তির প্রকৃতি যে হিংস্র, প্রথম দিনেই আলিনগরে এসে তার প্রমাণ পাওয়া গিয়েছে। এই ছয় চোরে-চোরে-মাস-তুতো ভাই যে কত বেশী চালাক, প্রাস্তর-সমূদ্রে তারও পরিচয় পাওয়া গিয়েছে। এদের কাছে জয়ন্তদের ছই-ছইবার পরাজিত হ'তে—এমন কি প্রায় গালে চুপ-কালি মাখ'তে, হয়েছে ! তারাই এত সহজে এত অসহায় ভাবে ধরা দিতে রাজি হবে ? এদের এই চুপ-ক'রে শুয়ে থাকা অত্যন্ত সন্দেহজনক !

জয়ন্ত ও নাণিক বাইরে দরজার গোড়ায় দাঁড়িয়ে দাঁড়িয়ে এই-সব ভাবতে লাগল।..... এক ছই ক'রে ছয়-সাত মিনিট কেটে গেল, এই অসম্ভব নিস্তব্ধতার মুল্লুকে মূর্তিদের কেউ পাশ ফিরলেও তারা সেটা টের পেত, কিন্তু ঘরের ভিতরে কোন সাড়া নেই—একটা নিঃশ্বাসের শব্দ পর্য্যন্ত না ! যদি তাদের জন্তে কোনরকম ফাঁদ পাতা হয়ে থাকে, তবে এ কি-রকম

কীদ ? ওরা ছয়জন, তারা ছইজন মাত্র, তবু ওরা আক্রমণ করবার জন্তে একটু উস্খুস্ পর্য্যাস্ত করছে না কেন ?

জয়ন্ত রিভলভারটা ধ'রে দরজার পাশ দিয়ে ধীরে ধীরে একটুখানি মুখ বাড়িয়ে আবার তাদের চট্ করে দেখে নিলে।

তারা ঠিক তেমনি ভাবেই পাশাপাশি গুয়ে আছে। তবে কি সত্যিই তারা ঘুমুচ্ছে ? কিন্তু শ্বাস-প্রশ্বাসের শব্দ কই ? ছুঁছুঁমি করে তারা কি দম বন্ধ করে আছে ? কিন্তু দম বন্ধ করে মানুষ আর কতক্ষণ থাকতে পারে ?

আরো মিনিট-পাঁচেক পরেও তারা তেমনি ভাবেই রইল দেখে জয়ন্ত নিজের মুখখানা ভিতরে আরো-খানিকটা বাড়িয়ে দিলে। তখনো মূর্তিগুলোর সেই ভাব ! শেষটা যা থাকে কপালে ভেবে সে একেবারে ঘরের ভিতরে গিয়ে ঢুকল এবং মাণিকও সাহস সঞ্চয় করে তার পাশে গিয়ে দাঁড়াল—

এবং প্রথমেই যা তাদের দৃষ্টি আকর্ষণ করল তা হচ্ছে এই :

একটা মূর্তি ড্যাভ্-ড্যাভ্ করে তাদের পানে নিস্পলক চোখ মেলে তাকিয়ে আছে !

জয়ন্তের হৃৎপিণ্ড যেন লাফিয়ে উঠল ! মাণিক রিভলভারের ঘোড়া টিপে দেয় আর কি,—কিন্তু জয়ন্ত তার হাত চেপে ধ'রে হৃৎস্বরে বললে, “অন্য মূর্তিগুলোর চোখ দেখ !”

কোন মূর্তির চোখ আধ-খোলা, কোন মূর্তির চোখ একেবারে মোদা !... যে-মূর্তিটা পুরো চেয়ে আছে, তারও চোখে কোন ভাব নেই !

—“জয় ! জয় !”

—“মাণিক, এগুলো মড়া !”

জয়ন্ত এগিয়ে গিয়ে একে একে মূর্তিগুলোর বুকে হাত দিয়ে দেখলে। শ্বাস-প্রশ্বাসের কোন লক্ষণ নেই। গা কাঁচের মত ঠাণ্ডা !

—“কিন্তু মাণিক, কি ক’রে এরা মরল ? কে এদের মারলে ?”

—“জয়, ডানদিকের ঐ মূর্তিটার কপালের উপরে তাকিয়ে দেখ।”

জয়ন্ত হেঁট হয়ে দেখে বললে, “হুঁ, বুলেটের দাগ ! এখনো শুকোয় নি, দাগটাও নতুন নয়।”

—“তবে কি অমিয়বাবুদের বুলেটের এই কীর্তি ?”

—“হ’তে পারে। কিন্তু কপালে অমন ভাবেও গুলি খেয়ে কেউ কি বেঁচে থাকতে পারে ?……আরে, আরে, এই যে ! এ মূর্তিটারও পেটে একটা ছ’য়াদা—ওখানেও বুলেট ঢুকেছে ! আর, এটারও পায়ে লেগেছে বন্দুকের গুলি ! হুঁ, এই মূর্তিটাই তাহ’লে খুঁড়িয়ে খুঁড়িয়ে হাঁটত,—পায়ের দাগ দেখেই আমি যা ধরতে পেরেছিলুম ! কিন্তু বাছারা, কে তোমরা ? বন্দুকের বুলেট খেয়েও তোমরা মরো না,—বড়-জোর খুঁড়িয়ে হাঁটো, কিন্তু আজ তোমরা পটল তুলেছ কেন ?”

—“দেখ জয়, যদি ধ’রে নেওয়া যায় যে, ঐ সব বুলেটই ঐ তিনটে লোকের মৃত্যুর কারণ, তাহ’লে বাকি তিনটে লোক মরল কেন ? ওদের গায়ে তো দেখছি একটা আঁচড় পর্য্যন্ত নেই ! কিসে ওরা মরেছে ? বিবে ? কেউ বিব দিয়েছে, না ওরা একসঙ্গে আত্মহত্যা করেছে ?”

—“মাণিক, এদের কারুর দেহেই বিবের কোন লক্ষণই নেই ! এদের কেউ কোন উপায়েই হত্যা করেছে ব’লেও মনে হচ্ছে না ! এরা এসে যেন পাশাপাশি শুয়ে প’ড়ে পরম নিশ্চিন্ত আর শান্ত ভাবে মৃত্যুঘ্নে ঢ’লে পড়েছে ! অথচ এরা যে পশু’রাত পর্য্যন্ত বেঁচে ছিল সে প্রমাণও রয়েছে—

অবশ্য যদি মানা যায় যে পশু<sup>১</sup> রাতে এরাই মেয়ে চুরি আর খুন ক'রেছিল ! এমন বিচিত্র ব্যাপার আমি কখনো কল্পনা করিনি—এমন আশ্চর্য্য মৃত্যুও কখনো দেখিনি ! মাণিক, স্বীকার করতে লজ্জা নেই—মনের মাঝে আমি ভয়ের সাড়া পাচ্ছি ! ভবতোষ মজুমদারের বজরায় আমরা জ্যান্টো মড়া দেখেছিলুম, \* কিন্তু সে হচ্ছে ভিন্ন ব্যাপার, তার মধ্যে ছিল বৈজ্ঞানিক সত্য, কিন্তু এ কী কাণ্ড ! বুলেট খেয়ে এরা মরে না, অথচ আজ অকারণেই এখানে এসে ম'রে প'ড়ে রয়েছে। মানুষের রক্ত-মাংস বুলেটকে অগ্রাহ্য করে, এটাই বা কী অস্বাভাবিক কথা !”

মাণিক মূর্তিগুলোর উপরে আর একবার শিউরে-ওঠা চোখ বুলিয়ে নিয়ে বললে, “জয়, ভালো ক'রে লক্ষ্য ক'রে দেখ, এ মড়াগুলো কি অনেক দিনের পুরাণো পচা মড়া ব'লে মনে হয় না ? এই ঘরের ভিতরে কি একটা কবরের ভাব আড়ষ্ট হয়ে নেই ? এখানকার বাতাসেও যেন পচা মড়ার দুর্গন্ধ ! আমার দেহ কেমন-কেমন করছে, আমার বমন করবার ইচ্ছা হচ্ছে,—চল জয়, এই কবরের বিভীষিকার ভিতর থেকে পালিয়ে বাই !”

আচম্বিতে দরজার কাছটা অন্ধকার হয়ে গেল !

জয়ন্ত ও মাণিক চমকে ফিরে দাঁড়াল এবং ঘরের ভিতরে এক পা বাড়িয়ে আবিভূত হ'ল নবাবের সুদীর্ঘ মূর্তি—কিন্তু পর-মুহূর্তেই আবার সে অদৃশ্য হয়ে গেল !

—“মাণিক—মাণিক !—এস আমার সঙ্গে”—বলতে বলতে জয়ন্ত ঘর থেকে তেড়ে বেরিয়ে গেল ঝড়ের মত !

তারা বাইরে বেরিয়ে দেখলে, নবাব তখন দালানের উপর দিয়ে ছুটছে !

\* নব্বইশত “জয়ন্তের কাহিনী” দেখুন ।

—“মাণিক, ওকে কিছুতেই আর পালাতে দেওয়া হবে না, প্রাণ যায় তাও স্বীকার—তবু ওকে ধরতেই হবে !”

নবাব হঠাৎ বামদিকে ফিরে আবার অদৃশ্য হ'ল ! জয়ন্ত সেখানে গিয়েই পেলে প্রকাণ্ড এক সিঁড়ি—ছুমদাম্ পায়ের শব্দে বুঝলে নবাব সিঁড়ি দিয়ে উপরে উঠছে ! তারাও এক এক লাফ মেরে ছুই-তিনটে ক'রে ধাপ্ পেরিয়ে উপরে উঠতে লাগল !

—একবারে দোতালার দালানে । নবাব আবার এক জায়গায় গিয়ে অদৃশ্য হ'ল—সঙ্গে সঙ্গে ছুম্-ছুম্ ক'রে দরজা বন্ধ হওয়ার শব্দ !

সেইখানে গিয়ে দাঁড়িয়ে প'ড়ে মাণিক বললে, “এখন উপায় ?”

—“উপায় ? মিছেই কি আমি ব্যায়াম করি—হয়-সাত মণ ওজনের মাল তুলে ছুঁড়ে ফেলে দি ?”

মাণিক দরজার উপরে সজোরে পদাঘাত করলে—দরজা একটু কাঁপলও না ! হতাশ ভাবে বললে, “এ দরজা ভাঙতে গেলে হাতী আনতে হবে !”

—“কিছুই আনতে হবে না, আমার মাংসপেশীর জয় হোক”—ব'লেই জয়ন্ত দরজার উপরে পিঠ রেখে দেহের সমস্ত মাংসপেশী ফুলিয়ে রুক্বাসে প্রচণ্ড ধাক্কা মারলে একবার, দুবার, তিনবার !

দড়াম্ ক'রে খুলে গেল দরজা—সঙ্গে সঙ্গে টাল্ সামলাতে না পেরে জয়ন্ত ঘরের ভিতরে প'ড়ে গেল !

মাণিক একলাফে জয়স্তের দেহ টপ্কে ঘরের ভিতরে গিয়ে দেখলে, নবাব একটা গরাদ্দে-তাঙা জানলা দিয়ে গ'লে বাইরে লাফিয়ে পড়বার চেষ্টা করছে ।

মাটির উপরে লম্বমান অবস্থাতেই জয়ন্ত মাথা তুলে চোঁচিয়ে বললে, “দেহের নীচের দিকে গুলি কর মাণিক! লাফ মারলে আর ওকে পাব না!”

জয়ন্তের মুখের কথা শেষ হবার আগেই মাণিকের রিভলভার গর্জন করে উঠল! বিকট আর্ধনাদ করে নবাব জান্না ছেড়ে ঘরের ভিতরে বসে পড়ল!

জয়ন্ত ততক্ষণে আবার উঠে দাঁড়িয়েছে। সে ও মাণিক এগিয়ে গিয়ে নবাবের ছুই পাশে স্থানগ্রহণ করলে।

জয়ন্ত বললে, “মাণিক, এর মাথা টিপ্ করে রিভলভার ধরে থাকো! আমি এর হাতে হাতকড়া পরিয়ে দি! এ একটু বাধা দিলেই রিভলভার ছুঁড়বে!”—জয়ন্ত হাতকড়া বার করলে, নবাব ভালোমানুষের মত হাত বাড়িয়ে দিলে!

মাণিকের রিভলভারের গুলি লেগেছিল নবাবের উরুর পাশে। সেখান থেকে দর্-দর্ খারে রক্ত ঝরছে!

তার ক্ষতটা পরীক্ষা করে জয়ন্ত বললে, “না, ভয় নেই! এ মরবে না।.....তারপর নবাব, এইবারে তোমার নবাবীর খবর বল!”

তখন দিনের আলো ম্লান হয়ে এসেছে—ঘরের ভিতরে একটু-একটু করে আসন্ন রাত্রির আভাস জেগে উঠছে। বাহির থেকে গাছের পাতারা তাদের মর্ম্মর-বার্তা প্রেরণ করছে, তা ছাড়া কোথাও আর কোন শব্দ নেই।

—“কি হ’ল নবাব, তুমি চুপ করে রইলে কেন?”

নবাবের সেই সাপের মত নির্দয় চক্ষে এতক্ষণ পরে আবার আগুন ফিরে



এল। সে একবার মুখ তুলে জান্না দিয়ে বাইরের রৌদ্রহীন আকাশের দিকে দৃষ্টিপাত করলে, তারপর জয়ন্ত ও মানিকের মুখের উপরে চোখ বুলিয়ে সহজ ও শান্ত স্বরেই বললে, “তোমরা কি জানতে চাও?”

—“তুমি মেয়েদের চুরি ক’রে কোথায় নুকিয়ে রেখেছ’?”

—“জানি না।”

—“জানো না?”

—“না।”

—“এখানে তুমি কি কর’?”

—“জানি না।”

—“তোমার ঐ ছয় স্মাঙাত মরল কেন’?”

—“জানি না।”

—“অর্থাৎ তুমি কিছুই বলবে না’?”

—“না।”

—“আমি এখনি দেশলাইয়ের কাঠি জ্বলে তোমার চিবুকের তলায় ধরব—ধীরে ধীরে তোমার দেহের মাংস পোড়াব।”

—“পোড়াও। তবু কিছু বলব না।”

—“আচ্ছা, আগে তো তোমায় নিয়ে গিয়ে ফাটকে আটক করি, তারপর তোমার মুখ খোলবার ভালো ব্যবস্থাই করব।”

—“একবার তো সে চেষ্টা ক’রেছিলে। পেরেছিলে কি’?”

—“ওঃ, ভাবছ আবার তুমি পালাবে? বেশ, দেখা যাবে! এখন তো আমার সঙ্গে চল।”

—“আমি এখান থেকে যাব না।”

—“যাবে না ? তোমার ঘাড় যাবে ! আমরা তোমাকে লাথি মারতে মারতে নিয়ে যাব ।”

নবাবের ছুই চক্ষু দ্বিগুণ প্রজ্জ্বলিত হয়ে উঠল। জয়ন্তের দিকে চেয়ে অগ্নিবৃষ্টি ক’রে সে বললে, “তুমি আমাকে লাথি মারতে মারতে নিয়ে যাবে ? লাথি মারতে মারতে ? পারবে না !”

—“দেখবে, পারি কি না ?”

নবাব আর জবাব দিলে না। হাঁটু গেড়ে মাটির উপরে বসেছিল। সেই অবস্থায় তার দেহ হঠাৎ সোজা হয়ে উঠল, তার অগ্নিবর্ষী চক্ষুছটে মুদিত হয়ে গেল,—তাকে দেখলেই মনে হয়, ধ্যানমগ্ন নিরুদ্দেশ এক প্রাতিমূর্ত্তি !

মাণিক হেসে ফেলে বললে, “এ আবার কি নতুন ঢং !”

জয়ন্ত বললে, “জানোই তো। প্রবাদে আছে—‘ছুরাঝার চলের অভাব নেই !’ নবাব-বাহাদুরের কালো আলখাল্লার তলায় কত কলাকৌশল লুকানো আছে, কে তা জানে ? বিড়াল আফ্রিকে বসেছেন বোধ হয় আমাদের প্রশ্ন এড়াবার জন্তে ?”

কিন্তু সে-সব কথা যে তার কাণে ঢুকল, নবাব তেমন কোনই ভাব প্রকাশ করলে না। তার সমস্ত বাহুজ্ঞান তখন যেন লুপ্ত হয়ে গেছে—কেবল থেকে থেকে তার কপালের উপরে শিরাগুলো ফুলে ফুলে উঠছে ! ওদিকে তার আহত উরু দিয়ে রক্ত ঝরে যে কাপড় ও ঘরের মেঝের ধূলা ভিজিয়ে আরক্ত ক’রে তুলছে, নবাবের সে খেয়াল পর্য্যন্ত নেই ! যন্ত্রণাও তার হচ্ছিল নিশ্চয়, কিন্তু তার মুখে যন্ত্রণার কোন চিহ্নই ফুটে ওঠে নি।

মাণিক জানলার ধারে গিয়ে দাঁড়াল। একবার নীচের দিকে তাকিয়ে দেখলে। জানলার ঠিক তলাতেই রয়েছে বালির স্তূপ। সেইদিকে জয়ন্তের



“একটা আধ-পোড়া ‘কাঁচি’ সিগারেট”—৯২ পৃষ্ঠা

দৃষ্টি আকৃষ্ট ক'রে বললে, “জয়, নবাবটা কি-রকম ধড়ীবাজ দেখ ! এখান থেকে বা তিনতারা থেকেও ঐ বালির স্তূপের উপরে লাফিয়ে পড়লে হাত-পা ভাঙবার কোন ভয়ই নেই। বিপদের সময়ে পালাবার ব্যবস্থা আগে থাকতেই ক'রে রাখা হয়েছে ! কিন্তু তবু সে পালাতে পারলে না, তোমার দেহের অদ্ভুত শক্তির জগ্গে !”

—“আর তোমার রিভলভারের জগ্গে !”

—“কিন্তু আর কতক্ষণ আমরা দাঁড়িয়ে দাঁড়িয়ে নবাবের ভণ্ডামি দেখব ? আধ-ঘণ্টার মধ্যেই রাতের অন্ধকারে চোখ অন্ধ হয়ে যাবে, নবাবকে এইবারে জাগাও ।”

কিন্তু তাকে আর জাগাতে হ'ল না, সে নিজেই আবার চোখ খুলে বললে, “তোমরা আমাকে এখান থেকে নিয়ে যেতে চাও ? পারবে না !”

জয়ন্ত হো হো ক'রে হেসে বললে, “ওহো হো, তুমি বুঝি ধ্যানদৃষ্টিতে নিজের ভবিষ্যৎ দেখে নিয়ে বুঝে ফেললে যে, তোমাকে এখান থেকে সরাবার শক্তি আমার হবে না ?”

নবাবও দ্বিগুণ জোরে হা-হা-হা-হা অটুহাস্তে উচ্ছ্বসিত হয়ে বললে, “তোমরা পারবে না—পারবে না—পারবে না ! আমাকে এ ঘরের বাইরে নিয়ে যেতে পারবে না ! জানো, তোমরা কার সঙ্গে লাগতে এসেছ ? আমাকে গুলি মেরে জখমই কর, আর আমার হাতে হাতকড়িই পরিয়ে দাও, তবু আমি হব তোমাদের প্রভু ! পৃথিবীর কোন সম্রাটের যে-শক্তি নেই, আমার মুকে আছে সেই বিপুল শক্তি ! মানব-দানব ভূত-প্রেত—আমার আজ্ঞাপালন করবে সবাই ! আমি এই মৃত আলিনগরের একচ্ছত্র সম্রাট, এখানে আমার উপরে আর কারুর আঞ্জা চলবে না, তোমাদেরও জীবন-মরণ এখন আমারই

হাতে ! তোমরা আমাকে এখান থেকে নিয়ে যেতে পারবে না, পারবে না, পারবে না ! হা হা হা হা হা হা হা—” তার ভীষণ ও অলৌকিক অট্টহাস্য সেই সুবিশাল মৃত্যু-প্রাসাদের মহাস্তম্ভতাকে বিদীর্ণ ক’রে প্রত্যেক খিলানে খিলানে গিয়ে যেন আছড়ে প’ড়ে ছুটাছুটি করতে লাগল,—ঘরের ছাদের তলা থেকে সয়তানের অভিশাপের মতন কালো একঝাঁক বাতুড় ভয় পেয়ে অন্ধকার-দিয়ে-বোনা ডানা ঝটপট ক’রে জান্না দিয়ে গ’লে বাইরে উড়ে গেল, কোথায় গুয়ে গুয়ে জুতোর কালির চেয়ে কালো একটা বিড়াল বোধহয় ঘুমোচ্ছিল, অট্টহাসির ঘটায় জেগে উঠে দরজার কাছে এসে আগুনচোখে একবার ভিতরে উঁকি মেরে ও তীক্ষ্ণ স্বরে একবার ‘ম্যাও’ ব’লে প্রতিবাদ জানিয়েই আবার ছুটে পালালো !

হঠাৎ তার মূর্তির এত পরিবর্তন হয়েছে যে, নবাবের দিকে তাকালেও এখন বুক ধুকপুক ক’রে ওঠে ! আচম্বিতে তার এই ভাবান্তরের, এই আফালনের কারণ কি ? জয়ন্ত মনের ভিতরে কেমন একটা অস্বস্তি বোধ করতে লাগল ; কিন্তু তখনি জোর ক’রে সেই ভাবটা দমন ক’রে সে ধমুকে ব’লে উঠল, “নবাব, তোমার ও বিদকুটে হাসি থামাও !”

নবাব তার দিকে দৃকপাতমাত্র না ক’রে গম্ভীর কণ্ঠে টেঁচিয়ে বললে, “ওরে আয়, ওরে আয়, ওরে আয় রে আয় জীবনহারা জীবস্তের দল ! সূর্যের চোখ কাণা হয়েছে, দিনের চিলু নিবে গেছে, বাতুড়ের ঘুম ভেঙেছে, কালো বিড়াল জেগেছে, কবরের দরজা খুলেছে,—এইবারে তোরাও উঠে দাঁড়া, গোরস্থানে আলো জ্বাল, নরকের ফটকে সন্ধ্যাবাতি দে ! ঝ’রে পড়ুক তোদের গায়ের ধূলো, জাগুক তোদের বুক বুক রক্ততৃষা, ছলুক তোদের গলায় গলায় নরমুণমালা ! রাত তোদের ডাকছে, শ্মশান তোদের ডাকছে,





“নবাব বাইরে লাফিয়ে পড়বার চেষ্টা করছে”

থে এসেছে! দ্বিতীয় মূর্তির পিছনে যখন আবার একটা মূর্তি খোঁড়াতে  
 িড়াতে দালানের উপরে এসে উঠল, মাণিক বেগে সেই ভাঙা জান্‌লার  
 াছে দৌড়ে এসে বললে, “জয়, জয়! বাইরে লাফিয়ে পড়! সেই মড়া-  
 লো জ্যাস্তো হয়েছে!”

নবাব হাঁকলে—“ওরে আয়, ওরে আয়, ওরে আয় রে আয় কবরবাসীর  
 ।”

ধূপ্-ধূপ্-ধূপ্-ধূপ্-ধূপ্-ধূপ্-ধূপ্-ধূপ্-!—দরদালান দিয়ে বাঁধা-তালে  
 । ফেলে ফেলে তারা এগিয়ে আসছে, এগিয়ে আসছে, আর এগিয়ে  
 াসছে। তাড়াতাড়ি আসবার জন্তেও তারা কেউ যেন বেতালে পা ফেলবে  
 ,—কিন্তু প্রতিপদক্ষেপেই সেই মৃত্যুচরের দল কাছে—আরো কাছে এগিয়ে  
 াসছে!

জয়ন্তু রুখে দাঁড়িয়ে বললে, “আসুক ওরা! আমি ওদের ভয় করি না!”

মাণিক তাড়াতাড়ি জয়ন্তুর হাত ধরে জান্‌লার দিকে তাকে ঠেলে দিয়ে  
 ললে, “জয়, দুঃসাহসেরও সীমা আছে! মনে রেখো, বন্দুকের বুলেটও  
 াদের গতিরোধ করতে পারে না! ঐ ওরা এসে পড়ল! শীগ্‌গির  
 াফ মারো।”

নবাব এতক্ষণে উঠে দাঁড়াল—মুখে তার নির্ভুর হাসি! কিন্তু মাণিক  
 ঙ্ক্ষণে তার এক পা লক্ষ্য করে আবার রিভলবার ছুঁড়লে, বিকৃতমুখে  
 াব তীব্র চীৎকার করে আবার ভূতলশায়ী হ’ল!

প্রথমে জয়ন্তু, তারপরে মাণিক জান্‌লা গ’লে নীচেকার বালির স্তূপের  
 িপরে লাফিয়ে পড়ল। তখনো একেবারে অন্ধকার হয় নি। শেষ-আলোর  
 িক্কারা তখনো আকাশে ঝাঁধারের সঙ্গে যুদ্ধ করছে।



জয়ন্ত ও মাণিক কোনদিকে না তাকিয়ে উর্দ্ধ্বাসে নদীর পথে ছুটল।

ছুটতে ছুটতে মাণিক একবার পিছনে ফিরে দেখলে, দোতালার ভাঙা জান্নায় মুখ বাড়িয়ে আছে কতগুলো রক্তশূন্য সাদা মূর্তি !

সে চোঁচিয়ে বলে উঠল—“জয় ! আরো জোরে—আরো জোরে ছোটো !”



## একাদশ পরিচ্ছেদ

মানুষে অমানুষে যুদ্ধের আয়োজন

এদিকে ফাঁড়ির সবাই ভেবেই অস্থির !

সকাল-বেলায় ঘুম থেকে উঠে সকলে যখন জয়ন্ত ও মাণিকের দেখা পেলে না তখন মনে করলে, তারা কোথাও বেড়াতে গিয়েছে, যথাসময়েই ফিরবে !

কিন্তু যথাসময় উত্তীর্ণ হয়ে গেল,—কোথায় জয়ন্ত, আর কোথায় মাণিক !

সুন্দরবাবু মতপ্রকাশ করলেন, “ও ছুই ছোকরাই অত্যন্ত বারফট্কা ! হুম, এত যে সাত-ঘাটের জল খেয়ে মলি’, তবু কি বেড়াবার সখ মিট্লে না ? আরে, এ পোড়া দেশে দেখবার আছে কি ?”

একটু বেশী বেলা ক’রেই সেদিন ছুপুরের খাওয়া শেষ করা হ’ল। তবু তাদের দেখা নেই।

বৈকালী চা-পানের সময় এল।

অমিয় একবার জয়ন্ত ও মাণিকের মোটমাট্ নাড়াচাড়া ক’রে বললে, “জয়ন্তবাবু আর মাণিকবাবু অস্ত্রশস্ত্র নিয়েই বেরিয়েছেন দেখছি। তাঁদের রসদের ব্যাগছুটোও নেই। তবে কি তাঁরা আলিনগরেই গিয়েছেন ?”

সুন্দরবাবু আঁৎকে উঠে বললেন, “আঁ্যা, বল কি ? সেই যমালয়, যেখানে যমদূতেরা হানা দিয়ে ফিরছে, সেইখানে তারা ছুটো প্রাণী গিয়ে কি করতে পারবে ?”

পরেণ ও নিশীথ বললে, “অমিয় বোধহয় ঠিক আন্দাজ করেছে। নইলে এতক্ষণে তাঁরা ফিরে আসতেন।”

সুন্দরবাবু হতাশ ভাবে মাথা নেড়ে বললেন, “তাদের ফেরবার আশা ছেড়ে দাও। আর তারা ফিরছে না।”—এই বলে তিনি বিছানায় গিয়ে শুয়ে পড়লেন, কারুর সঙ্গে আর একটা কথাও কইলেন না।

সন্ধ্যা এল। রাত হ'ল। সকলেরই মন খারাপ। মহম্মদ, অমিয়, নিশীথ ও পরেশ টেবিলের ধারে ব'সে চুপি চুপি পরামর্শ করছেন। সুন্দরবাবু মুড়ি দিয়ে সেই ভাবেই প'ড়ে আছেন।

রাত্রের খাবার সাজিয়ে দেওয়া হ'ল। অমিয় ডেকে বললে, “উঠুন সুন্দরবাবু, খাবেন আসুন।”

সুন্দরবাবু বললেন, “হুম্। আমি খাব না। জয়ন্ত আর মানিক বেঁচে নেই। আমার মন কেমন করছে। আমার গলা দিয়ে খাবার গলবে না।” তাঁর গলা ধরা-ধরা। বোধহয় মুড়ি দিয়ে তিনি কাঁদছেন।

মহম্মদ বললেন, “আপনি না পুলিশে কাজ করেন? এত সহজে কাবু হয়ে পড়লেন?”

সুন্দরবাবু বললেন, “পুলিসে কাজ করি বলে কি আমি মানুষ নই? আমার প্রাণ পাথর? আমি খাব না।”

মহম্মদ বললেন, “শুনুন সুন্দরবাবু। পরামর্শ করে ঠিক হ'ল যে, কাল সকালেই আমরা সদল-বলে আলিনগরে যাত্রা করব। সদর থেকে হুকুমও এসেছে। ছুদিন পরেই যেতুম, কিন্তু যে-রকম ব্যাপার দেখছি, আর দেরি করা চলে না।”

সুন্দরবাবু উঠে ব'সে বললেন, “ঠিক বলছেন তো?”

—“হ্যাঁ।”

—“কিন্তু জয়ন্ত আর মাণিককে কি পাওয়া যাবে? আলিনগর যে ভূতের রাজ্য।”

—“সুন্দরবাবু, ভূত-টুং সব বাজে কথা! কোন বদমাইস ভূতের ভয় দেখায়। জয়ন্তবাবু বোকা নন—আত্মরক্ষা করতে জানেন।”

—“হুম্। সে বোকা নয় বটে, কিন্তু গোঁয়ার। তাই তার জন্তে ভয় হয়।”

—“কোন ভয় নেই। আপনি খেতে বসুন।”

—“হুম্, আচ্ছা! ছুটো খাবার মুখে দি তাহ’লে। কিন্তু কাল সকালেই যাচ্ছেন তো?”

—“হ্যাঁ।”

—“কত লোক নেবেন?”

—“আমরা পাঁচজন তো আছিই, আরো জন-বারো চৌকিদারও যাবে।”

—“জন-বারো? জন-চব্বিশ নেওয়া উচিত।”

—“তাহ’লে আরো দু-দিন অপেক্ষা করতে হয়। আপাতত অত লোক নেই।”

—“না, না, অপেক্ষা নয়—ঐ জন-বারোতেই হবে।”

আহারাদির পর আরো খানিকক্ষণ পরামর্শ চলল। তারপর রাত বারোটা বাজল দেখে মহম্মদ উঠে দাঁড়ালেন।

ঠিক সেই সময়ে ফাঁড়ির দরজায় একখানা মোটর সশব্দে এসে দাঁড়াল।

মহম্মদ বিরক্ত স্বরে বললেন, “এত রাতে কে আবার ‘কেস্’ নিয়ে ছালাতে এল?”



“আঃ, বাঁচলুম !...হুম !”

সিঁড়িতে পায়ের শব্দ শোনা গেল—তু-জনের পায়ের শব্দ।

সুন্দরবাবু তাঁর বিপুল ভুঁড়ির ভার ভুলে গিয়ে শৃঙ্খল এক লাফ মারলেন। মহা উল্লাসে ব'লে উঠলেন, “ও পায়ের শব্দ আমি চিনি! জয়ন্ত আর মাণিক আসছে।”

তারাই বটে! গায়ে, কাপড়-চোপড়ে ধূলো আর কাদা, মাথার চুল উল্কাখুল্কা, কিন্তু মুখে প্রচণ্ড উৎসাহের ঔজ্জ্বল্য!

সুন্দরবাবু একসঙ্গে তাদের দুজনকে চেপে ধ'রে বললেন, “আঃ, বাঁচলুম! কী ভাবনাটাই না হয়েছিল! হুম্!”

মহম্মদ বললেন, “কোথায় ছিলেন আপনারা? আমরা যে কাল সকালেই আপনাদের খুঁজতে আলিনগরে যাচ্ছিলুম!”

জয়ন্ত একখানা চেয়ারের উপরে ব'সে প'ড়ে বললে, “কাল সকালে? না, না, নবাবকে যদি ধরতে চান, আজ এখনি চলুন।”

—“তার মানে?”

—“নবাবের আড্ডা আমরা আবিষ্কার করেছি, মাণিকের দুই গুলিতে তার দুই পা খোঁড়া হয়ে গেছে, এমন-কি নবাবের হাতেও আমরা হাতকড়া পরিয়ে দিয়ে এসেছি,—এখন দেরি করলে সে হয়তো স'রে পড়বে।”

মহম্মদ বললেন, “এতই যত্ন ক'রেছেন, তখন দয়া ক'রে নবাবকে ধ'রে আনলেন না কেন?”

—“ধ'রে আনলুম না কেন?”—ব'লেই জয়ন্ত থেমে গেল। তার চোখের সামনে ফুটে উঠল, প্রায়-অন্ধকার গৃহতলে শায়িত সেই ছয়টা মৃতদেহ! নিরালা, নীরব, নিৰ্জ্বল অট্টালিকার ধাপে ধাপে সেই ধুপ্ ধুপ্ ধুপ্ ধুপ্ ক'রে জ্যাস্তো মড়ার অলৌকিক পদশব্দ আবার যেন সে স্তনতে

পেলে স্বকর্ণে!.....থেমে থেমে বললে, “মহম্মদ-সাহেব, বলতে পারেন, মড়া কখনো বাঁচে?”

—“মড়া?”

—“হ্যাঁ, ছয়টা মড়া আমাদের আক্রমণ করতে এসেছি তাই নবাবকে আনতে পারিনি। পালিয়ে আসতে বাধ্য হয়েছি।”

—“কী বলছেন!”

—“মাণিককে জিজ্ঞাসা করুন। আমি খালি পায়ের শব্দ শুনেছি, মাণিক স্বচক্ষে দেখেছে।”

অমিয়, নিশীথ ও পরেশ একসঙ্গে ব'লে উঠল, “আমরাও তাদের দেখেছি!” সুন্দরবাবু বললেন, “হুম্। আমার কথাই সত্যি হ'ল! কাঙালের কথা বাসি হ'লে টকে।”

মাণিক বললে, “আপনি কাঙাল নন সুন্দরবাবু, তিনশো টাকা মাইনে পান।”

সুন্দরবাবু রেগে বললেন, “ঠাট্টা কোরোনা মাণিক! এখন ঠাট্টা আমার ভালো লাগছে না!”

মহম্মদ মাথা নেড়ে বললেন, “এর ভিতরে নিশ্চয়ই কোন কারসাজি আছে। মড়া আক্রমণ করে? অসম্ভব!”

—“বেশ তো, এখনি দলবল নিয়ে চলুন না!”

—“তাও হয় না। যেতে হ'লে বড় বড় মোটর চাই। মোটর কাল সকালের আগে পাওয়া যাবে না।”

জয়ন্ত নাচার ভাবে বললে, “তাহ'লে কাল সকাল পর্য্যন্তই অপেক্ষা করি, কি আর করব?”

\*

\*

\*

\*

পরিত্যক্ত আলিনগরের প্রাচীন পথ ধরে ছুখানা সাধারণ মোটর-গাড়ী ও একখানা মোটর-বাস অগ্রসর হচ্ছে। জয়ন্ত, মাণিক ও সুন্দরবাবু ছিলেন একখানা 'টু-সিটারে', জয়ন্ত নিজেই তার চালক। তার পরের গাড়ীতে আছেন মহম্মদ, অমিয়, নিশীথ ও পরেশ। 'বাসে' আছে বারোজন চৌকিদার। ড্রাইভারদের নিয়ে মোট একশজন লোক।

জয়ন্তের মতে একশজন লোকই যথেষ্ট। সুন্দরবাবু খুৎ-খুৎ করে বলেন, "মোটাই যথেষ্ট নয়। হানাবাড়ীতে একশোজন লোকও যথেষ্ট নয়। হুম্! একটা ভূত দেখা দিলে একশোজনের একজনেরও আর দেখা পাওয়া যাবে না। আর এখানে একটা নয়—ভূত আছে নাকি ছয়-ছয়টা! বাপূরে!"

মাণিক বললে, "একশোজনেরও দেখা পাওয়া যাবে না? তাহলে আপনিও কি পালাবেন?"

—"পালাব না তো কি, নিশ্চয়ই পালাব! আমি হচ্ছি পুলিশ, আমি ভূতের রোজা নই, ভূত দেখলে পালাব না তো কি দাঁড়িয়ে থাকব?"

—"তবে আপনি এলেন কেন?"

—"সেই ছয়টা লোক তো ভূত না হ'তেও পারে? হয়তো তোমাদের ছেলোমানুষ পেয়ে কেউ মিথ্যে ভয় দেখিয়েছে। বিশেষ এটা দিন-হুপুর। কে না জানে, দিন-হুপুরে ভূত বড়-একটা দেখা দেয়না।"

মাণিক মুখে টিপে হেসে বললে, "কেন সুন্দরবাবু, আপনি কি প্রাচীন শাস্ত্রবাক্য শোনেন নি?"

—"কি শাস্ত্রবাক্য?"

—"ঠিক হুপুর-বেলা, ভূতে মারে ঢেলা?"

—"হুম্! আবার ঠাট্টা হচ্ছে?"



গাড়ীগুলো গোরস্থানে এসে উপস্থিত হ'ল। জয়ন্ত টেচিয়ে বললে “এই-  
খানেই সকলকে নামতে হবে।”

সকলে একে একে গাড়ী থেকে নেমে পড়ল। একসঙ্গে এত লোকের  
ভীড় হতভাগ্য আলিনগর অনেককাল দেখে নি। পথের উপরে শুয়ে-একটা  
গোখরো সাপ নিশ্চিন্ত মনে কুণ্ডলী পাকিয়ে রোদ পোয়াচ্ছিল, সে তাড়াতাড়ি  
কৌশ্ ক'রে ফনা তুলে উঠেই কালো বিদ্যুতের মতন চকিতে একখান  
পাথরের আড়ালে গিয়ে আশ্রয় গ্রহণ করলে।

চারিদিকে তাকিয়ে মহম্মদ বললেন, “এমন জায়গা কখনো দেখি নি।  
নগর বললেই লোকের মনে জেগে ওঠে জনতার দৃশ্য। কিন্তু জনতাহীন নগর—  
জলশূন্য সাগর! চারিদিকে খালি ভাঙা বাড়ী আর ঘুঘুর কান্না! দিনের  
বেলাতেই এখানে বৃকের কাছটা ছাঁৎ-ছাঁৎ ক'রে ওঠে! এখানে  
একলা এলে রজ্জুতে সর্পশ্রম হওয়াই স্বাভাবিক!”

জয়ন্ত অল্প হেসে বললে, “আপনি বোধহয় ভাবছেন, আমরাও রজ্জুতে  
সর্পশ্রম করেছি? কিন্তু এইটেই আপনার শ্রম! এইপথে আসুন!”

গোরস্থানের ভিতর দিয়ে চলতে চলতে মহম্মদ বললেন, “কিন্তু একটা-  
কিছু গোলমাল আছেই আছে, আপনারা যা দেখেছেন তা ভূতের চেয়েও  
আশ্চর্য্য! জ্যাস্তো মড়ার কল্পনাও আমি করতে পারছি না!”

মাগিক বললে, “তারা যদি এখনো এখানে থাকে, তাহ'লে আপনিও  
স্বচক্ষে দেখতে পাবেন!”

জয়ন্ত বললে, “অনেক সময় বাজে নষ্ট হয়েছে। তারা কি আর  
এখানে আছে?”

সেই বিশাল অট্টালিকার বিবর্ণ উচ্চ চূড়া চতুর্দিকের ধ্বংসস্তূপের মধ্যে

অনেক দূর থেকেই দৃষ্টি আকর্ষণ করে। সকলে সেই বাড়ীর যত কাছে এগিয়ে যাচ্ছে, সুন্দরবাবু একটু-একটু করে ততই পিছিয়ে পড়ছেন! ক্রমে তিনি চাঁকিদারদের দলে গিয়ে ভিড়লেন। তাঁর যুক্তি হচ্ছে, পিছিয়ে থাকলে ছুতের আবির্ভাব হ'লে সর্ব্বাগ্রে তিনিই দৌড় মারতে পারবেন!

মহম্মদ বললেন, “অন্ত-বড় বাড়ী ঘেরাও করতে গেলে একশো জন লোকের দরকার।”

জয়স্ব বললে, “বাড়ী ঘেরাও করে যখন কোন লাভ নেই, তখন ভিতরের ঠাঠানে চাঁকিদাররা অপেক্ষা করুক। আমরা ডাকলেই তারা যেন ছুটে আসে।”

সুন্দরবাবু মনে মনে বললেন, “তারাই ছুটে আসবে বটে! ছুটে আসবে, না ছুটে পালাবে? ভুতের সঙ্গে লড়াই এই তালপাতার সেপাইরা! হুম্!”



## দ্বাদশ পরিচ্ছেদ

হুম্ হুম্ হুম্ হুম্

সকলে বাড়ীর ভিতরে প্রবেশ করলে। এতগুলো জুতোর শব্দে অট্টালিকাবাসী নিৰ্জনতা যেন চমকে উঠল সবিস্ময়ে।

জয়ন্ত মনে মনে ভাবলে, নবাব যদি এখনো এখানে থাকে, তাহলে এ পায়ের শব্দগুলো সেও শুনতে পেয়েছে নিশ্চয়ই!

আর সেই জ্যান্টো মড়াগুলো! তারাও কি এখন উৎকর্ণ হয়ে তালে তালে পা ফেলে আক্রমণ করতে আসবার জগ্গে অপেক্ষা করছে না?

সুন্দরবাবু মনে মনে ভাবছেন, এবারে তো খাঁচার ভিতরে ইদুরের মত বাড়ীর ভিতরে বন্দী হলুম। কোন্দিক দিয়ে ভূত এলে কোন্দিক দিয়ে পালানো উচিত, কিছুই তো বোঝা যাচ্ছে না! আর চৌকিদারদেরও সঙ্গে থেকে লাভ হবে না, এদের হাতে বন্দুক নেই!.....তিনি দৌড়ে মহম্মদের সঙ্গ নিলেন।

জয়ন্ত সৰ্ব্বাঙ্গে একতারা দালানের সেই কোণের ঘরে গিয়ে ঢুকল। চারিদিকে তাকিয়ে ঘাড় নেড়ে হতাশ ভাবে বললে, “তারা এখানে নেই।”

সুন্দরবাবু আশ্বস্তির নিঃশ্বাস ফেললেন।—“তারা নেই, বাঁচা গেছে। আপদ বিদেয় হয়েছে!”

মহম্মদ বললেন, “আপনি ঘর ভুল করেন নি তো?”

জয়ন্ত বললে, “না। ঐ দেখুন।” বললেই সে ‘টর্ক’ টিপে মেঝের

উপরে আলো ফেললে। মেঝের উপরে পুরু ধূলা। আর ধুলোর উপরে পাশাপাশি ছয়টা দেহের পরিষ্কার ছাপ।

মাণিক বললে, “এ-ঘরে মড়াগুলো ছিল ঠিক মড়ারই মত। তাদের গায়ে হাত দিয়ে দেখেছি, নাকে হাত দিয়ে দেখেছি।”

মহম্মদ খালি বললেন, “আশ্চর্য্য !”

সুন্দরবাবু সকলের পিছন থেকে উকি মেরে দেহের ছাপগুলো একবার দেখেই শিউরে উঠে বললেন, “হুম্! আমার নাকে পচা মড়ার গন্ধ আসছে !”

মাণিক বললে, “সত্যি-সত্যিই সেদিন এখানে মড়া-পচা গন্ধ ছিল।”

মহম্মদ বললেন, “সুন্দরবাবুর ভ্রাণ-শক্তি বেশী। আমি কোন গন্ধ পাচ্ছি না।”

জয়ন্ত বললে, “চৌকিদারদের উঠোনের সব ঘর খুঁজে দেখতে বলুন। ততক্ষণে আমরা উপরটা ঘুরে আসি। কিন্তু বোধহয় মিথ্যা ঘোরাঘুরি। শিকার পালিয়েছে। আমরা যে আবার আসব নবাব সেটা আন্দাজ করতে পেরেছে। সে বোকা নয়।”

দোতালার দালানের কোণে গুয়েছিল সেই কালো বিড়ালটা। লোক দেখেই ‘ম্যাও’ বলে আপত্তি জানিয়ে ল্যাজ তুলে দৌড় মারলে।

মহম্মদ বললেন, “হানাবাড়ীর সব লক্ষণই এখানে আছে দেখছি।”

মাণিক বললে, “হ্যাঁ, কেবল কালো বিড়াল নয়, কড়িকাঠের দিকে তাকিয়ে দেখুন, দলে দলে কালো বাতুড়ও বুলছে! যেন আঁধারে-তৈরি অতিকায় প্রজাপতি !”

—“কেবল আসল দ্রষ্টব্যই নেই। ভূত, কি জ্যান্তো মড়া !”

মুন্দরবাবু বললেন, “ভূত আবার দৃষ্টব্য কি, না থাকাই তো ভালো !”

যে-ঘরে নবাব আহত হয়েছিল সকলে সেই ঘরে প্রবেশ করলে। ঘরে জনপ্রাণী নেই।

মেঝের দিকে স্থির-দৃষ্টিতে তাকিয়ে জয়স্তু খানিকক্ষণ চুপ করে দাঁড়িয়ে রইল। যেন নিশ্চল জড় পাথরের মূর্তি। তারপর হঠাৎ কি উৎসাহে তার বিপুল বক্ষ স্ফীত হয়ে উঠল। তারপর পকেট থেকে রূপোর শামুক বার করে ছবার সশব্দে নশ্র নিলে।

মাণিক জানে, এটা জয়স্তুর বিশেষ আনন্দের লক্ষণ। কিন্তু হঠাৎ যে এমন আনন্দিত হ'ল কেন ?

মহম্মদ বললেন, “বাড়ীর সব ঘরই যে এমনি খালি দেখব, সে-বিষয়ে সন্দেহ নেই।”

জয়স্তু খুসি-গলায় বললে, “সব ঘর হয়তো খালি নেই।”

—“কি করে জানলেন ?”

—“এখনো ঠিক করে কিছু বলতে পারছি না। আসুন আমার সঙ্গে।”

জয়স্তু অগ্রসর হ'ল। আর সবাই চলল তার পিছনে পিছনে।

সে-ঘর থেকে বেরিয়ে জয়স্তু খুব ধীরে ধীরে দালান দিয়ে এগুতে লাগল। দালানের পূর্বপ্রান্তে একটা দরজা। সেটা ভিতর থেকে বন্ধ।

মহম্মদ বললেন, “এ দরজা বন্ধ করলে কে ?”

জয়স্তু বললে, “যেইই বন্ধ করুক, আমি খুলে দিচ্ছি। আপনাদের বন্ধুত্ব তৈরি রাখুন।”

তার বিপুল দেহের খাকায় দরজার খিল ভেঙে গেল।

কিন্তু সেটা ঘরের দরজা নয়। অন্দর-মহলের দরজা।

জয়ন্ত আবার অগ্রসর হ'ল। অন্দরেও একটা উঠান রয়েছে, কিন্তু গাইরের মতন অত-বড় নয়। আবার একটা দালান। তারপর আবার একসার সিঁড়ি। জয়ন্ত এবার নীচে নামতে লাগল। তারপর ডানদিকে ফেরে এগিয়ে চলল। সে আবার একটিপ্ নস্থ নিলে। এবং মনের মামোদে শিস্ দিতে শুরু করলে।

মাণিক অবাক হয়ে ভাবতে লাগল, জয়ন্ত কোথায় যাচ্ছে? এ বাড়ীর কিছুই সে চেনেনা, এদিকে কখনো আসেও নি, কিন্তু এমন নিশ্চিতভাবে কাথায় যাচ্ছে সে? জয়ন্ত তো অকারণে কিছু করবার পাত্র নয়, কী সূত্র স পেয়েছে—কখন পোলে এবং কেমন ক'রে পোলে?

দ্বিতীয় উঠানের পূর্বপ্রান্তে ঘুটঘুটে অন্ধকার একটা ঘর। জয়ন্ত সোজা সেই ঘরের ভিতরে গিয়ে ঢুকল। ঘরের মাঝখানে দাঁড়িয়ে একবার 'টর্ক্'টা জ্বলে কি যেন দেখলে!

সে ঘরেও কেউ নেই।

মহম্মদ জিজ্ঞাসা করলেন, "এখানে এলেন কেন?"

জয়ন্ত সে-কথার জবাব না দিয়ে যেন নিজের মনেই বললে, "দেখছি, ঘর দিয়ে বেরুবার আর কোন পথ নেই। তাহ'লে নবাব কোথায় গেল?"

—"কে কোথায় গেল?"

—"নবাব। সে এই ঘরেই ঢুকেছে। কিন্তু দরজা দিয়ে আর বেরোয় নি।"

মহম্মদ একটু বিরক্ত স্বরেই বললেন, "আপনার এমন আশ্চর্য্য অনুমানের কারণ কি?"

—"কারণ? রক্তের প্রমাণ মহম্মদ-সায়েব, রক্তের প্রমাণ! আপনার চাখ ব্যবহার করতে শেখেন নি কেন?"

হুম্ হুম্ হুম্ হুম্

১১৩

—“আপনার কথা আমি বুঝতে পারছি না !”

—“মেঝের দিকে তাকিয়ে দেখুন !”

মাণিক সবিস্ময়ে দেখলে, গৃহতলে একটা সুদীর্ঘ কালো রেখা ! ঘর থেকে মুখ বাড়িয়েও দেখলে, সে-রেখা দালান দিয়ে সমান চলে গেছে ! রক্ত জমাট বাঁধলে কালো দেখায় । এত-বড় একটা সূত্রও তার চোখে পড়েনি ব’লে সে রীতিমত লজ্জা অনুভব করলে !

জয়ন্ত বললে, “মহম্মদ-সায়েব, শুনেছেন তো, মাণিকের রিভলভারের গুলিতে কাল নবাবের উরু আর পা জখম হয়েছিল ? নবাব যেখান দিয়ে গিয়েছে, কিংবা তাকে যেখান দিয়ে নিয়ে যাওয়া হয়েছে, সারা পথেই রক্ত ঝরে ঝরে পড়েছে ! সেই রক্তরেখা অনুসরণ করেই উপরের ঘর থেকে আমি এখানে এসে হাজির হয়েছি । এখন বুঝতে পারলেন ?”

সুন্দরবাবু বললেন, “হুম্ ! জয়, তুমি আমার কাণ ম’লে দাও ! আমরা কি চোখের মাথা খেয়েছিলুম ? এমন সহজ প্রমাণটাও আবিষ্কার করতে পারি নি !”

মহম্মদ চমৎকৃত স্বরে বললেন, “ধন্য জয়ন্তবাবু, ধন্য !.....কিন্তু সে সয়তানটা গেল কোথায় ?”

—“সেইটেই হচ্ছে সমস্যা । দেখছেন তো, রক্তের একটা রেখাই এই ঘরে এসে ঢুকেছে । নবাব ঘর থেকে বেরিয়ে গেলে আর একটা রেখাও দেখতে পাওয়া যেত । মহম্মদ-সায়েব, আপনি সব চৌকিদারকে এখানে আসতে বলুন, আমি ততক্ষণ নবাবকে পুনরাবিষ্কারের চেষ্টা করি ।”

মহম্মদ বাইরে গিয়ে বার-তিনেক বাঁশী বাজাতেই চৌকিদারদের ড্রত্ৰ পদশব্দ শোনা গেল ।

জয়ন্ত 'টর্চ' জ্বলে দেখে বললে, "মাণিক, রক্তের দাগ ঐ দেয়ালের গায়ে গিয়ে শেষ হয়েছে। কিন্তু দেয়ালের সামনে গিয়ে নবাব অদৃশ্য হ'ল কেমন ক'রে, সে তো আর হাওয়ায় হাওয়া হয়ে মিলিয়ে যেতে পারে না?... হয়েছে! ঐ দেখ, দেয়ালের গায়ে ছোটো কড়া! এ-সব সেকেলে পুরাণো বাড়ীতে প্রায়ই গুপ্তদ্বার থাকে। মাণিক, কড়াছটো ধ'রে জোরে টান মারো তো!"

মাণিক তাই করলে। খুব সহজেই দেয়ালের খানিকটা অংশ হড় হড় ক'রে দরজার মত খুলে এল! ভিতরে একটা পথ!

জয়ন্ত বললে, "সবাই রিভলভার নাও। ছয়জন চৌকিদার গুপ্তদ্বারের নামনে পাহারা দিক্। ছয়জন আমাদের সঙ্গে আশুক!"

পথটা গিয়ে আর একটা দরজার সামনে শেষ হয়েছে। দরজার সঙ্গে আর একবার জয়ন্তের শক্তি-পরীক্ষা শুরু হ'ল। কিন্তু এ দরজা জয়ন্তের প্রবল আক্রমণ তিন-তিনবার ব্যর্থ করলে!

জয়ন্ত তখন দরজার উপরে পৃষ্ঠদেশ রেখে দেহের সমস্ত শক্তিপ্রয়োগ ক'রে প্রাণপণে চাপু দিতে লাগল,—'টর্চে'র আলোতে দেখা গেল, তার সারা মুখ পাড়া টকটকে হয়ে উঠেছে!

মহম্মদ মাথা নেড়ে বললেন, "অসম্ভব চেষ্টা! মানুষ ও-দরজা গায়ের জারে ভাঙতে পারে না। অন্য ব্যবস্থা করতে হবে!"

হঠাৎ মড়াৎ ক'রে একটা শব্দ হ'ল। জয়ন্ত স'রে এসে হাঁপাতে হাঁপাতে বললে, "দেখুন, ভেঙেছে কিনা?"

মহম্মদ এগিয়ে সবিস্ময়ে দেখলেন, দরজার ছখানা কবাটই চৌকাঠ থেকে ভঙে বেরিয়ে এসেছে। সমস্তমে জয়ন্তের দিকে তাকিয়ে তিনি বললেন, "আপনি অসাধারণ মানুষ!"



তারপর ছ-তিনটে লাথি মারতেই ছড়মুড় ক'রে পাল্লা-ছখানা ভেঙে পড়ল !  
খোলা দরজা দিয়েই দেখা গেল, একখানা বড় হলঘর । এবং ঘরের  
ওদিককার দেয়ালের সামনে খাটের বিছানার উপরে হাসিমুখে ব'সে রয়েছে,  
নবাব স্বয়ং !

জয়ন্ত চৌঁচিয়ে বললে, “সেলাম আলিনগরের সম্রাট ! ঘরের ভিতরে  
যেতে পারি কি ?”

নবাব খুব মিষ্ট-গলায় বললে, “এস ।”

—“তোমাব সেই জীবনহীন জীবন্তবা কোথায় ?”

নবাব আবার চৌঁটে হাসি মাথিয়ে বললে, “বড়-হঠাৎ এসে পড়েছ, তাদের  
জাগাবার আর সময় পেলুম না !”

—“তাহ'লে এ-জীবনে আর সময় পাবেও না !”—ব'লেই জয়ন্ত ঘরের  
ভিতরে গিয়ে ঢুকল সর্বপ্রথমে । অল্প সবাই তার পিছনে পিছনে এগিয়ে  
গেল ।

হঠাৎ সুন্দরবাবু “ওরে বাপরে—ছম্ !” ব'লে চৌঁচিয়ে উঠে সামনে  
অমিয়কে পেয়েই ছইহাতে তাকে জড়িয়ে ধ'রে ঠক্ ঠক্ ক'রে কাঁপতে  
লাগলেন !

সকলে ফিরে স্তম্ভিত নেত্রে দেখলে, দরজার দিকের দেয়ালের তলাতেই  
পাশাপাশি শুয়ে আছে সেই ছয়টা মূর্তি ! তাদের কাকর চোখ মোদা, কারুর্ক  
চোখ আধা-খোলা, কারুর্কর চোখ পুরো খোলা ! কিন্তু সব চোখই আড়ষ্ট—  
মড়ার মত দৃষ্টিহীন ।

জয়ন্ত এগিয়ে গিয়ে তাদের বুক হাত দিয়ে বললে, “মহম্মদ-সায়ের, দেখে  
যান—এই ঠাণ্ডা বুকে শ্বাস-প্রশ্বাসের কোন চিহ্ন আছে কিনা ?”

কিন্তু মহম্মদের রুচি হ'ল না। দূর থেকেই বললেন, “দেখতেই তো প্যাপাচ্ছি, ওগুলো মড়া!”

মাণিক বললে, “কিন্তু এই মড়াগুলোই সেদিন বেঁচে উঠেছিল!”  
মহম্মদ অবিশ্বাসের হাসি হাসলেন।

সুন্দরবাবু চোখ ছানাবড়া ক'রে বললেন, “ওরা আবার যদি জাগে? আবার যদি তেড়ে আসে? এই চোকিদার! লাসগুলো শীগুগির এখন ঠুথকে সরিয়ে নিয়ে যা!”

কিন্তু চোকিদাররা কেউ মড়া ছুঁতে রাজি হ'ল না।

নবাব হাসতে হাসতে বললে, “ভয় নেই, ওরা কেউ আর জাগবে না। এইবারে আমিও ওদের মত ঘুমিয়ে পড়ব।”

জয়ন্ত চমকে উঠে বললে, “ঘুমিয়ে পড়বে—মানে?”

—“হ্যাঁ, ঘুমিয়ে পড়ব। তোমরা জ্যান্টো নবাবকে এখন থেকে নিয়ে যেতে পারবে না। এই দেখ।” নবাব বিছানাব উপর থেকে একটা খালি শিশি তুলে নিয়ে দেখালে।

—“তুমি বিষ খেয়েছ?”

—“হ্যাঁ। তোমরা হঠাৎ এসে পড়লে, নইলে ওদের আর-একবার দাগিয়ে শেষ-চেষ্টা ক'বে দেখতুম! বিষ না খেয়ে উপায় কি?”

মহম্মদ বললেন, “তুমি সত্যি-সত্যিই ঐ মড়াগুলোকে বাঁচাতে পারো?”

—“পারি। অবিশ্বাস হচ্ছে? দেখবে?”

সুন্দরবাবু আঁৎকে উঠে তাড়াতাড়ি বললেন, “না না, আর দেখে কাজ নই! আমার খুব বিশ্বাস হচ্ছে।”

নবাব বললে, “তোমরা কি পিশাচসিদ্ধ মানুষের কথা শোনো নি? আনি

বহু সাধনায় সেই বিজ্ঞা অর্জন করেছি। নানান দেশের নানান কবর খুঁজে আমি বেছে বেছে খুব জোয়ান্ আর টাটকা মড়া তুলে এনেছি। যখন দরকার হয় তখন আমি তাদের নিজের আত্মার অংশ দি। কিন্তু ওদেরও দেহ তাজা রাখবার জগ্গে জ্যাস্তো জীবের রক্তের দরকার হয়। তাই যখন ঐ মড়ারা বাঁচে, বনের জীব-জন্তু ধ'রে তাদের ঘাড় ভেঙে রক্ত খায়, সুবিধা পেলে মানুষের রক্তও পান করে; আর তারপর গোলামের মত আমার হুকুমে ওঠে-বসে চলে-ফেরে!.....তোমরা আর কি জানতে চাও বল, আমার ঘুমোবার সময় ঘনিয়ে আসছে!”

জয়ন্ত বললে, “তুমি মেয়ে চুরি করতে কেন?”

হা-হা ক'রে হেসে নবাব বললে, “কেন? বলেছি তো, আমি আলি-নগরের রাজা! তাই তো আমি নবাব নাম নিয়েছি! আমার বেগম নেই, তাই মেয়ে ধ'রে আনি বেগম করব ব'লে। কিন্তু একটা মেয়েও আমার বেগম হবার উপযুক্ত হ'ল না! তবু তাদের ধ'রে রেখেছি,—মনের মত বেগম পেলে পর তাদের বাঁদী ক'রে রাখব ব'লে!”

অমিয় ব্যাকুল কণ্ঠে ব'লে উঠল, “কোথায় আমার বোনকে লুকিয়ে রেখেছিস?”

—“পাশের ঘরে গিয়ে দেখ-গে!”

অমিয়, নিশীথ ও পরেশ একসঙ্গে ব'লে উঠল, “কোনদিক দিয়ে যাব?”

—“ঐ দরজা দিয়ে!”

পশ্চিম দিকে একটা দরজা। সেটা ঠেলতেই খুলে গেল, সেদিকেও একটা পথ রয়েছে।

তারা তিনজনে ভিতরে ঢুকে চৌচিয়ে ডাকলে—“শীলা! শীলা! শীলা!”  
কে ক্ষীণ কাতর কণ্ঠে সাড়া দিলে, “দাদা, দাদা।”

মিনিট-তিনেক পরেই অমিয় তার বোনের হাত ধরে ফিরে এল। নিশীথ ও পরেশের পিছনে পিছনে এল আরো তিনটি মেয়ে, সকলেই ভয়ে থর্-থর্ করে কাঁপছে!

ছয়টা মৃত মূর্তির দিকে তাকিয়েই শীলা আর্দ্রনাদ করে আতঙ্কগ্রস্ত স্বরে বলে উঠল, “দাদা, দাদা, আমাকে এখান থেকে নিয়ে চল।”

অমিয় বললে, “আমরা এসে পড়েছি, আর তোর ভয় কি শীলা?”

শীলা ভয়ে চোখ মুদে শুকনো গলায় বললে, “কিন্তু ঐ মড়াগুলো? ওরা যে এখানে রয়েছে! ওরাই যে আমাকে ধরে এনেছে! ওরা যে রোজ আমাকে ভয় দেখায়।”

শীলাকে নিজের আরো-কাছে টেনে এনে তার পিঠ চাপড়াতে চাপড়াতে অমিয় বললে, “ওরা আর কারকে ভয় দেখাতে পারবে না। ওদের আবার আমরা মাটির তলায় পুঁতে ফেলব।”

নবাব গম্ভীর স্বরে বললে, “তোমাদের সকলের মনোবাঞ্ছা পূর্ণ হয়েছে তো? এখন এখান থেকে বেরিয়ে যাও দেখি! আমাকে একলা মরতে দাও।”

মহম্মদ বললেন, “তা হয় না। তুমি মরবে কি না কে জানে?”

নবাব টলে পড়ে যাচ্ছিল। তাড়াতাড়ি দেয়াল ধরে নিজেকে সামলে নিয়ে বললে, “আমার মৃত্যু নিশ্চিত। তোমরা নির্ভয়ে যেতে পারো।”

মহম্মদ মাথা নেড়ে বললেন, “চোখের সামনে তোমার মৃত্যু না দেও আমরা এখান থেকে এক পা নড়তে পারব না।”

হুম্ হুম্ হুম্ হুম্



“মাণিক রিভলভার ছুঁড়লে”

নবাবের ঝিমিয়ে-আসা চোখে আবার বিদ্যুৎ খেলে গেল। অস্পষ্ট, জড়ানো স্বরে সে গর্জন করে বললে, “কী, আমাকে একলা মরতে দেবে না? বটে!” হঠাৎ সে সিধে হয়ে উঠল এবং—তার ছুই চোখ বন্ধ হয়ে গেল!

মাণিক সন্দিক কণ্ঠে বললে, “ও মরল নাকি?”

জয়ন্ত তীক্ষ্ণদৃষ্টিতে নবাবের মুখের পানে চেয়ে রইল।

আচম্বিতে সুন্দরবাবু মেঝের উপরে প্রচণ্ড এক ঝাঁপ খেয়ে আছড়ে পড়লেন এবং বেগে গড়াতে গড়াতে নবাবের খাটের তলায় ঢুকে পড়ে ক্রমাগত বলতে লাগলেন, “হুম্, হুম্, হুম্, হুম্!”

ওদিকে ঘরের ভিতরে আরম্ভ হয়েছে চীৎকার ও আর্তনাদের সঙ্গে বিঘম হুটোপুটি ও ছুটোছুটি! চৌকিদাররা দল বেঁধে ঘর ছেড়ে পালিয়ে গেল এবং তাদের সঙ্গে সঙ্গে ছুটে বেরিয়ে গেল অশ্ব-তিনটি মেয়ে,—কেবল শীলা তার দাদার ছুই বাহুর উপরে এলিয়ে মুচ্ছিত হয়ে পড়ল!

সেই ছয়টা মৃতদেহ টলতে টলতে মেঝের উপরে উঠে বসেছে—তাদের প্রত্যেকেরই ভাবহীন চক্ষু একেবারেই বিষ্কারিত!

মহম্মদ পিছনে হ’টে দেয়ালের উপরে পিঠ রেখে একেবারে আড়ষ্ট হয়ে গেলেন!

মাণিক উপর-উপরি রিভলভার ছুঁড়লে, কোন কোন দেহে গুলি ঢুকে রীতিমত ছিদ্রের সৃষ্টি করলে, কিন্তু আশ্চর্য্য এই যে, এক কোঁটাও রক্ত বেরুলো না, কিংবা মূর্ত্তিগুলোর মুখে-চোখে যন্ত্রণার আভাসটুকুও ফুটে উঠল না। ভয়ানক! সে অসম্ভব, অস্বাভাবিক দৃশ্য দেখলেও বুকের রক্ত জ’মে বরফ হয়ে যায়!

জয়ন্তের হঠাৎ তখন খেয়াল হ'ল, নবাব নিশ্চয় মরবার আগে শেষ-বার মড়া জাগাবার জন্তে ধ্যানাসনে বসেছে! সে এক লাফে বিছানার উপরে গিয়ে প'ড়ে নবাবকে প্রচণ্ড ধাক্কা মারলে! নবাব তীব্র কণ্ঠে “আঃ” ব'লে শয্যায় এলিয়ে পড়ল!

—ওদিকে সেই মুহূর্তেই ছয়টা যুঁর্কিই উঠে দাঁড়াতে দাঁড়াতে আবার অবশ হয়ে প্রথমে ব'সে—তারপর মাটিতে গড়িয়ে প'ড়ে গেল! আবার তারা যে-মড়া সেই-মড়া!

জয়ন্ত হেঁট হয়ে নবাবের বুকে হাত দিলে। তার বুক স্থির। তার ঠোঁট হাতে দিলে। নিঃশ্বাস পড়ছে না।

মাগিক খাটের তলা থেকে সুন্দরবাবুর দেহ টেনে বার করলে। তিনি তখন আর “ছম্” বলছেন না। অজ্ঞান।

ইতি

বাংলা সাহিত্যে 'অ্যাডভেঞ্চার'-কাহিনীর স্রষ্টা

শ্রীহেমেন্দ্রকুমার রায় লিখিত

## ছোটদের গ্রন্থাবলী

যকের ধন ( ৩য় সংস্করণ ) ... ১\	? মাদের নামে সবাই ভয় পায় (ভূতের গল্প, ২য় সংস্করণ যন্ত্রহ) ৫০
মায়াকানন ... ১০	১ সন্দের পর, সাবধান ( ভূতের গল্প ) ৫০
মেঘদূতের মর্ত্তে আগমন ... ১\	কিং কং ( ৩য় সংস্করণ ) ... ১\
আবার যকের ধন ( ৩য় সংস্করণ ) ১\	মানব-দানব (Dr. Jekyll and Mr. Hyde) ১\
অমাত্মিক মামুষ ( পরিবর্দ্ধিত ২য় সংস্করণ )... ১\	অদৃশ্য মানুষ ( The Invisible Man ) ১\
হিমালয়ের ভয়ঙ্কর ( ২য় সংস্করণ ) ১\	আল্পব দেশে অমলা ( Alice in Wonderland, পরিবর্দ্ধিত ২য় সংস্করণ ) ১০
স্বয়ম্ভের কীর্ত্তি ... ১\	সাহিত্যিক শরৎচন্দ্র ( জীবনী ) ... ৫০
অসম্ভবের দেশে ... ১\	ছুটির ঘণ্টা ( নিঃশেষিত )
রক্তবাদল ঝরে ... ১\	নীলসায়রের অচিন-পুরে ( যন্ত্রহ )
পদ্মরাগ বুদ্ধ ... ১\	বিমল ও কুমারের কীর্ত্তিকাহিনী ( ঐ )
অমাবস্তার রাত ... ১\	ড্রাগনের হৃৎস্পন্দ ( ঐ )
মামুষ-পিশাচ ... ৫০	
মামুষের গন্ধ পাই ... ১\	
পাত্রে ঘারা ভয় দেখায় ( ভূতের গল্প ) ... ৫০	











